

بِسْمِ اللَّهِ الرَّحْمَنِ الرَّحِيمِ

دیوان حکمت

(پیر ترکستان)

خواجہ احمد یسوی

به اهتمام:

رسول اسماعیل زاده

قوآنشبیك قاری

غالیه قمبربكاوا

احمد یسوی، - ۵۶۲ق.
[دیوان حکمت. ترکی قزاقی]
(دیوان حکمت)

Diواني hikmet: danalyq kitaby/Ahmed Iasau; baspagha azirlegender
Quanyshbek Qari, Ghaliia Qambarbekova, Rasul Ismailzade.

تهران: الهدی، ۲۰۰۰ = ۱۳۷۹.

ISBN: 964 - 472 - 286 - 8

۲۳۵، ۱۹۲ ص.

فهرست نویسی بر اساس اطلاعات فیبا.
ترکی قزاقی.

ص. ۶. به فارسی: احمد یسوی. دیوان حکمت (پیر ترکستان) ۱. شعر ترکی جغتایی - قرن
۶ ق. - ترجمه شده به ترکی قزاقی. ۲. شعر ترکی قزاقی - قرن ۲۰ - ترجمه شده از ترکی
جغتایی. الف. قمبریکووا، غالیه، Ghaliia, Qambarbekova, گردآورنده. ب. قاری
قوآنشبیگ، Qari, Quanyshbek, گردآورنده. ج. اسماعیل زاده، رسول، گردآورنده.
د. عنوان. ه. عنوان: Diواني hikmet: danalyq Kitaby. و. عنوان: دیوان حکمت. ترکی
قزاقی.

۱۳۷۹

۴۹۴/۳۶۴۰۱

۹ د ۳ الف ۵۳/۷ PL

م ۷۹ - ۱۳۲۹۵

کتابخانه ملی

انتشارات بین المللی الهدی



تهران - صندوق پستی: ۴۳۶۳ - ۱۴۱۵۵

تلفن: ۶۴۰۶۲۶۱ فاکس: ۶۴۰۶۲۴۰

نام کتاب: دیوان حکمت

مؤلف: خواجه احمد یسوی

محقق، مصحح: رسول اسماعیل زاده دوزال

مترجم، مصحح: قوآنشبیگ قاری، خانم غالیه قمبریکووا

تیراژ: ۳۰۰۰

قیمت: ۱۵۰۰۰ ریال

ISBN: 964 - 472 - 286 - 8

شابک: ۸ - ۲۸۶ - ۴۷۲ - ۹۶۴

ناشر: انتشارات بین المللی الهدی

حق چاپ برای ناشر محفوظ است.

بِسْمِ اللَّهِ الرَّحْمَنِ الرَّحِيمِ

الحمد لله رب العالمين والعاقبة للمتقين و الصلوة والسلام
على رسوله محمد وآله واصحابه اجمعين اما بيلكيل كيم بو رساله
قطب الاقطاب و سرور مشايخ سلطان الاوليا و برهان الاتقيا فرزند
خوان حضرت سلطان الانبيا صلى الله عليه و سلم حضرت سلطان
خواجه احمد يسوى آنداغ ايتيب دورلار كيم بيزدين صونكره آخر
الزمان يقين بولغانده آنداغ مشايخ لار پيدا بولغاى كيم ابليس عليه
اللعنة آلاردين سبق آغاى وهمه خلق آلا رغه محب بولغاى و
مريدلاريني باشقه ره المغاى لار اول شيخ لار كيم مريدلارى دين
طمع قيلغاى و جانيني كفر و ضلالت دين آيرمغاى و اهل
بدعتنى يخشى كوركاي و اهل سنتنى يمان كوركاي و علم
شريعت برلان عمل قيلماغاى و نامحرم لاركا كوز سالغايلار و
يمان ليغ پيشه قيليب الله تعالى نك رحمتيددين اميد توتقاي و
مشايخ لار ايشيني خار كوركاي مريدلارى رد بولغاى اوزلارى
مرتد بولغاى و ينه خارليق زازليق برله مريدلارى نك اشيكيد
يوروكايلار اول حالده مريدلاردين نياز آغايلار اكر مريدلارى
نذرى نياز برمسه اوروشقايلار آيغايلار من بيزار من خدا
بيزارديكايلار شيخ اولدور كيم نياز آلسه مستحق لارغه غريب

بیچاره‌غه بیرکایلار اکر آلیب اوزی ییسه مردار ایت یمش دیک
 بولغای اکر تون قیلیب کیسه اول تون تورغونچه حق تعالی نماز
 روزه‌سینی قبول قیلماغای و اکر آلمان نیازیدین نان قیلیب ییسه
 حق تعالی آنی دوزخ‌ده تورلوك عذاب‌غه کرفتار قیلغای و اکر
 آنداغ شیخ‌غه هر کشی اعتقاد قیلسه کافر بولغای آنداغ شیخ‌لار
 ملعون تورور آتینک فتنه‌سی دجال‌دین بدتر تورور ای طالب اکر
 حق‌نی طلب قیلیب تبای دیسنک آنداغ پیرکا قول بیرکیل کیم
 شریعت‌ده عارف بالله بولسه طریقت‌ده واقف اسرار بولسه
 حقیقت‌ده کامل مکمل بولسه معرفت‌ده دریای عمان بولسه آنداغ
 پیرکا قول بیرکیل کیم ایشینک سعادت بولغای اکر مرید شریعت
 علمینی بیللمسه شریعت علمینی آنکا اورکاتکای اکر طریقت‌ده
 واقع پیدا بولمسه طریقت علمی برلان یولغه سالغای و حقیقت
 سریدین مریدیکا یول کورساتکای و اکر معرفت‌ده جذبۀ حق پیدا
 قیلدورغای شیخ ذوالنون مصری رحمة الله علیه آنداغ
 ایتیب‌دورلار کیم مرید قرق ییل خدمت قیلماغونچه شیخ‌لیق و
 فقیرلیق و درویش اورنی آنکا تعین بولمس و خرقه کیماکی آنکا
 روا ایرمس حضرت سلطان خواجه احمد یسوی آنداغ ایتب
 دورلار کیم هر کیم پیرلیک و شیخ‌لیق دعواسین قیلور بولسه قرق
 ییل تا پیرنینک خدمتی‌ده یورمغونجه شیخ اورنی آنکا روا ایرمس
 اکر مرید آلسه رد تورور هر کیم درویش‌لیک دعواسین قیلسه اول
 حق امرینه بویون. سنوب شریعت امری برله یولغه یورکای و
 باطل ایشلاردین و بدعت ایشلاردین پرهیز قیلغای کیچه قیام
 بولمغونچه کوندوز مذمت قیلماغونچه شیخ‌لیق دعواسین قیلسه
 ایشی باطل تورور هر کیم شریعت امریدین چقسه مرتد تورور

اكر توبه قيلمای دنيا دين بارسه حق تعالى تموغده تورلوك
 عذابغه گرفتار قيلغای ای درویش اكر زاهد بولسه ریای عابد
 بولسه سودای صوفی بولسه کدای درویش بولسه هر جای
 صوفی لیق لاری مردار ایشلاری فساد مریدلاری مرتد
 صوفی لیق لاری خود روی لیک درویش لیک لاری طمع لیک
 نیت لاری فتنه لیک طریقه لاری اباحت سنت لاری بدعت فعل لاری
 قباحت نتیجه لاری شقاوت سرلاری خیانت و غسل لاری جنابت
 صوفی لارده ریاضت یوق فقیر لارده قناعت یوق غنی لارده
 سخاوت یوق درویش لارده وهم قیامت یوق ای درویش احوالیمز
 نچوک بولغای ای درویش بیلکیل و اکاد بولغیل کیم اوّل کلمه
 شریعت ایکنچی کلمه طریقت اوچونجی کلمه معرفت تور تونچی
 کلمه حقیقت نی بیلکم کیراک اكر صوفی بولوب بو کلمه لارنی
 بیللمسه صوفی ایمس کلمه شریعت بو تورور لا اله الا الله کلمه
 طریقت بو تورور لا اله الا الله صفا صفا محمد رسول الله کلمه
 معرفت بو تورور لا اله الا الله عظمته محمد رسول الله خلقتنه کلمه
 حقیقت بو تورور لا اله الا الله بقدرته محمد رسول الله رسالته ای
 درویش مشایخ ماتقدم نینک فقیر لیغی نی قبول قلیب سوزلارکا
 پی رولغ قلیب احکام وارکان لارینی بیلیب هوا و هوسنی ترک
 قلیب نفسنی مجاهده یایی برلان سیندوروب اوزیکا مطیع
 قلیب و قناعتنی پیشه قلیب قضاسینه راضی بولوب بلاسیغه
 صبر قلیب نعمتی کا شکر قلیب ایتکان رسالهغه عمل قلیب
 خدای تعالی نینک امرینی بجای کيلتورسه درویش لیک آتی آنکا
 مسلم بولور یوق ایرسه بولارنی بیلمای شیخ لیق دعواسین قیلسه
 قیامت کونی قرا یوزلوك بولوب شرمنده بولغای نعوذ بالله من

ذلك فقيرليق مرتبه سى مقام اعلا تورور هر كيم كا ميسر بولمس.
 قُدرت برلان حقدین سزكا فرمان بولدى
 توبسیز تینکز ایچره یلغوز توشتوم دوستلار
 اول تینکزكا اوغان ایذیم فرمان قیلدى
 بحمد الله صحت سلامت کچتیم دوستلار

یاشیم یتى، عمروم کیتی کوکكا اوچتوم
 بغریم تاشتی، عقلیم شاشتی، یركا توشتوم
 نفس و شیطان خیلی برلان کوب اوروشتوم
 صبر رضا مقاماتین آشتوم دوستلار

توقوزومده توکال توزدوم توکونمادوم
 اون یاشیمده اونك یانیمغه اورکولمادیم
 اون بریمده اوز نفسیم كا ضابط بولدوم
 فقر رضا مقاماتین کچتیم دوستلار

اون ایکیمده برچه ارواح کلام قیلدى
 حورلار قارشو کیلیب منكا سلام قیلدى
 سر شربتین ساقی بولوب منكا سوندی
 آنی آلیب ادب برلان ایچتیم دوستلار

اون اوچومده غواص بولوب دریا چومدم
 معرفت گوهرینی سردین تیردیم
 شمعی کوروب پروانه دك اوزوم اوردوم
 بیهوش بولوب عقلیم کیتی شاشتیم دوستلار

اون تور تومده تفراق صفت خارلیغ تارتیم
 "هو - هو" تیو باشم برلان تونلار قاتیم
 مینك آلتونلیق قیمتی نی بركا ساتیم
 آندین سونکرا قنات توتوب اوچتوم دوستلار

اون بيشمده دركاهينكا يانيب كيلديم
يازوق برلان هر ايش قيلديم خطا قيلديم
توبه قيليب حقه بويون سنوب كيلديم
توبه قيليب يازوقلاردين قاچتيم دوستلار
جبرائيل وحى كيلتوردى حق رسولغه
آيت كيلدى ذكر ايتكين ديب جزء و كلغه
خضر بابام سالدى منى اوشبو يولغه
آندين صونكره دريا بولوب تاشتيم دوستلار
شريعت نينك بوستانيده جولان قيلديم
طريقت نينك كلزارينده سيران قيلديم
حقيقت دين قنات توتوب طيران قيلديم
معرفت نينك ايشيكنى آچتيم دوستلار
أَلَسْتُ خمرين پير مغان تويا بردى
ايچا برديم مقداريم چه قويا بردى
قل "خواجه احمد" ايچيم تاشيم كويا بردى
طالب لركا دَر و گوهر ساچتيم دوستلار
القصه بو مقام انبيالار و عارفلار و عاشقلار نينك مقامى
تورور خصوصا حضرت رسول اكرم صلى الله عليه و سلم نينك
مقامى تورور يعنى الفقر فخرى ديديلار و فقيرنى يخشى كورمك
ايمان دين تورور و فقيرنى خار توتماق كفر تورور نجوك كيم
حضرت نبينا صلى الله عليه و سلم ايديلار حُبُّ الْفَقْرِ مِنَ الْاِيْمَانِ
وبغض الفقراء من الكفر اما فقيرليق مرتبه سى و حرمتى يتى قات
آسماندين و يتى قات يردين اولوغ راغ تورور نجوك كيم حضرت
رسول اكرم صلى الله عليه و سلم ايديلار حرمة الفقراء المؤمنين

اعظم عند الله من سبع السموات و سبع الارضين ديب ايديلار اى
 درویش هر کیم غنی لارنى اکرام قیلسه دنیاى اوچون ابد الآباده
 خدای تعالی نینک لعنتی غه کرفتار بولور و اگر فقیرنى حقیر کورسه
 و اهانت قیلسه خدای تعالی چندین عذاب غه کرفتار قیلغای بول
 فعل مؤمن لارده بولمس مکر منافق لارده بولغای حضرت علی
 رضی الله تعالی عنه روایت قیلورلار کیم درویش لیک مقامی قرق
 تورور اگر بیلب عمل قیلسه درویشلیکی پاک تورور و اگر بیلمسه
 و اورکانمسه درویش لیک مقامی آنکا حرام تورور و جاهل تورور
 اول قرق مقام نینک اونى مقام شریعتده تورور و اونى مقام
 طریقتده تورور و اونى مقام معرفتده تورور و اونى مقام
 حقیقتده تورور اول اون مقام شریعتده تورور (اول) ایمان
 کیلتورمک حق تعالی نینک بیرلکیکا و بارلیقیغه و صفاتیغه و
 ذاتیغه (ایکنجی) نماز اوقومق تورور (اوچونجی) روزه توتماق
 تورور (تورتونجی) زکوة بیرمک تورور (بیشنجی) حج طواف
 قیلماق تورور (آلتنجی) ملازم سوزلامک تورور (یتنجی) علم
 اوگرامک تورور (سکزنجی) حضرت رسول صلی الله تعالی علیه
 و سلمنى سنت لارینى بجای کیلتورمک تورور (توقوزنجی) امر
 معروفنى بجای کیلتورمک تورور (اونونجی) نهی منکر قیلماق
 تورور اون مقام طریقتده تورور (اول) توبه تورور (ایکنجی)
 پیرکا قول برمک تورور (اوچونجی) خوف تورور (تورتونجی)
 رجا تورور یعنی حق تعالی دین امیدوار بولماق تورور (بیشنجی)
 ورد اوقاتنى بجای کیلتورمک تورور (بشنجی) لذات و
 شهواتنى ترک قیلماق تورور (آلتنجی) پیرنى خدمتیده بولماق
 تورور (یتنجی) پیرنى اجازتى برلان سوزلامک تورور (سکزنجی)

نصیحت ایشیت مک تورور (توقوزنچی) تجرید بولماق تورور
 (اونونچی) تفرید بولماق تورور. اون مقام معرفتده تورور (اؤل)
 فنا بولماق تورور (ایکنچی) درویشلیقنی قبول قیلماق تورور
 (اوچونچی) هر ایشکا تحمل قیلماق تورور (تورتونچی) حلال
 طیب طلب قیلماق تورور (بیشنچی) معرفت قیلماق تورور
 (آلتنچی) شریعتنی و طریقتنی برپای توتماق تورور (یتنچی)
 دنیانی ترک قیلماق تورور (سکزنچی) آخرتنی اختیار قیلماق
 تورور (توقوزنچی) وجود مقامینی بیلمک (اونونچی) حقیقتنی
 اسرارینی بیلمک تورور.

اون مقام حقیقتده تورور (اؤل) خاک راه بولماق تورور
 (ایکنچی) یخشی یماننی تیماق تورور و بورون لقمه کا قول
 سالمق بلکه فضلہ کا قناعت قیلماقدور اوزینی لقمه سینی سبیل راه
 قیلماق و کشینی آزار برمکای و فقیرلیقغه منکر بولماغای و سیر
 سلوک قیلماق هر کیم دین سیرینی ساقلامق و شریعت و طریقت و
 حقیقت مقامینی بیلمک و عمل قیلماق شیخ حسن بصری رحمة
 الله علیه روایت قیلورلار حضرت رسول صلی الله علیه و سلم دین
 حضرت علی رضی الله عنهغه ایدیلار معراج کیچه سی حق تعالی
 فرمان برلان حضرت جبرائیل علیه السلام بوراق کیلتوردی یتی
 قات آسمان دین آشوردی تنکری عز وجل قدرتی برلان
 عجایب لارنی کوردی حضرت رب العالمین سلام قیلدی حق
 تعالی حبیبی جواب سلام آلدی خطاب رب الارباب دین ندا
 کیلدی یا سید المرسلین یوقاری نظر قیل حضرت رسول اکرم
 صلی الله علیه و سلم نظر قیلدی ایرسه عجایب صورت لارنی
 کورورلارکه آنینک شرحی یر و کؤک کا سیغمس آنده حیران

بولدىلار و بيهوش بولدىلارينه هوشلاريكا كىلدىلار ايدىلار يارب
 اول نه صورت ايردى كه كوردوم عقل هوشوم دين كىتىم حضرت
 رب العزت دين ندا كىلدىكه اول صورت فقيرلىق صورتى تورور
 اى محمد اكرمنى تىلاسنك فقير بول تجريد و تفريد بولغىل و اكر
 ديدار تىلاسنك رياضت تارتغىل تا منىنك جمالىمغه مشرف
 بولغاي سن و هر كىم ديدار تىلاسه غير حق آنكا حرام تورور
 فقيرلىق صورتىنى كوردىلار اما مشايخلار اول صورتنى بيانده
 مختلف سوزلاب تورورلار حضرت على رضى الله عنه ايدىلار
 حضرت محمد مصطفى صلى الله عليه و سلم اول كيچه معراج دين
 يانى كىلدىلار مبارك يوزلار يده نوري كوردوم اون سكز مينك عالم
 اول نوردين منكا عيان بولدى آنده ايدىم يا رسول الله بو كون
 يوزونكىزده نور كوردوم كونده كىدين زياده حضرت رسول صلى
 الله عليه و سلم ايدىلار بول كيچه معراج ده رب العالمين حضرت يده
 فقيرلىق صورتىنى كوردوم عشق شرايدين بير جرعه نوش قىلدىم
 ديدىلار ديدىلار حضرت على رضى الله عنه ايدىلار بو حالده من
 هم آرزو قىلدىم حضرت رسول صلى الله عليه و سلم عشق
 شرايدين بير جرعه منكا هم بيردىلار ايچتىم بيحال بولدوم و
 بيهوش بولدوم ينه هوشىم كا كىلدىم هر نه حضرت كا معاينه و
 مشاهده ايردى منكا هم شونداغ معاينه و مشاهده بولدى حضرت
 رسول اكرم صلى الله عليه و سلم ايدىلار يا على فقيرلىق مقامينده
 اون مقام بار تورور و اون نور بار تورور و اون يول بار تورور و
 اون اوروون بار تورور قرق مرتبه بار تورور (اول) اون مقام بار
 تورور كىم (اول) قناعت تورور چنانچه حضرت رسول اكرم صلى
 الله عليه و سلم ايدىلار الْقَنَاعَةُ كُنْزٌ لَا يَقْنَىٰ عَنْهَا قَنَاعَتُ كُنْجِيْدُوْر

کیم هرکیز تا کانماس و مال نینک فایده سی یوقتور اولوم وقتیده
 منقطع بولور (ایکنچی) مقام فقر بلاغه تحمل قیلماقدور
 (اوچونچی) مقام فقر کرفتارلیق تورور بنده لیک کی کا (تورتونچی)
 مقام فقر عذاب تورور ایوب پیغمبر دیک بولمیش تورور
 (بشنچی) مقام فقر حیرت تورور (آلتنچی) مقام فقر ریاضت
 تورور (یتنچی) مقام فقر آج لیق تورور (سکزنچی) مقام هلاکت
 تورور (توقوزونچی) مقام دل خسته بولماق دور (اونونچی) مقام
 فقر حضرت رب العزت لیک تورور.

و اون نور فقر تورور (اول) نور صدق (ایکنچی) نور صبر
 حضر رسول صلی الله علیه و سلم ایدیلار الصبر کنز من کنوز
 الْجَنَّةِ یعنی صبر بهشت نینک کنج لاری دین تورور (اوچونچی) نور
 شکر تورور (تورتونچی) نور فکر تورور (بیشنچی) نور ذکر
 تورور (آلتنچی) نور نماز تورور (یتنچی) نور روزه تورور
 (سکزنچی) نور ایمان تورور (توقوزونچی) نور صدقه تورور
 (اونونچی) نور پاک جان تورور.

و اون یول فقر تورور (اول) توبه تورور (ایکنچی)
 یازوق لار دین قایتماق تورور (اوچونچی) پشیمان لیغ تورور
 (تورتونچی) حیرت تورور (بیشنچی) مقام خارلیق و زارلیق
 تورور (آلتنچی) حق تعالی دین یاری تیلامیک تورور (یتنچی)
 یمان یول لار دین یانماق تورور (سکزنچی) خدای تعالی نینک
 ذکر ی برلان بولماق تورور (توقوزونچی) تفکر تورور (اونونچی)
 فنا بولماق تورور.

و اون اورون بار تورور فقر تورور حکمت تورور عدل
 تورور عقل تورور حلم تورور حیا تورور عزت تورور احسان

تورور ستارلیغ تورور امانت تورور تسلیم تورور شیخ شهاب
 الدین قدس الله سره ایدیلار درویشلیک کا بول قرق شرایطنی
 بیلمک کیراک آنداغ کشینی صوفی دیکایلار سلطان احمد کبرا
 ایدیلار یتمش اوچ ییل عمر کوردوم قرق ییل مسافرلیق برله
 بولدوم یتی ییل حج قیلدیم مینک مرتبه ختم قرآن قیلدیم یتمش
 مرتبه حضرت رسول صلی الله علیه و سلمنی توشومده کوردوم
 مبارک یوزلاری کا قراب بول قرق مقامنی منکا ایدیلار من عمل
 قیلما دیم حضرت واجب تعالی غه یتیشما دیم حضرت شیخ شهاب
 الدین رحمة الله علیه ایدیلار کیم بول قرق مقامنینک اونى
 شریعتده تورور و اون مقام طریقتده تورور و اونى مقام
 حقیقتده تورور و اونى مقام معرفتده تورور هر صوفی هر
 درویش هر فقیر کیم بول قرق مقامنی بیلمسه و عمل قیللمسه
 صوفی لیق شیخ لیق و فقیر لیق دعواسین قیلسه یلغان تورور و اکر
 صوفی غه بو دنیانینک نعمتنی تمام برسه لار کافرلار کا اشارت
 قیلسه کیراک و اکر عقبی نعمتنی و جنتنی تمام برسه لار
 مؤمنلار کا اشارت قیلسه کیراک محنت و رنج بلانی اوزیکا کورسه
 کیراک صوفی اکر خلوتده بولسه حق تعالی نینک ذکرى برلان
 بولسه کیراک و اکر خلق آراسیده بولسه شریعت درکاهی کا صبر
 قیلسه کیراک و هر وقتی که درمانده بولسه آنینک درکاهی کا صبر
 قیلسه کیراک صوفی حلال یمک دین توبه قیلسه کیرک الا بقدر
 ضرورت تا شبهه کا توشمکای و اکر صوفی دنیا نعمتنی تیللاسه
 صوفی ایمس و اکر دعا و زاری بلان بلا و محنت قیلسه صوفی
 تورور و شیخ لیق مقام مجاهده تورور و اهل دنیا بلندنی تیلار و
 اهل عقبی پستلکنی تیلار خار زار لیقنی تیلار و اکر صوفیکا بلا

کیلسه آه و آه دیمس و صبر قیلور و اکر صوفی نین نفسی نعمت
 آرزو قیلسه نفسنی آرزوسینی بیرمکای و اکر صوفی آچ بولسه و
 برهنه بولسه خوشنود بولغای و صبردین اوزکانی اختیار قیلماغای
 خوش تواضع لیق بولغای بول اون مقام شریعتده تورور و اون
 مقام طریقتده تورور تسلیم تورور یعنی اکر بلا و محنت باشیغه
 کیلسه اوزینی تسلیم کا جان و دل برلان سالغای ینه ایچمکدین و
 یمکدین کیمکدین خلقدین تیلامسون و کلیم پاره سینی
 اطلسدین زیاده کورسون کوندوز روزه کیچه نمازده بولسون و
 تلاوة قرآن برله بولسون اوقوب قرآن تلاوة قیلمغیل ترک نظم
 دیسنگ آخرده بولسون و اهل محبتدین اوزکانی ذکر قیلماسون و
 ینه اخلاص برله بولسون صوفی هر کیچه نماز تهجدنی ترک
 قیلماسون خوف و رجا ایچیده بولسون و اکر صوفی طاعتینی
 خلقغه ظاهر قیلسه ریا اوچون ایلک ییل لیق طاعتی نی ذره
 طعام کا ساتقای تنکری عز و جل کا شایسته بولماغای ینه صوفی
 یولغه راست لیق برلان قدم قویسه کیراک و راست سوزلاسه کیراک
 زیرا که کونکل تیل کا خبر بیرورینه صوفی نفسینی کویدوروب فنا
 قیلسه کیراک دنیا دین سوزلامسه کیراک حق تعالی نینگ یادی برلان
 خوش وقت بولسه کیراک و ینه صوفی پست لقای بولسه حق
 تعالی نی تابقای اکر اوتقه باقسه حقنی کورکای و اکر سوغه باقسه
 حقنی کورکای و اکر یوقاری باقسه حقنی کورکای و اکر قویی
 باقسه حقنی کورکای و اکر ایلکاری باقسه حقنی کورکای و اکر
 اولتورسه حقنی کورکای مشاهده کوزی برلان و ینه صوفی علم
 الیقین و عین الیقین مقامینی تابقای و اکر سر کوزی برلان یوقری
 باقسه عرشنی کورکای (و اکر) قویی باقسه یتی طبقه زمیننی تا

تحت الثرا پشت کا و ماهینی کورای و هیچ حجاب بولماغای و اکر حق الیقین کوزی برلان باقسه مخلوقات و مصنوعات دین کچیپ بی چون و بی چگونه حقنی کورکای و معرفتده برچه کونین عالمینی کورکای تانیق تورور بی شک و بی شبهه ینه صوفی دنیا و آخرتده آنینک همتی کا سیغمس برچه بهشتنینک نعمت لاری کوزیکا کورونمس ینه صوفی دیکان خدانینک شوقیده سودک بولوب ایریب آقسه کیراک کونکلنی حقنی رضاسیغه برسه کیراک فرزندیکا و مالیغا برمه کیراک ینه صوفی دیکاننی کوریده تابمغای لار و پل صراطده هم تابمغای لار و جنتده هم تابمغای لار حضرت واجب تعالی نینک قُربیده تابقایلار اکر صوفی ایتسه. ای بار خدایا برچه عاصی لارنی منکا باغیشلاغیل دیسه آنینک سوزینی حق تعالی رد قیلماغای و ینه صوفی تا حضرت حق تعالی دین ندا ایشیتسمه جانینی برمکای منکر و نکیر دین اندیشه قیلماغای قیامتنی اندیشه قیلماغای حور و قصورکا باقماغای تا ملک غفارنی کورمکونچه ینه صوفی اول بولور کیم برچه ایشلاردین کونکلی ساق بولسه نفس و شهوات دین صاف بولسه باطینی آفات دین صاف بولسه یوروشی صاف بولسه باطینی پوخته بولسه کوزی ایکی دنیادین دوخته بولسه سری افروخته بولسه بول ایتلکان سکسان مقام بولدی ای درویش هر بیر مقام بیر پیغمبرننک مقامی تورور اوّل حضرت آدم علیه السلام نینک و آخری محمد مصطفی صلی الله علیه و سلم نینک تورور سلطان المشایخ حضرت خواجه احمد یسوی رحمة الله علیه ایدیلار کیم یتمش علم آدابنی بیلیمکونچه یتمش مقام یولنی طی قلیب کیزمکونچه هر کیم شیخ لیق مقامی دعواسین قیلسه اول همان بت

بولغای شیخ سری سقطی رحمة الله علیه ایدیلار فقر بیر تاغ
 ایرور برچه کان لارنینک مکانی تورور شیخ المشایخ قدس الله
 تعالی ارواحه ایدیلار فقر بر دریای تورور اول دریانی پایانی یوق
 آنینک پایانی کشی کورکانی یوق بجز حضرت محمد مصطفی
 صلی الله علیه و آله و سلم سید الطائفة حضرت جنید بغدادی
 ایتورلار فقر بر پشته تورور احمد کبرا ایتور فقر نور خدا تورور هر
 کیم که اول نورنینک ضیاسی تیکسه آنینک ضیاسیدین کمال عشق
 تاپار شیخ احمد ایتور فقر بر تاج دولت تورور هر کیم باشیغه
 کیدنی ایکی جهانده سلطان ابدی بولدی شیخ شقیق بلخی رحمة
 الله علیه ایتور فقر بر اوت تورور هر کیم نینک کونکلیکا توشتی
 وجودی آلتون بولدی شیخ احمد جام ایتور فقر بر شراب تورور
 هر کشی جرعه نوش قیلدی تا قیامت غاچه مست لقای بولدی
 شیخ قطب الدین حیدر ایتور فقر جذبه خداوند ایرور هر کیم کا
 تیکسه ایکی جهانده مرادی حاصل بولدی خواجه عبدالله حیدر
 ایتور فقر هدایت ربنا تورور هر کیم که یول تابتی جاودانه
 سلطان لیغی نی تابتی شیخ منصور حلاج ایتور فقر دیدار حق تعالی
 تورور هر کیم کوردی کورمدی لقمان سرخسی ایتور فقر شه باز
 همت تورور هر کیم کا قوندی اول کشی عرش کا پرواز قیلدی تا
 لامکانی سیر قیلدی و مشایخ لار قولی مونداغ ایرور فقر حق
 تعالی نینک باغ وصلیدین درختی تورور اول درخت نینک بوتاغی
 عقل تورور ریشه سی هدایت تورور میوه سی خیر و سخاوت
 تورور سایه سی قناعت تورور آنینک بویی شوق تورور آنینک
 برکی هر کیم کا تیکدی عمل صالح حاصل قیلدی هر کیم
 میوه سیدین یدی حیات جاویدانه تابتی و اگر بویی هر کیم کا

تیکسه مست و حیران بولغای و اگر سایه سیده اورون آلسه آفتاب
 حقیقت آنکا توشقای ای درویش فقرنیک آلتی آدابی با تورور
 اول یخشی یمان سوزکا سکوت قیلماق و پیر آلدیده خاموش
 بولماق و بی اجازت پیر سوزلارممک و کشی برلان آچیغ بولماق و
 خاص عامنیک خدمتی نی قیلماق و نفسینی اولتورمک و هوا و
 هوس نی ترک قیلماق فقردین پاکیزه نرسه بولمس فقر غربت
 تورور آچ بولماق تورور و اگر آچ بولسه آنینک طهارتی و ذکر
 کونکل دین کیتمس و اگر توق بولسه فسادلار پیدا بولور فقر
 مقامی سکز تورور (اول) توبه تورور عبادت تورور مصبر تورور
 شکر تورور رضا تورور زهد تورور عارفلق تورور (اولی)
 حضرت آدم علیه السلام دین قالدی (عابدلیق) حضرت ادریس
 علیه السلام دین قالدی (شکر و محبت) حضرت ابراهیم علیه
 السلام دین قالدی (صابرلیق) حضرت ایوب علیه السلام دین
 قالدی (راضی لیق) حضرت موسی علیه السلام دین قالدی
 (زاهدلیق) حضرت عیسی علیه السلام دین قالدی (عارفلیق)
 حضرت محمد مصطفی صلی الله علیه و سلم دین قالدی فقر
 مرتبه سی یتی تورور جوانمردلیق تورور سپاهی لیق تورور خرقة
 تورور صبر تورور قناعت تورور شکر تورور توکل تورور جوان
 مردلیق حضرت علی دین قالدی سپاهی لیق حضرت سلیمان علیه
 السلام دین قالدی غربت لیق یحیی علیه السلام دین قالدی صبرلیق
 و رضالیق حضرت ایوب علیه السلام دین قالدی قناعت لیق
 حضرت محمد مصطفی صلی الله علیه و سلم دین قالدی هر
 درویش که بول یتی مقام درویش لیک نی بیللمسه یا بیللیب عمل
 قیللمسه شیخ لیق و مرید آماق آنکا حرام تورور ای درویش بوله

فقرنامه ده هر وصیتی که بتیلدی کلام ربانی و حدیث نبوی دین و
 اجماع امت دین بتیلدی هر طالب که بول وصیت لارکا عمل قیلیب
 استقامت قیلسه دنیا و عقبی آنکا میسر بولغای واکر عمله قیلسمه
 آخر دمیده جائی نی کوروب پشیمان قیلغای و شرمنده آخرت
 بولغای هر درویش بو قرق مقام نی بیلسمه و عمل قیلسمه آنینک
 شیخ لیغی شیطانی تورور اول مقام ملکوت ایکنچی مقام لاهوت
 اوچونچی مقام ناسوت تورتونچی مقام جبروت. مقام جبروت
 شریعت تورور مقام ملکوت طریقت تورور مقام لاهوت معرفت
 تورور مقام ناسوت حقیقت تورور.

(۱) حکمت

بسم الله ديب بيان ايلای حکمت ايتيب
طالب لارکا دُر و گوهر ساچتيم منا
رياضتني قاتيغ تارتيب قانلار يوتوب
مین دفتری ثانی سؤزین آچتیم منا
سوزنی ایدیم هر کیم بولسه دیدار طلب
جاننی جانغه پیوند قیلیب رکنی اولاب
غریب، یتیم فقیرلارنی کونکلین اولاب
کونکلی بوتون خلایق دین قاجتیم منا
قیده کورسنگ کونکلی سنوق مرهم بولغیل
انداغ مظلوم یولده بولسه همدم بولغیل
روز محشر درکاهی کا مَحْرَم بولغیل
ما و من لیک خلایق دین قاجتیم منا
غریب فقیر یتیملارنی رسول سوردی
اوشال تونی معراج چیقیب دیدار کوردی
قایتیب توشوب غریب، فقیر حالین سوردی
غریبلارنی ایزین ایزلاب توشوم منا
امت بولسنگ غریبلارغه تابع بولغیل
آیت حدیث هرکیم ایتسه سامع بولغیل
رزق روزی هر نه بیرسه قانع بولغیل
قانع بولوب شوق شراین ایچتیم منا

مدینه کا رسول باریب بولدی غریب
 غریب لیغده محنت تار تیب بولدی حبیب
 جفا تار تیب یراتقانغه بولدی قریب
 غریب بولوب عقبه لاردین آشتیم منا
 عاقل ایرسنک غریب لارین کونکلین آوله
 مصطفی دیک ایلنی کیزیب یتیم کاوله
 دنیا پرست ناجنس لاردین بویون تاوله
 بویون تاو لاب دریا بولوب تاشتیم منا
 عشق بابی نی مولیم آچقاچ منکا تیکدی
 تفراق قیلیب حاضر بولدی بونوم ایکدی
 باران صفت ملامت نی اوقی تیکدی
 پیکان آلیب یوراک بغرم تیشتم منا
 کونکلوم قاتیغ، تیلیم اچیغ، اوزوم ظالم
 قرآن اوقوب عمل قیلما یالغان عالم
 غریب جانیم صرف ایلا یین یوق تور مالیم
 حقدین قورقوب اوتقه توشما ی پشتیم منا
 آلتیش اوچکا یاشیم ینی او توم غافل
 حق امرینی محکم توتما ی اوزوم جاهل
 روزه - نماز قضا قیلیب بولدوم کاهل
 یمان ایزلاب یخشی لاردین کیچتیم منا
 واد دریغا محبت نی جامین ایچما ی
 اهل - عیال خانماندین توکال کیچما ی
 جرم و عصیان کره لارین مونده چیچما ی
 شیطان غالب جان برارده شاشتیم منا
 ایمانیمه چنکال اوروب قیلدی غمناک
 پیر مغان حاضر بولدیب ساچتی تریاک
 شیطان لعین مندین قاچیب کیتی بی پاک
 بحمد الله نور ایمان آچتیم منا

پير مغان خدمتیده يوكوروب يوردوم
 خدمت قىليب كوزوم يومماي حاضر توردوم
 مدد قىلدى عزازيلنى قۇلاب سوردوم
 آندين سونكره قنات قاقيب اوچتيم منا
 غريب فقير يتيملارنى قىلكيل شادمان
 حلقه لار قىليب عزيز جانينك ايلا قربان
 طعم تابسنك جانينك بيله قىلكيل مهمان
 حقدين ايشتيب بو سوزلارنى آيديم منا
 غريب - فقير يتيملارنى هر كم سورار
 راضى بولور اول بندهدين پروردگار
 اى بى خبر سن بير سبب اوزى اسرار
 حق مصطفى پندين ايشيت ايديم منا
 يتى ياشده ارسلان بابغه قىلديم سلام
 حق مصطفى امانتين قىلينك انعام
 اوشال وقتده مينك بير ذكرين قىلديم تمام
 نفسيم اولوب لامكانغه آشتيم منا
 خرما بيريب باشيم سلاب نظر قىلدى
 بير فرصتده عقبى سرى سفر قىلدى
 الوداع ديب بو عالمدين كذر قىلدى.
 مكتب باريب قيناب جوشوب تاشتيم منا
 "انا فتحنانى" اوقوب معنى سوردوم
 پرتو سالدى بيخود بولوب ديدار كوردوم
 ملام اوروب "اسكت" ديدى باقيب توردوم
 باشيم ساچيب مضطر بولوب تورديم منا
 ايا نادان معنى بولديب ايدى بيلديم
 آندين سونكره چوللار كزيب حقنى سوردوم
 روزى قىلدى عزازيلنى توتوب منديم
 لسكر توكوب بيلين باسيب يانچتيم منا

ذکرین تمام قلیب اوتوم دیوانه کا
 حقدین اوزکا هیچ سوزلامای بیکانه کا
 شمعین ایزلاب شاگرد کیردیم پروانه کا
 اخگر بولوب کویوب یانیب اوچتیم منا
 نام - نشان هیچ قالمدی لالا بولدوم
 الله یادین آیته - آیته الا بولدوم
 خالص بولوب مخلص بولوب لله بولدوم
 "فنا فی الله" مقامی غه آشتیم منا
 سنت ایرمیش کافر بولسه بیرمه آزار
 کونکلی قاتیغ دل آزاردین خدا بیزار
 الله حقی آنداغ قل غه سجین طیار
 دانالاردین ایشتیب بو سوز ایدیم منا
 سنتلارین محکم توتوب امت بولدوم
 یر آستیغه یالغوز کریب نورغه تولدوم
 حق پرستلار مقامی غه محرم بولدوم
 تیغ باطن برله نفسنی یانچتیم منا
 نفسیم منیم یولدین اوروب خوار ایلادی
 تیل مور توروب خلایق غه زار ایلادی
 ذکر ایتورمای شیطان برله یار ایلادی
 حاضر سن دیب نفس باشنی سانچتیم منا
 قل "خواجه احمد" غفلت بیله عمرونک اوتی
 وا حسرتا کوزدین تیزدین قوت کیتی
 وا ویلتا ندامتنی وقتی یتی
 عمل قیلمای کاروان بولوب کوچتیم منا

آیا دوستلار قولاق سالینک ایدوغوم کا
 نه سبب دین التمش اوچده کیردیم بیرکا
 معراج اوزره حق مصطفی روحوم کوردی
 اول سبب دین التمش اوچده کیردیم بیرکا
 حق مصطفی جبرئیل دین قیلدی سؤال
 بو نچوک روح تن غه کیرمای تابتی کمال
 کوزی یاشلیغ، حلقه باشلیغ قدی هلال
 اول سبب دین التمش اوچده کیردیم بیرکا
 جبریل ایدی امت ایشی سزکا بر حق
 کوککا چیقیب ملایک دین آلور سبق
 نالشی کا ناله قیلور هفتم طبق
 اول سبب دین التمش اوچده کیردیم بیرکا
 فرزندیم دیب حق مصطفی قیلدی کلام
 آندین سونکره برچه ارواح قیلدی سلام
 رحمت دریا تولوب تاش دیب یتى پیام
 اول سبب دین التمش اوچده کیردیم بیرکا
 رحم ایچره پیدا بولدوم ندا کیلدی
 ذکر ایت دیدی بدنلاریم جنبش قیلدی
 فرزندیم دیب حق مصطفی اولوش بردی
 اول سبب دین التمش اوچده کیردیم بیرکا
 تورت یوزیل دین کین چیقیب امت بولغای
 نیچه ییل لار یوروب خلقه یول کورکوزکای
 اون تورت مینک مجتهدلار خدمت قیلکای
 اول سبب دین التمش اوچده کیردیم بیرکا

توقوز آی توقوز كونده بيركا توشتوم
 توقوز ساعت تور آلمديم كوككا اوچتوم
 عرش - كرسى پايه سيني باريب قوچتوم
 اول سبدين آلميش اوچده كيرديم بيركا
 عرش اوستيده نماز اوقوب تيزيم بوكدوم
 رازيم آيتيب حقه باقيب ياشيم توكتوم
 بالغان عاشق، يالغان صوفى كوردوم سوكتوم
 اول سبدين آلميش اوچده كيرديم بيركا
 جاندين كيچماي "هو - هو" ديكان باري يالغان
 بو قلتاقدين سورمنك سؤال يولده قالغان
 حقنى تابقان اوزى پنهان، سوزى پنهان
 اول سبدين آلميش اوچده كيرديم بيركا
 بير ياشيمده ارواح منكا اولوش بيردى
 ايكي ياشده پيغمبرلار كيلىب كوردى
 اوچ ياشيمده چلتن كيلىب حاليم سوردى
 اول سبدين آلميش اوچده كيرديم بيركا
 تورت ياشيمده حق مصطفى بيردى خرما
 يول كورساتيم يولغه كيردى نيچه گمراه
 قيدده بارسم خضر بابام منكا همراه
 اول سبدين آلميش اوچده كيرديم بيركا
 بيش ياشيمده بيلم باغلاب طاعت قيلديم
 تطوع روزه توتوب عادت قيلديم
 كيچه - كوندز ذكرين ايتيب عادت قيلديم
 اول سبدين آلميش اوچده كيرديم بيركا
 آلتى ياشده تورماي قاچتيم خلايقدين
 كوككا چيقيب درس اوركانديم ملايك دين
 دامين كيسيب همه اهل علايقدين
 اول سبدين آلميش اوچده كيرديم بيركا

یتی یا شده آرسلان بابام ایزلاب تابتی
 هر سر کوروب پرده برله بوکوب یابتی
 بحمد الله کوردوم دیدی ایزیم اوبتی
 اول سببدین آلتیمیش اوچده کیردیم بیرکا
 قابض کیلیب آرسلان بابام جانین آلدی
 حورلار کیلیب حریر توندین کفن قیلدی
 يتمش منك فرشتهلار یغیلیب کیلدی
 اول سببدین آلتیمیش اوچده کیردیم بیرکا
 جنازه سین اوقوب ییردن کوتاردیلار
 بیر فرصته اوچماخ ایچره ییتکوردیلار
 روحین آلوب علیین کا کیرکوزدیلار
 اول سببدین آلتیمیش اوچده کیردیم بیرکا
 الله الله بیر آستیده وطن قیلدی
 منکر - نکیر "مَنْ رَبِّكَ" دیب سوروغ سوردی
 آرسلان بابام اسلامی دین بیان قیلدی
 اول سببدین آلتیمیش اوچده کیردیم بیرکا
 عاقل ایرسنک ایرانلارکا خدمت قیلغیل
 امر معروف قیلغانلارنی عزّت قیلغیل
 نهی منکر قیلغانلارنی حرمت قیلغیل
 اول سببدین آلتیمیش اوچده کیردیم بیرکا
 سیکزیمده سیکز یاندین یول آچیلدی
 حکمت ایت دیب باشلاریمغه نور ساچیلدی
 بحمدالله پیر مُغان می ایچوردی
 اول سببدین آلتیمیش اوچده کیردیم بیرکا
 پیر مُغان حق مصطفی بیشک بیلینک
 قیده بارسنک وصفین ایتیپ تعظیم قیلنک
 درود ایتیپ مصطفی غه امت بولینک
 اول سببدین آلتیمیش اوچده کیردیم بیرکا

توقوزومده تولغانمادیم توغری یولغه
 تبرک دیب آلیب یوردی قولدین قولغه
 قوانمادیم بو سوزلارکا قاجتیم چولکا
 اول سبیدین آلتیش اوچده کیردیم بیرکا
 اون یاشینکده اوغلان بولدونک قول "خواجه احمد"
 خواجه لیک کا بنا قویوب قیلمای طاعت
 خواجه مندیب یولده قالسنک وای نه حسرت
 اول سبیدین آلتیش اوچده کیردیم بیرکا

(۳)

حکمت

هر صبحدم ندا کیلدی قولاقیمغه
 ذکر ایت دیدی ذکرین ایتیپ یوردوم منا
 عشق سزلارنی کوردوم ایرسه یولده قالدی
 اول سبیدین عشق دوکانین قوردیم منا
 اون بیریمده رحمت دریا تولوب تاشتی
 الله دیدیم شیطان مندین یراق قاجتی
 های و هوس، ما و من لیک تورمای کوچتی
 اون ایکیمده بو سرلارنی کوردوم منا
 اون اوچومده نفس هوانی قولغه آلدیم
 نفس باشیغه یوز مینک بلا قارماب سالدیم
 تکبرنی آیاغ آستیده باسیب آلدیم
 اون تور تومده تفراق صفت بولدیم منا
 اون بیشیمده حور و غلمان قرشو کیلدی
 باشین اوروب قول قاوشوروب تعظیم قیلدی
 فردوس آتلیغ جنتی دین محضر کیلدی
 دیدار اوچون برچه سینی قویدیم منا

اون آلتيمده برچه ارواح اولوش بيردى
"هى - هى" سزكا مبارک ديب آدم کيلدى
فرزنديم ديب بوينوم قوچوب کونکلوم آلدی
اون يتيمده ترکستانده توردیم منا
اون سيکزده چلتن بيله شراب ايچتيم
ذکرين ايتيب حاضر توروب کوکسون تيشتيم
روزی قيلدی جنت کزيب حورلار قوچتيم
حق مصطفى جمال لارين کوردیم منا
اون توقوزده ييتميش مقام ظاهر بولدی
ذکرين ايتيب ايچ و تاشيم ظاهر بولدی
قايده بارسام خضر بابام حاضر بولدی
"غوٹ الغياث" می ايچوردی تويدیم منا
ياشيم ييتي يکرمی کا اوتدیم مقام
بحمدالله پير خدمتين قيلدیم تمام
دنياده کی قورت قوشلار قيلدی سلام
اول سبیدین حقه ياقو بولدیم منا
مؤمن ایرمس حکمت ايشتيب يغلامای دور
ايرانلارنى ایتغان سوزین تينکلامای دور
آیت حدیث کویا قرآن آنکلامای دور
بول روایت عرش اوستیده کوردیم منا
روایت نی کوروب حقه سوزلاشتیم من
يوز مينک تورلوک ملایک کا يوزلاشتیم من
اول سبیدین حقنى سوزلاب ايزلاشتیم من
جان و دلیم انکا فدا قيلدیم منا
قول "خواجه احمد" ياشينک ييتي يکرمی بر
نه قيلغای سین کنادهلارينک تاغدين آغر
قيامت کون غضب قيلسه ربم قادر
ايا دوستلار نچوک جواب ايغوم منا

(۴)

حکمت

خوش غایب دین قولاغیم غه الهام کیلدی
اول سبیدین حقه سیغنیب کیلدیم منا
جمله بزرک یغیلیب منکا انعام بیردی
اول سبیدین حقه سیغنیب کیلدیم منا
من یکرمه ایکی یاشده فنا بولدوم
مرهم بولوب چین دردلیک کا دوا بولدوم
یالغان عاشق چین عاشق غه کواه بولدوم
اول سبیدین حقه سیغنیب کیلدیم منا
ایا دوستلار یاشیم یتی ایکرمه اوج
یالغان دعوی طاعتلاریم برچه سی پوج
قیامت کون نه قیلغایمن برهنه لوج
اول سبیدین حقه سیغنیب کیلدیم منا
من یکرمی توتقه کیردیم حق دین یراق
آخرتقه بارور بولسم بارمو یراق
اولکانیمده یغیلیب اورونک یوزمینک تیاق
اول سبیدین حقه سیغنیب کیلدیم منا
جنازم نی آرقاسیدین تاشلار آتینک
ایاقیمدین توتوب سودراب کورکا ایلتینک
حقه قوللوق قیلمدینک دیب یانجیب تیغینک
اول سبیدین حقه سیغنیب کیلدیم منا
یازوق بیلان یاشیم یتی ایکرمه بیش
سبحان ایکام ذکر اورکاتیب کوکسومنی تیش
کوکسومده کی کرهلاریم سین اوزونک یش
اول سبیدین حقه سیغنیب کیلدیم منا من

من ايكرمى آلتى ياشده سودا قيلديم
 منصور صفت ديدار اوچون غوغا قيلديم
 پيرسيز يوروب درد و حالت پيدا قيلديم
 اول سبدين حقه سيغنيب كildيم منا
 من يكرمه يتى ياشده پيرنى تابتم
 هر سر كوردوم پرده برله بوكوب يافتيم
 آستانه سين ياستانبان ايزين اوبتم
 اول سبدين حقه سيغنيب كildيم منا
 من ايكرمى سكيز ياشده عاشق بولدوم
 كيچه ياتماي محنت تارتيب صادق بولدوم
 آندين سونكره دركاهي كا لايق بولدوم
 اول سبدين حقه سيغنيب كildيم منا
 بر كم اوتوز ياشقه كيرديم حاليم خراب
 عشق اوتيده بولالمديم مثل تراب
 حاليم خراب بغيريم كباب كوزوم پر آب
 اول سبدين حقه سيغنيب كildيم منا
 اوتوز ياشده اوتون قيليب كويدورديلار
 جمله بزرگ يغليب دنيا قويدورديلار
 اوروب سوکوب دنيا آعقبن قويدورديلار
 اول سبدين حقه سيغنيب كildيم منا
 قول "خواجه احمد" دنيا قويسنك ايشينك بتار
 كوكسونداكى چيقان آهينك عرشقه يتار
 جان برارده حق مصطفى قولونك توتار
 اول سبدين حقه سيغنيب كildيم منا

(۵)

حکمت

یا الهیم حمدینک برله حکمت ایتیم
ذاتی اولوغ خواجه سیغنیب کیلدیم سنکا
توبه قیلیب گناهیمدین قورقوب قایتیم
ذاتی اولوغ خواجه سیغنیب کیلدیم سنکا
قرق بیریمده اخلاص قیلدیم یول تاپای دیب
ایرانلاردین هر سر کورسم من یاپای دیب
پیر مُغان ایزین آلیب من اوپای دیب
ذاتی اولوغ خواجه سیغنیب کیلدیم سنکا
قرق ایکیمده طالب بولوب یولغه کیردیم
اخلاص قیلیب یالغوز حقه کونکل بیردیم
عرشی - کرسی لوح دین اوتوب قلم کیزدیم
ذاتی اولوغ خواجه سیغنیب کیلدیم سنکا
قرق اوچومده حقنی ایزلاب ناله قیلدیم
کوز یاشیمنی آقوزوبان ژاله قیلدیم
بیابانلار کیزیب اوزوم واله قیلدیم
ذاتی اولوغ خواجه سیغنیب کیلدیم سنکا
قرق تور تومده محبتنی بازارینده
یقام توتوب یغلاب یوردوم کلزارینده
منصور صفت باشیم بیریب عشق دارینده
ذاتی اولوغ خواجه سیغنیب کیلدیم سنکا
قرق بیشیمده سندین حاجت تیلاب کیلدیم
توبه قیلدیم هر ایش قیلدیم خطا قیلدیم
یا الهیم رحمتینکنی اولوغ بیلدیم
ذاتی اولوغ خواجه سیغنیب کیلدیم سنکا

قرق آلتیمده ذوق و شوقیم تولوب تاشتی
 رحمتینکدین قطره تامدی شیطان قاچتی
 حقدین الهام رفیق بولوب بابین آچتی
 ذاتی اولوغ خواجم سیغنیب کیلدیم سنکا
 قرق یتیمده یتی یاقدین الهام یتی
 ساقی بولوب جام شراب خواجم توتی
 شیطان کیلیب نفس هوانی اوزی یوتی
 ذاتی اولوغ خواجم سیغنیب کیلدیم سنکا
 قرق سکزده عزیز جاندین بیزار بولدوم
 کنه دردی کسل قیلدی بیمار بولدوم
 اول سبیدین حقدین قورقوب بیدار بولدوم
 ذاتی اولوغ خواجم سیغنیب کیلدیم سنکا
 قرق توقزده عشقینک توشدی کویوب یاندیم
 مجنون صفت خیل خویشدین قاجیب تاندیم
 تورلوك - تورلوك جفا تیکدی بویون سوندوم
 ذاتی اولوغ خواجم سیغنیب کیلدیم سنکا
 ایلیکیمده ایرمن دیدیم فعلیم ضعیف
 قان توکمادیم کوزلاریمدین بغریم ایزیب
 نفسیم اوچون یورار ایردیم ایتدک کزیب
 ذاتی اولوغ خواجم سیغنیب کیلدیم سنکا
 قول "خواجه احمد" ایر بولمسنک اولکان یخشی
 قزیل یوزونک قرا بیرده سولغان یخشی
 توفراق صفت بیر آستیده بولغان یخشی
 ذاتی اولوغ خواجم سیغنیب کیلدیم سنکا

(۶)

حکمت

صبح صادق دوشنبه کون بیرکا کیردیم
مصطفی کا ماتم توتوب کیردیم منا
آلتیمش اوجده سنت دیدی ایشتیب بیلدیم
مصطفی غه ماتم توتوب کیردیم منا
بیر اوستیده یارانلاریم ماتم توتی
عالم همه سلطانیم دیب نعره تارتی
حقنی تابقان چین صوفی لار قانلاری یوتی
مصطفی غه ماتم توتوب کیردیم منا
الوداع دیب بیر آستیغه قدم قویدوم
یاروق دنیا حرام قلیب حقنی سویدوم
ذکرین ایتیب یالغوز اولوب یالغوز کویدوم
مصطفی غه ماتم توتوب کیردیم منا
طه اوقوب تون کیچه لار قایم بولدوم
کیچه نماز کوندوزلاری صایم بولدوم
بو حال برله بیر آستیده دایم بولدوم
مصطفی غه ماتم توتوب کیردیم منا
آلتیمش کیچه، آلتیمش کوندوز بیر یول طعام
تانک آتقونچه نماز اوقوب بیر یول سلام
آلتیمش اوجده بولدی عمریم آخر تمام
مصطفی غه ماتم توتوب کیردیم منا
حق مصطفی روحی کیلیب بولدی امام
جمله ملک بیر آستیده بولدی غلام
کوب یغلادیم حق مصطفی بیردی انعام
مصطفی غه ماتم توتوب کیردیم منا

معراج تونی نوردیدم فرزند دیدی
 قولوم توتوب امتیم سین امت دیدی
 سنتیم نی محکم توتقیل دلبد دیدی
 مصطفی غه ماتم توتوب کیردیم منا
 قیامت ده یول آداشسنگ یولغه سالای
 محمد دیب تشنه بولسنگ قولونک آلائی
 فرزندیم ایلکینک توتوب جنت کرای
 مصطفی غه ماتم توتوب کیردیم منا
 ای یارانلار بو سوز ایشتیپ شوقیم آرتدی
 امت دیدی ایچ و تاشیم نورکا باتدی
 پرتو سالیب دیدارینی حق کورساتدی
 مصطفی غه ماتم توتوب کیردیم منا
 دیدار کوروب روحوم اوجوب عرشقه قوندی
 موسی صفت وجودلاریم کویوب یاندی
 مجنون صفت خیل خویش دین قاجیب تاندی
 مصطفی غه ماتم توتوب کیردیم منا
 بیر آستیده خوارلیغ تارتیم کوب مشقت
 توشک - یاستوق تاشدین قیلیب چیکتیم محنت
 ای یارانلار بو ذنیاده یوق فراغت
 مصطفی غه ماتم توتوب کیردیم منا
 تا مشقت تارتماغونچه وصلی قیدا
 خدمت قیلمای درد حالت بولمس پیدا
 جان و دلنی تا قیلمسنگ حقه شیدا
 مصطفی غه ماتم توتوب کیردیم منا
 بیر آستیغه کیردیم ایرسه بیخود بولدوم
 کوزوم آجیب مصطفی نی حاضر کوردوم
 عاصی، جافی امت لارنی حالین سوردوم
 مصطفی غه ماتم توتوب کیردیم منا

ایا فرزند مندین سورسنبك قنى امت
امت دیدی کوکسوم توله داغ حسرت
امت اوچن كوب تارته من حقدین کلفت
مصطفی غه ماتم توتوب کیردیم منا
امت لاریم یازوقلارین هر جمعه کیچ
آلیب کیلکای یا محمد سن مونی جیج
تا کی یغلاب سجده ایلای تنکریغه کیچ
مصطفی غه ماتم توتوب کیردیم منا
هر جمعه کیچ امت لارنی کناهی نی
آلیب کیلکای یا محمد کورکیل مونی
امت لارینك نیلار قیلور احمد سنی
مصطفی غه ماتم توتوب کیردیم منا
من ملک دین شرم آلور من ای امتیم
یراتقاندین قورقمس موسین پست همتمیم
کیچه یاتمای طاعت قیلسنك خوش دولتمیم
مصطفی غه ماتم توتوب کیردیم منا
بیر آستیغه کیردیم دوستلار بی اختیار
امین دینکلار آل اصحاب هم چهار یار
امت لارنی جرمین کیچکیل پروردگار
مصطفی غه ماتم توتوب کیردیم منا
قول "خواجه احمد" من دفتری ثانی ایتیم
ایکی عالم عشرت لارین می کا ساتیم
اولماس بورون جان اجیغین زهرین تاتیم
مصطفی غه ماتم توتوب کیردیم منا

اول قادیریم قدرت برلان نظر قیلدی
 خرم بولوب ییر آستیغه کیردیم منا
 غریب بندهنک بو دنیا دین سفر قیلدی
 محرم بولوب ییر آستیغه کیردیم منا
 ذاکر بولوب. شاکر بولوب حقنی تابتیم
 دنیا عقبی حرام قیلیب ینجیب تیغتیم
 شیدا بولوب. رسوا بولوب جان دین اوتیم
 بی غم بولوب ییر آستیغه کیردیم منا
 شوملو غوم دین تاغ - تاشلار سوکتی منی
 فصیح تیلده سوکوب ایدی تحفک قانی
 عاشق بولسنک اول باریب حقنی تانی
 مرهم بولوب ییر آستیغه کیردیم منا
 سیزنی، بیزنی حق یراتی طاعت اوچون
 ای بوالعجب ایچمک - ییمک راحت اوچون
 "قالوا بلی" دیدی روحوم محنت اوچون
 ادهم بولوب ییر آستیغه کیردیم منا
 نفسیم منی کوب یوکورتی حقه باقمای
 کیچه - کوندوز بی غم یوردوم یاشیم آقمای
 هوا - هوس، ما و مننی اوتقه یاقمای
 پرغم بولوب ییر آستیغه کیردیم منا
 قولنی کورسم قولی بولوب خدمت قیلسام
 تفراق صفت یول اوستیده یولی بولسام
 عاشق لارنی کویوب اوجکان کولی بولسام
 همدم بولوب ییر آستیغه کیردیم منا

جاندين كيچيب محنت تارتيم بئندم ديدى
 قانلار يوتوب الله ديديم رحم ايلادى
 دوزخ ايچره قالمسون ديب غميم ىدى
 خرم بولوب يير آستيغه كيرديم منا
 ياشيم يتى آلتيمش اوجكا بر كونچه يوق
 وا دريغا حقنى تابماي كونكلوم سنوق
 يير اوستيده سلطان من ديب بولدوم اولوق
 شاكِر بولوب يير آستيغه كيرديم منا
 شيخ من ديبان دعوى قىليب يولده قالديم
 فُش دستار پوجك پلغه ساتيب كيلديم
 نفسيم منى هوا قىلدى يولده قالديم
 بيدم بولوب يير آستيغه كيرديم منا
 باشيم تفرارق، اوزوم تفرارق، جسميم تفرارق
 حق وصلى كايتار من ديب روحوم مشتاق
 كويديم، يانديم، بولالماديم هرگز آفاق
 شبنم بولوب يير آستيغه كيرديم منا
 پير مُغان نظر قىلدى شراب ايچتيم
 شبلى ينكليغ سماع اوروب جاندين كيچتيم
 سرمست بولوب ايل خلقدين تانيب قاجتيم
 زمزم بولوب يير آستيغه كيرديم منا
 قول "خواجه احمد" ناصح بولسك اوزونك كا بول
 عاشق بولسك جاندين كيچيب بر يولى اول
 نادانلاركا ايسك سوزونك قيلمس قبول
 محكم بولوب يير آستيغه كيرديم منا

(۸)

حکمت

بیشک بیلنک بو دنیا برچه خلقدین اوتارا
اینانمکیل مالینکا بر کون قولدین کیتارا
آتا - آنا قرینداش قیان کیتی فکر قیل
تورت آیاغلیغ چوبین آط [آت] برکون سنکا یتارا
دنیا اوچون غم یمه حققدین اوزکانی دیمه
کشی مالی نی یمه صراط اوزرد توتارا
اهل - عیال، قرینداش هیچکیم بولمایدور یولداش
مردانه بول غریب باش عمرینک یلدیك اوتارا
قول "خواجه احمد" طاعت قیل عمرین بیلما نچه ییل
اصلینک بیلسنک آب - کل [گل] ینه کل کا کیتارا

(۹)

حکمت

ایا دوستلار پاك عشقنی قولغه آلدیم
بو دنیانی دشمن توتوب یوردوم منا
یقام توتوب حضرتیغه سغنیب کیلدیم
عشق بابی ده منصور صفت بولدوم منا
عشق یولیده عاشق بولوب منصور اوتی
بیلین باغلاب حق عشقنی محکم توتی
ملامت لار، اهانت لار کوب ایشتی
ای مؤمنلار من هم منصور بولدوم منا
عاشق منصور انا الحقنی تیل کا آلدی
جبریل کیلیب انا الحقنی بیرکا ایدی
جبریل کیلیب باشنک بیر دیب یولغه سالدی
دارکا آسیلیب دیدارینی کوردوم منا

منصور کیلکاچ دار ایکیلیب اوزی آلدی
باطن کوزی آجوقلاری حیران قالدی
پرتو سالیب الله اوزی نظر قیلدی
مناشوقا دیب دیدارینی کوردوم مناشوقا
ندا کیلدی اوشل دارغه کوب بوغماغیل
محکم تورغیل، هریان باقیب سن اغماغیل
تاشقه ایدی امریم توتوب سین تیکما کیل
لوح المحفوظ تخته سیده کوردوم مناشوقا
اوج یوز ملا یغیلیب بتی کوب روایت
شریعت دور من هم بتای بیر روایت
طریقت ده. حقیقت ده حق حمایت
باشیم بیریب حق سرینی بیلدیم مناشوقا
انا الحقنی معنی سنی بیلماس نادان
دانا کیراک بو یوللارده پاک مردان
عاقل قوللار حق یادینی ایدی جانان
جاندین کیچیپ جانانه نی سدیدوم مناشوقا
ایما قیلدیم دانا بولسه معنی آلسون
قال علمیدین بتیب ایدیم نشان قالسون
ذر و کوهر سوزلاریمنی ایچکا سالسون
خالدین ایتیب عاشقلارغه بیردیم مناشوقا
ایسیز منصور خوارلیق برله بولدی ادا
بر سوز برله یارانلاردین بولدی جدا
حال دلین هیچکیم بیلمس تنکریم کوا
قانلار یوتوب من هم کوا بولدوم مناشوقا
شاه منصورنی انا الحقی بیجا ایمس
یولنی تابقان بیزکا اوخشاش کمراد ایمس
هر ناجنس لار بو سوزلاردین اکاه ایمس
آکاه بولوب بوی خدا آلدیم مناشوقا

بیر تون سحر غریب منصور کوب یغلادی
 پرتو سالیب الله اوزی رحم ایلادی
 آندین سونکره چلتن باقب شراب بیردی
 دانا لارغه بو سوزلارنی ایدیم منا
 نادان لارکا ایسیز سوزوم حیق حکمت
 آدم من دیب بیلین باغلار قانی همت
 دنیا اوچون بر - بریغه قیلما س شفقت
 ظالم لارکا اسیر بولوب اولدیم منا
 ظالم لارده حدنه بولغای بیژده کنه
 درویش لارنی حلقی مردار اوتمس دعا
 اول سبب دین پادشاه قیلور بیزکا جفا
 آیت - حدیث معنی سیدین ایدیم منا
 ظالم اکر جفا قیلسه الله دیکیل
 ایلکینک آجیب دعا ایلاب بویون سونکیل
 حق دادینک کا یتمس بولسه کله قیلکیل
 حقدین ایشتیب بو سوزلارنی ایدیم منا
 ظالم اکر ظلم ایلاسه منکا یغلا
 یاشینک ساجیب منکا سغنیب بیلینک باغلا
 حرام شبهه ترک ایتیبان یورک داغلا
 ظالم لارکا یوز مینک بلا بیردیم منا
 ظالم لارنی قریبی نیدور من یراتقان
 یراتقاننی منظور قیلما ی سن اونوتقان
 مندین کیچیپ ظالم لارنی ایلکین توتقان
 ظالم لارکا اوزوم رواج بیردیم منا
 سنکا جزا یراتقانغه یالبارمادینک
 الله دیبان تونلار توروب اینکرانمادینک
 حقیقت دین سوزلار ایتیم ایشتمادینک
 ظالم لارنی ایلکیلن اوزون قیلدیم منا

ای بی خبر حقه کونکل یوکورتما دینک
 دنیا حرام آندین کونکل ساووتما دینک
 نفس دین کیچیب الله سری تولغانما دینک
 بو نفس اوچون زار حیران بولدیم منا
 ظالم لارنی شکوه قیلمه ظالم اوزونک
 خویونک ریا تأثیر قیلمس خلقه سوزونک
 دنیا مالین تولا بیردیم تویمس کوزونک
 حریص لارنی سچین ایچره سالدیم منا
 لعل لبی جنبش قیلیب ایدی سنی
 جان دلیم امت لاریم کوز روشنی
 حقه قوللوق منکا امت بولغان قنی
 چین امتنی سینه سیغه قویدیم منا
 قول "خواجه احمد" حق سوزینی سوزلاب اونی
 عین الیقین طریقتده بوزلاب اوتی
 علم الیقین شریعتنی سوزلاب اوتی
 حق الیقین حقیقت دین ایدیم منا

(۱۰)

حکمت

تعالی الله عاشق لارکا بیردی عشقین
 شاکر بولوب اورتاب یانیب کویدوم منا
 ایکی عالم کوزلاریمغه خشخاش دانه
 کورونمدی یالغوز حقنی سویدیم منا
 جان دین کیچیب یالغوز حقنی جانغه قوشتوم
 اندین سونکره دریا بولوب تولوب تاشتیم
 لامکاننی سیر ایتیپان مقام آشتیم
 دنیا عقبین یوز مینک طلاق قویدیم منا

حق آلدیده عقل کامل دم اورالماس
 عشق شدتی طغیان قیلسه بیر دم تورماس
 پروانه دیک اخکر بولور اوزین بيلماس
 بو سرلارنی جانانه دین تویدیم منا
 طریقتنی یوللارینی عقبه سی کوب
 پاک عشقنی قولغه آلمای بولماس یوروب
 دیدارینی کورسه بولماس - تون کون اویوب
 هیچ اوخلامای دیدارینی کوردوم منا
 طریقتنی یولی قاتیغ طرفه شاشتیم
 باشیم قاتی پیر مغان سری قاجتیم
 پیر ایتاکی توتوب باطن کوزین آجتیم
 رسوا بولوب یوللار کزیب یوردوم منا
 طریقتنی یوللاریدور قاتیغ عذاب
 بو یوللارده نیچه عاشق بولدی تراب
 عشق یولغه هر کیم کیرسه حالی خراب
 ایرانلاردین یولنی سوراب یوردیم منا
 طریقتنی یوللاریدور طرفه اولوغ
 روزی قیلکان بنده سیغه بولغای یاوغ
 اوچقونی غه طاقت قیلمس یتی تموغ
 ای یارانلار عزیز جان دین تویدیم منا
 حقیقتنی معنی سی کا یتکان کشی
 بیخود بولوب کویوب یانار ایچی - تاشی
 قانلار آقار کوزلاریدین آقان یاشی
 کوز یاشیمنی تحفه قیلیب باردیم منا
 شریعت دور عاشق لارنی افسانه سی
 عارف عاشق طریقتنی دردانه سی
 قیده بارسه جانانه سی، همخانه سی
 بو سرلارنی عرش اوستیده کوردوم منا

محبتنی باغین کیزمای عاشق بولمس
 خوارلیق - زارلیق تارتما کونجه نفسینک اولمس
 بیر قطردغه قانع بولمای اول ذر بولمس
 قانع بولوب خاص کوهرین آلدیم منا
 عشق اوتیغه کویکان عاشق رنکی اوجار
 عقبی سری جدل قیلیب موندین کوجار
 مونده بولغان کره لارنی آنده آچار
 رسول دنیا جیفه دیدی قویدوم منا
 حقیقت لیک عاشق لارنی رنکی سینوق
 آینه غه نظر قیلسه آندین تانوق
 اوزی حیران، کونکلی ویران، کوزی یاشلوق
 قدرتیغه حیران بولوب قالدیم منا
 الله ایدی کوب یغلاسنک کوکونک منی
 زاری قیلسنک بندم دیبان ایغوم سنی
 جاندین کیچیب منی استار عاشق قنی
 الهام کیلدی چین قولاققه آلدیم منا
 چین کونکلده کویکانلارکا دیدار عطا
 یلغان عاشق یولغه کیرسه همه خطا
 چین عاشقنی کوزی یاشلیغ قدی دوتا
 دوتا بولوب بیر آستیغه کیردیم منا
 حقیقت لیغ چین عاشق غه تحفه بیرکوم
 روز محشر نجوگ سن دیب حالین سورکوم
 شفیع بولوب شفاعتنی اوزوم قیلغوم
 رحمتینکدین امید توتوب کیلدیم منا
 قول "خواجه احمد" حق یادینی آیغیل مدام
 حقدین قورقوب تینمای یغلا علی الدوام
 نماز اوقوب روزه توتوب هر صبح شام
 مونداغ قیلیب مردایمغه یتیم منا

رحیم مولیم رحمی برله یاد ایلاسه
 نه یوز برله حضرتی غه بارغوم منا
 توبه قیلیب ایکری یولدین راست غه قایتیب
 نه یوز برله حضرتی غه بارغوم منا
 حق بنده سین نامه لارین قولغه برسه
 حق الهیم رحمی برله رحمت قیلسه
 پیر مغان هادی بولوب یولغه سالسه
 نه یوز برله حضرتی غه بارغوم منا
 بر کون بولوب اجل وقتی یاوق یتسه
 سنکا - منکا اصل وطن حکمین ایتسه
 اولمای توروب جان اچیغین زهرین تاتسه
 نه یوز برلان حضرتی غه بارغوم منا
 سرداش بولغان همرا دلارینک شائب کیتی
 جدل قیلیب عقبه لاردین آشیب کیتی
 جار ضرب اوروب دریالاردیک تاشیب کیتی
 نه یوز برله حضرتی غه بارغوم منا
 وا ویلتا کیچه کوندوز قیلمای طاعت
 حق رسول امت اوچون یمای نعمت
 ایچمیش یمیش نعمت لاری قیغو محنت
 نه یوز برلان حضرتی غه بارغوم منا
 حق رسول دنیا اوچون قیغورمدی
 امت تیلاب اوزکا سوزکا دم اورمدی
 دنیا ایچره لحظه آرام اول کورمدی
 نه یوز برلان حضرتی غه بارغوم منا

وا دریغا محشر کونی ظاهر بولسه
 تنکری اوزی قاضی بولوب ناظر بولسه
 یمان ایشیم قیلم^۲شلاریم حاضر بولسه
 نه یوز برلان حضرتیغه بارغوم منا
 کیچه کوندوز تینمای یغلا قول "خواجه احمد"
 درود ایتیپ حق رسولغه بولغیل امت
 هادی بولوب امت دیسه خوش سعادت
 نه یوز برلان حضرتیغه بارغوم منا

(۱۲)

حکمت

خداوندا منی سالغیل اوز یولونک کا
 نفس ایلکیده هارب ادا بولدیم منا
 فسق، فجور تولوب تاشیب حددین آشتی
 غرقاب بولوب عصیان ایچره قالدیم منا
 دنیا نجس طالب بولوب ایتدیک یوردیم
 استاب آنی آرقاسیدین تون - کون قودیم
 امرین توتمای حق یولیغه کوزم یومدیم
 قایده بارای ایا دوستلار نیتکوم منا
 نفس شیطان اسیر قیلدی آدم اوغلین
 شترلایین باغلاب آلدی ایکی قولین
 نه مشکل دور اونک و سولنی بیلمای یولین
 وا دریغا حسرت بیلان بارغوم منا
 یوق منیندیک شوم بلا عالم ارا
 هیچ بولمدی مندین رضا خلق خدا
 ایمدی بولدی آخر منی یوزوم قرا
 وا ویلتا اول ینکا بولدیم منا

نادانلارنى مندىن سورمه كوكسوم جقه
 حقدىن قورقوب ماتم قورسم كولار قهقه
 آغزى آچوق نفسى اولوق مثل لقه
 نادانلاردىن قورقوب سنكا كىلدىم منا
 طمع قىلمه نادانلاردىن قدرىنك بىلمس
 ظلمت ايچره يول داشسنىك يولغه سالمس
 بوينونك قشيب زارى قىلسنىك قولونك آلمس
 نادانلارنى شكوه ايلاب كىلدىم منا
 اول آخر خوبلار كىتى قالدىم يالغوز
 نادانلاردىن ايستىمادىم بير يىخشى سوز
 دانا كىتى نادان قالدى يدىم افسوز
 يولدىن تابماي حيران بولوب قالدىم منا
 داغ هجران ايزدى بغيرىم قانى دردمند
 دانا تفراق نادانلارنى كوكسى بلند
 آيت حديث بيان قىلسام قىلمس پسند
 كوكسوم تيشىنىك درد و غم كاتولدىم منا
 درد و حالت طغيان قىلدى بارمو طيب
 عرض حالىم سنكا ايتاي يالغوز حبيب
 برچه طالب اولوش آلدى من بى نصيب
 اولوش استاب دوتا بولوب كىلدىم منا
 خانمانىنىك ترك ايلابان اولوش آلكىل
 اى بى خبر دنيا ايشىن آرقه سالكىل
 الله سىخى لطفىن كوروب حيران قالكىل
 كورار من دىب فنا بولوب كىلدىم منا
 من دفترى ثانى ايدىم سزكا يادكار
 ارواحىم دىن مدد تىلاب اوقونك زىنهار
 دعا قىلاي واصل قىلسون پروردگار
 رحمن ايكام عرض ايتكالى كىلدىم منا

حکمتیم دین بهره آغان کوزکا سورسون
 اخلاص برلان کوزکا سورتوب دیدار کورسون
 شرطی اولدور ریاضت غه بویون سونسون
 جانلار چیکیب جانانه نی کوردیم منا
 دیدار اوچون کدا بولدیم امین دینکلار
 ای طالبلار حالیم کوروب غمیم ینکلار
 یولده قالغان قول "احمدکا" یول برینکلار
 یولنی ایزلاب کدا بولوب کیلیم منا
 قول "خواجه احمد" کدا بولسنگ حقه بولکیل
 باشینگ برله ایرانلارکا خدمت قیلکیل
 نظر تابسنگ حلقه قوروب صحبت قیلکیل
 حلقه ایچره آکاه بولوب توردوم منا

(۱۴)

حکمت

کونکل کوزی یاروتماين طاعت قیلسه
 درکاهی کا مقبول ایمس بیلیم منا
 حقیقت ده بو سوزلارنی پاک اورکانب
 لامکانده حق دین سبق آلدیم منا
 بیر و باریم سبق بیردی پرده آچیب
 ییر و کوکده تورالمادی شیطان قاچیب
 عشرت قیلیب و حُدت می دین تويا ایچیب
 لامکانده حق دین سبق آلدیم منا
 مونده جفا چیکانلارغه دیداری تخت
 روز محشر عطا قیلکای هم تخت بخت
 یراتقاندۀ قیلکان اوزی عاشقه عهد
 لامکانده حق دین سبق آلدیم منا

كوزلار يميدين قانلار توكوب ياد ايتمديم
 يوزمينك تورلوك محنت سالدېنك داد ايتمديم
 سندن قورقوب خسته كونكلوم شاد ايتمديم
 لاماكانده حق دين سبق آلدېم منا
 الله دردى ساتقون ايرمس ساتيب آلسنك
 پير مغان خدمتيده خاك بولمسنك
 حق يوليغه كيريب بولمس پاك بولمسنك
 لاماكانده حق دين سبق آلدېم منا
 عشق پادشاه عاشق فقير دم اورالمس
 حق دين رخصت بولمكونجه سوزلا يالمس
 حق پنديني آغان دنيا ايزلا يالمس
 لاماكانده حق دين سبق آلدېم منا
 قول "خواجه احمد" ييتي ياشده سبق آلدېم
 سيكزيমে دنيا عقبين طلاق قويديم
 توقوزومده خدايم ني حاضر بيلديم
 لاماكانده حق دين سبق آلدېم منا

(۱۵)

حکمت

رحمتينكدين نوميد قيلمه من غريب ني
 آرام آلماي ييغلاب دعا قيلاي سنكا
 كيچهلار بيدار بولوب تانك آتقونچه
 يومماي كوزني ييغلاب دعا قيلاي سنكا
 دركاهنك كا ايمدي كيليب بيليم باغلاب
 جان كويدوروب يورك بغريم توتوب داغلاب
 يقام توتوب اوتكان ايشكا چندان ييغلاب
 اخلاص بيلان ييغلاب دعا قيلاي سنكا

کونکل باغی سبز ایکانده بیلمای یوردوم
 عمریم کلی خزان بولدی ایمدی تویدوم
 دنیا تاشلاب دین یولیغه قدم قویدوم
 هزار داستان ییغلاب دعا قیلای سنکا
 بو یول لارده جان نی اسراب بولمس ایرمش
 جان اسراغان بو یول لارکا کیرمس ایرمش
 سود و زیان بولغان نی بیلمس ایرمش
 بو حال برلان ییغلاب دعا قیلای سنکا
 قول "خواجه احمد" نفس تاغی دین چقیب آستی
 "فنا فی الله" مقامی غه یاوقلاشتی
 یورک بغریم جوش اوروبان قیناب تاشتی
 بو حال برلان ییغلاب دعا قیلای سنکا

(۱۶)

حکمت

"فاذکر الله" کثیراً دیب آیت کیلدی
 ذکرین ایتیپ زاری قیلیب یوردوم منا
 دیدارینی عاشق لارکا وعده قیلدی
 عشق یولیده جانیم بیریب یوردوم منا
 چین عاشقنی الله سویوب بندم دیدی
 ارا یولده قالمسون دیب غمیم ییدی
 یالغانچی لار دیداریمنی کورمس دیدی
 عشق بابیده محکم بولوب توردوم منا
 عاقل ایرسنک کورستان دین خبر آغیل
 من هم شونداغ بولور من دیب عبرت آغیل
 "موتوا قبل ان تموتوا" کا عمل قیلغیل
 بو حدیثنی فکر ایلابان اولدیم منا

خبر بیرور "فلیضحکوا قليلاً" دیب
 ینه ایتور "ولیبکوا کثیراً" دیب
 بو آیتنی معنیسی کا عمل قیل دیب
 بو دنیاده هیچ کولمایین یوردوم منا
 عمل سیزلار قهقه کولور، خرم یورور
 فرمانی غه بویون سونغان پرغم یورور
 کیچه - کوندوز دیدهلاری پُرنم یورور
 کوز یاشیمنی دریا قیلیب یوردوم منا
 نفس دین کیچوب چین عاشققر الله دیدی
 سحر توروب چهار ضرب اوروب کوزین اویدی
 رحم ایلابان الله اوزی نظر سالدی
 آندین سونکره دریا بولوب تاشتیم منا
 ظالم نفسیم هیچ قویمایین اوتقه سالدی
 وجودلاریم اوز اوزیدین کویوب یاندی
 مشرقلارنی ایمانینی شیطان آلدی
 "اعوذ بالله، بسم الله" دیب یوردیم منا
 منافقلار دوزخ ایچره کویوب یانغای
 ایمان ایلتکان خالص بولوب یانیب چیقای
 ایمان سیزلار اول آخر کویوب یانغای
 اوغانیمدین ایمان تیلاب یوردیم منا
 نفسیم منی هوا قیلدی طرفه شاشتیم
 باشیم آلیب پیر مغان سری [ساری] قاجتیم
 قول "خواجه احمد" عقبه لاردین یلیب آشتیم
 اوچقان قوشدیک لامکانغه آشتیم منا

وا دریغا نتوك قیلغوم غریب لیغده
 غریب لیغده غربت ایچره قالدیم منا
 خراسان و شام و عراق نیت قیلوب
 غریب لیغنی کوب قدرینی بیلدیم منا
 نه کیلسه کورمک کیراک اول خدادین
 یوسفنی آیردی لار اول کنعان دین
 توغان بیریم اول مبارک ترکستان دین
 بغریمغه تاشنی اوروب کیلدیم منا
 غربت تیکدی مصطفی دیک ایرانلارغه
 اوتوز اوچ مینک صحابه هم یارانلارغه
 ابوبکر، عمر، عثمان، مرتضی غه
 غربت تیکدی آلا رکا ایغوم منا
 غربت تیکسه پخته قیلوب کوب خام لارنی
 دانا قیلور هم خاص قیلور کوب عام لارنی
 کیار کیرتون تابسه ییور طعام لارنی
 آنینک اوچون ترکستانغه کیلدیم منا
 غریب لیقده یوز ییل تورسه ایرور مهمان
 تخت و بخت بوستانلاری ایرور زندان
 غریب لیقده قول بولدی اول محمود سلطان
 ای یارانلار شربت ایچره کویدیم منا
 غریب لیغده آرسلان بابام ایزلاب تابتی
 هر سر کوروب پرده برله بوکوب یابتی
 بحمد الله کوردوم دیدی ایزیم اوبتی
 اوشبو سرنی کوروب حیران قالدیم منا

آرزوليق من قرينداشليغ ولایت غه
 اولوغ بابام روضه سی اق تربت غه
 بابامنی روحی سالدی بو غربت غه
 هیچ بیلما سمن نچو ک تقصیر قیلدیم منا
 قول "خواجه احمد" سوزلا کانی حق نی یادی
 ایشیتما کان دوستلاریغ قالسون پندی
 غربت لانیب اوز شهر یغ قیته یاندی
 ترکستانده مزار بولوب قالدیم منا

(۱۸)

حکمت

عمریم آخر بولغانده نه قیلغایمن خدایا
 جان آلوچی کیلکانده نه قیلغایمن خدایا
 جان بیرمک نی وهمدین عزازیل نی زخمی دین
 شفقت بولمسه سندین نه قیلغایمن خدایا
 جان بیرمک ایشی دیشوار آسان قیلغیل یا جبار
 سندین اوزکا یوق غمخوار نه قیلغایمن خدایا
 جانیم جدا بولغانده تنیم مونده قالغانده
 تخته اوزره آغانده نه قیلغایمن خدایا
 عاجز بولوب یاتقانده فرشته لار کیرکانده
 "من ربک" دیب سورکانده نه قیلغایمن خدایا
 ایلتیب کورکا قویغانده یتنی قدم یانغانده
 سورغوچی کیرکانده نه قیلغایمن خدایا
 "من ربک" دیب تورغانده قرا کوندور اوشنده
 ریینک کمدور دیکانده نه قیلغایمن خدایا
 قول "خواجه احمد" سن بنده نفسین ایلکیده شرمنده
 محشر کونی بولغانده نه قیلغایمن خدایا

(۱۹)

حکمت

الهی قادرا پروردکارا
رحم قیل بندنکا ای کردکارا
سیغیندیم حضرتیگ کا ای الهی!
یراتقان جمله عالم نی پناهی
اجابت سندین و مندین مناجات
ای - ای ذوالجلال جمله حاجات
الهی حاجتیم نی سن روا قیل
کریم سن لطف ائله دردیم دوا قیل
کرم بیرله کیچورکیل ای اریغ ذات
عذاب آخرت دین قیلغیل آزاد
الهی شر شیطاندین سن اسره
قموغ یازوقلاریم دین هم سن اسره
قموغ یازوقلاریم دین توبه قیلدیم
که مست ایردیم که من آندین آییلدیم
دیمایدور من بنی جاندین آییرمه
ولی آخرده ایماندین آییرمه
الهی برجه نی فریادیغه یئت
قموغ بیچاره لارنی دادیغه یئت
قولون عاصی نی سن هر حاجتین بئر
بو درد بی دوام کا سن دوا بئر
الهی سن کیچورکیل طاقتیم یوق
سنی آلدینکده لایق طاعتیم یوق
الهی ذات پاکینک حرمتیدین
آیرکیل بیزنی شیطان زحمتیدین

الهی برجه‌نی قوللوقغه خاص ائت
 من مندین آلیب بیر یول خلاص ائت
 منکا توفیق سوییدین سن ایچورکیل
 کرم بیرله گناهیمنی کیچورکیل
 که بیلماسده گناه بسیار قیلدیم
 کونکلارنی بوزوب آزار قیلدیم
 که هر عاصی ایرور رحمتکا لایق
 کیل ای احد دعاغه بول موافق

(۲۰)

حکمت

تینمای عاشق "هو" دیرلار خدایی‌غه یالباریب
 یورور آنی عشقیده کیچه - کوندوز سارغاییب
 زار ییغلانیب عاشقنی عشق ایلکیده خدایم
 عشق یولیده ملامت آنکا کورور مناسب
 منصور بیر کون ییغلادی ایرانلار رحم ایلادی
 چلتن شربت ایچوردی منصورغه مهرین سالیب
 منصور ایتور "انا الحق" ایرانلار ایشی بر حق
 ملالار ایتور ناحق کونکلی کا یمان آلیب
 ایتماکیل انا الحق دیب کافر بولدونک منصور دیب
 قرآن ایچره بولدور دیب اولدوردیلار کوبلاشیب
 بیلمادیلار ملالار انا الحقنی معنی سین
 "قال" اهلی کا "حال" علمین حق کورمدی مناسب
 روایت لار بیتیلدی حالین آنی بیلمادی
 منصور دیک اولیانی قویدیلار دارغه آسیب
 افسانه دور شریعت فرزانه دور حقیقت
 دردانه دور طریقت، عاشقلارغه مناسب

خلق عالم ییغیلدی منصور دیب فریاد قیلدی
 منصورنی یارانلاری قالدی آنده ییغلاشیب
 توبه قیلغیل "خواجه احمد" بولغای حقدین عنایت
 یوز مینک ولی لار اوتی سرنی سرکا اولاشیب

(۲۱)

حکمت

باشیمغه توشوب نعره سودای محمد
 من آنی اوچون کوییده شیدای محمد
 کیم امتی دور حمد و ثنا تینماین ایتور
 پاکا، صمدا، قیل منی رسوای محمد
 کونکولوم کا سالیب عشق محبتنی الهیم
 قیلغیل منی سین عاشق یکتای محمد
 ماننده مجنون کیچوروب ایکی جهاندین
 دیوانه قیلیب قیل منی رسوای محمد
 اولتورکیل، کویدورکیل، هر محنتی سالغیل
 اول روز جزا قیل منی شیدای محمد
 دایم غم امت یئدی و یئمادی نعمت
 کرامتی دور سن قانی غمهای محمد
 امت دیبان کیچه - کوندوز یئدی حسرت
 کوکسیدین چقارور پر خونی دلهای محمد
 امت گناهینی تیلاب او شاهی شاهنشاهی
 اول روزی جزا بولار اول دادخواهی محمد
 کیچکیل همه دین ایزله محمدنی رضاسین
 والله بولاسن لحظه ده کویای محمد
 سندین تیلا کیم بولدورور ای خالق بیچون
 سالغیل قولاغیمغه منی غوغای محمد

من اور گولایین خوش کرمینکدین سنی الله
 بیر قطره قاتورغیل منکا دریای محمد
 یول بیر گوچی رحمن، رحیم، غافر، ستار
 قیلمه منی شرمندۀ گمراهی محمد
 بیر قطره می اول جام الست دین منکا انعام
 قیلغیل بولایین حمدینکا دانای محمد
 روی سیغک سور قدمی پیر مغان غه
 لطف ایتسه بئورور دیدۀ بینای محمد
 مقصودیمه تیکور منی ای خالق بیچون
 من در طلب زلف سمن سای محمد
 یوزدین کوتاریب پردنئی احمد سری باقغیل
 من بندۀ اول موی سیه پای محمد
 مسکین یسوی آرزوی روضۀ حضرت
 بولغایمو میسریم خاک کف پای محمد

(۲۲)

حکمت

الکذاب لا امتی دئدی بیلینک محمد
 یالغانچی لار قومی نی امت دیمس محمد
 توغری یورکان قولینی حقنی ایزلاب یولی نی
 راست یورکان قولینی امت دیکای محمد
 هر کیم امت من دیسه، رسول ایشین قویمسه
 شفاعت کونی بولسه محروم قویمس محمد
 تنکری تعالی سوزین رسول الله سنتین
 اینانماکان امتین امت دیمس محمد
 امت من دیب یورورسن، بو یروغینی قیلمس سن
 نهچوک امید توتارسن آنده سورمس محمد؟

مشکل دور عاصی بنده امت دیمسه آنده
 رسوا بولور محشرده امت دیمس محمد
 امت دیکای محمد چین سوزلاسه قول احمد
 تانکلا بولسه قیامت محروم قویمس محمد

(۲۳)

حکمت

اون سیکیز مینک عالمغه سرور بولغان محمد
 اوتوزاوج مینک اصحابغه رهبر بولغان محمد
 یلانکاچ آچیلغه قناعت لیغ محمد
 عاصی، جافی امتغه شفاعت لیغ محمد
 تونلار یاتیب ایومس تلاوت لیغ محمد
 غریب بیرله یتیمغه مروّت لیغ محمد
 یولدین آزغان گمراهغه هدایت لیغ محمد
 مهم توشسه هر کیمکا کفایت لیغ محمد
 ابو جهل بولهبغه سیاست لیغ محمد
 ملامت نی صابونی سلامت لیغ محمد
 نماز - روزه قیلغوچی عبادت لیغ محمد
 تینمای تسبیح ایتکوچی ریاضت لیغ محمد
 ملعون لعین شیطانغه سیاست لیغ محمد
 شریعت نی یولیغه عنایت لیغ محمد
 طریقتغه رهنما ارادت لیغ محمد
 حقیقتکا مقتدا اجازت لیغ محمد
 دعا لاری مستجاب اجابت لیغ محمد
 یمانلیغغه یخشیلیق کرامت لیغ محمد
 توفیق بیرکان ظالمکا جلالت لیغ محمد
 سجده قیلغان ایگیلیب اطاعت لیغ محمد

بیش وقت نماز یولغانده امامت لیغ محمد
معراج آشیب بارغانده شهادت لیغ محمد
عرش - کرسی بازاری عنایت لیغ محمد
سیکیز بهشت ایکاسی ولایت لیغ محمد
مسکین احمد قولیغه کتابت لیغ محمد
یتیم، فقیر، غریب‌غه سخاوت‌لیغ محمد

(۲۴)

حکمت

بیزدین درود بسیار یا مصطفی محمد!
تحيات بی شمار یا مصطفی محمد!
یا سید المرسلین یا خاتم النبیین
یا هادی المضلین یا مصطفی محمد!
یا ایها المدثر حق ایدی قُمْ فَأَنْذِرْ
و رَبِّكَ فَكَبِّرْ یا مصطفی محمد!
حضرت‌ده‌سین معظم، قربت‌ده‌سین مکرم
انبیاء‌غه مقدم یا مصطفی محمد!
سین سین حبیب خالق حق درگاه‌ی‌غه لایق
خلاصه خلایق یا مصطفی محمد!
اصل وجود آدم مرسل نبی خاتم
راز نهان‌غه محرم یا مصطفی محمد!
طوبی قاب قوسین قمری باغ کونین
برچه‌غه قره عینین یا مصطفی محمد!
عرشی کرسیدین آشقان، حضرتیکا اولاشقان
توقسان مینک راز ایتوشکان یا مصطفی محمد!
یر - گۆک ایرور مأمورینک صحابه‌لار منظورینک
جمله امت مغفورینک یا مصطفی محمد!

هر کیم سنکا سیغینور تموغدین اول قوتولور
 اوچماخ سری اولانور یا مصطفی محمد!
 جانیم فداسی قیلسام، خوشنودلوقینی آلسام
 ارمان یوق ایردی اولسام یا مصطفی محمد!
 کرچه کوبتور گناهیم، کیچوزکای سین الهیم!
 سین سین منی پناهیم یا مصطفی محمد!
 یارب نچوک قیلغایمن شفاعتین قولکای من
 امتی دین بولغایمن یا مصطفی محمد!
 امتیدین بولغانلار شفاعتین قولغانلار
 اهل بهشت بولغانلار یا مصطفی محمد!
 احمد مرادی سین سین! ذکر ویادی سین سین!
 ایشلار کشادی سین سین یا مصطفی محمد

(۲۵)

حکمت

حق تعالی فضلی برلان فرمان قیلدی
 ایشتیب اوقوب بیرکا کیردی قول خواجه احمد
 آلمیش اوچده سنت لارین محکم توتوب
 ایشتیب اوقوب بیرکا کیردی قول خواجه احمد
 بیر اوستیده اولمس بورون تریک اولدوم
 آلمیش اوچده سنت دیدی ایشتیب بیلدیم
 بیر آستیده جانیم بیله قوللوق قیلدیم
 ایشتیب اوقوب بیرکا کیردی قول خواجه احمد
 ایرانلاردین فیض و فتوح آلامادیم
 یوز یکره بیشکا کیردیم بیلامادیم
 حق تعالی طاعت لارین قیلالمادیم
 ایشتیب اوقوب بیرکا کیردی قول خواجه احمد

بولغای من مو محمد نی خاص امتی
 امت دیسه عاصی لارین خوش دولتی
 بالدین تاتلیغ ایرور منکا بو محنتی
 ایشتیب اوقوب بیرکا کیردی قول خواجه احمد
 بیزار اوچون جانلار چیکتی اول محمد
 امت بولسنگ غم ییمس سین یالغان امت
 کیچه - کوندوز حاصل لارینک عیش عشرت
 ایشتیب اوقوب بیرکا کیردی قول خواجه احمد
 ایلک یاشده ندا کیلدی اولمک آسان
 شرطی اولدور سنده بولسه نور ایمان
 تانکلا بارسنگ دیداریغه قیلور مهمان
 ایشتیب اوقوب بیرکا کیردی قول خواجه احمد
 ای مؤمن لار بو دنیانی پایانی یوق
 چین اولور سین هرکز مونی یالغانی یوق
 کیم بیللمسه والله آنی ایمانی یوق
 ایشتیب اوقوب بیرکا کیردی قول خواجه احمد
 اصلیم تفریق (توپراق)، نسلیم تفریق، برجه دین خوار
 باسیب اوتسنگ مردار جسمیم قیلغوسی عار
 کیم عار ایتسه شیطان قومی هواسی بار
 ایشتیب اوقوب بیرکا کیردی قول خواجه احمد
 چین ذاکرغه خدا اوزی قیلدی رحمت
 تانکلا یارسه جنت ایچره بیرور خلعت
 روز محشر دیدار کوروب سورکای دولت
 ایشتیب اوقوب بیرکا کیردی قول خواجه احمد
 بنده بولسنگ محنت تارتغیل غافل آدم
 عاقل ایرسنگ غنیمت دور سنکا شول دم
 امانت دور عزیز جانینگ یورمه بی غم
 ایشتیب اوقوب بیرکا کیردی قول خواجه احمد

آلتیش اوچده سنت بولدی بیرکا کیرمک
 رسول اوچون ایکی عالم بر باد بیرمک
 عاشق لارنی سنتی دور تریک اولمک
 ایشتیب اوقوب بیرکا کیردی قول خواجه احمد
 اَمّت بولسَنک ایشتیب جانینک بیرمسن موسن
 مصطفی غه جانینک قربان قیلمس موسن
 جان نه بولغای ایمانیکنی بیرمسن موسن
 ایشتیب اوقوب بیرکا کیردی قول خواجه احمد
 قول "خواجه احمد" آلتیش اوچده غایب بولدی
 ادب ساقلاب مصطفی غه نایب بولدی
 سلطان بولدی، محنت تارتیب تایب بولدی
 ایشتیب اوقوب بیرکا کیردی قول خواجه احمد

(۲۶)

حکمت

قهار آتلیغ قهرینکدین قورقوب ییغلار خواجه احمد
 رحمن آتلیغ رحمینکدین امید توتار خواجه احمد
 گناهیم کوب الهیم! کیچورکای سن گناهیم
 برجه قوللار ایچیده عاصی قول دور خواجه احمد
 منافقلار یورارلار، فسق و فجور قیلورلار
 حرام، شبهه یورلار قورقوب ییغلار خواجه احمد
 طریقتنی بیلمادیم، حقیقت غه کیرمادیم
 پیر بویروغین توتمدیم عذری کوبتور خواجه احمد
 آخر زمان بولغاندور، پادشاه ظالم بولغاندور
 حرام، شبهه تولغاندور حیران بولور خواجه احمد

شرمنده عاصی قول من، عشق یولیده بلبل من
 آرسلان بابا کا قول من قولونک بولور خواجه احمد
 قول "خواجه احمد" طاعت قیل، ییغلامقنی عادت قیل،
 بلا کیسه طاعت قیل! حقدین بولور خواجه احمد

(۲۷)

حکمت

توبه قیلیب حقه یانغان عاشقلارغا
 اوچماخ ایچره تورت اریغده شربتی بار
 توبه قیلماي حقه یانماکان غافل لارغه
 تار لحدده قاتیغ عذاب حسرتی بار
 اوچماخ ملکین اومان قول لار توبه قیلسون
 توبه قیلیب حضرتی غه یاق بولسون
 حور، قصور، غلمان، ولدان، خادم بولسون
 الوان - الوان کیار تشریف خلعتی بار
 توبه قیلغان عاشقلارغه نوری ایرور
 تونی. کونی صایم بولسه کونکلی یارور
 قچان اولوب کورکا کیرسه کوری کینکرور
 اوغان ایذیم رحیم، رحمن رحمتی بار
 توبه سیزلار بو دنیا دین کیچماس بیلور
 اولوب بارسه گور عذابین کورمس بیلور
 قیامت کون تانک عرصات آتمس بیلور
 هیهات هیهات نوحه فریاد کونلاری بار
 نماز، روزه توبه اوزره بارغانلارغه
 حق یولیغه کیریپ قدم قویغانلارغه
 اوشبو توبه برله آنده بارغانلارغه
 یارلقامیش قول لار برلان صحبتی بار

نماز برله روزهلاری اوتن الار
 عالم خلقی سویونوب انی حقدین تیلار
 قیامت کون کوروب آنی آلا ر تینکلار
 نه قول ایرمیش بو سعادت نصرتی بار
 اول اریغلر کیمکا تورور بیلکیل آنی
 توبه قیلغان عاشقلارکا ایچورور آنی
 توبه سیزلار اول اریغ دین ایچمس ولی
 انکا ایچورور زهر - زقوم شربتیی بار
 قیامتنی بیر کونی ایلک مینک ییلچه بولور
 بو دنیانی ساننچه ییل نیچه بولور
 قیامت کون یتیمیش مینک ییل اوتده قالور
 توبه قیلکان قوللار کویمس مهلتی بار
 هر کیم حقنی قولی بولسه حقه یانسون
 حقه یانمس اوزین دیکان ناری بارسون
 قول خواجه احمد نچوک مونده اورون تابسون
 کیچه کوندوز قورقه تورور هیبتی بار

(۲۸)

حکمت

بهشت دوزخ تلاشور تلاشمقده بیان بار
 دوزخ ایتور من آرتوق منده فرعون، هامان بار
 بهشت ایتور نه دیرسین؟ سؤزنی ییلمای ایتورسین
 سینده فرعون بولسه منده یوسف کنعان بار
 دوزخ ایتور من آرتوق بخیل قوللار منده بار
 بخیل لارنی بوینی ده اوتلوغ زنجیر کشان بار
 بهشت ایتور من آرتوق پیغمبرلار منده بار
 پیغمبرلار آلدیده کوثر، حور و غلمان بار

دوزخ ايتور من آرتوق ترسا، جهود منده بار
 جهود. ترسا آلدیده تورلوك عذاب سوزان بار
 بهشت ايتور من آرتوق مؤمن قوللار منده بار
 مؤمنلارنى آلدیده تولورك نعمت الوان بار
 دوزخ ايتور من آرتوق ظالم قوللار منده بار
 ظالملاركا بيوروركا زهر - زقوم چندان بار
 بهشت ايتور من آرتوق عالم قوللار منده بار
 عالملارنى كونكلى ده آيت حديث قرآن بار
 دوزخ ايتور من آرتوق منافقلار منده بار
 منافقلار بوينى ده اوتدين اشكل كشان بار
 بهشت ايتور من آرتوق ذاكر قوللار منده بار
 ذاكرلارنى كونكلى ده ذكر الله سبحان بار
 دوزخ ايتور من آرتوق بى نمازلار منده بار
 بى نمازلار بوينى ده ييلان بيلان چيان بار
 بهشت ايتور من آرتوق ديدار كورمك منده بار
 ديدارنى كورساتورغه رحيم آتليغ رحمن بار
 دوزخ انده تيك توردي بهشت عذرىنى ايدى
 قول خواجه احمد نه بيلدى بيلدور كوچى يزدان بار

(۲۹)

حکمت

ديدارىنى طلب قيلسنك اى ذاكرلار
 جاندین كيچيب خلقه ايچره كوزونك ديدار
 شوقينك بيله الله ايتيب راستكا قايتيب
 تون اويقوسين حرام ايلاب بولكيل بيدار
 بيدارلاركا حق رحمتى بولور ياق
 بيدارلارنى كونكلى سينوق، كوزى ياشليق
 من منليكنى جزاسينى بيركاي تموق
 تكبرنى دوزخ ايچره حالى دشوار

سىندىن بورون يارالارىنىڭ قىيان كىتى
 بو دىياغە مىل قىلماي يىغلاپ اوتى
 عمرىنىڭ آخىر بولدى نوبىتى سىنكا يىتى
 گناھنىڭ كا توبە قىلگىلى ئاى بد كردار!
 نىفسىنىڭ سىنى باقىپ تورسىنىڭ نىلاردىمىس
 زارى قىلىسنىڭ اللە سىرى بىيۇن سونمىس
 قولغە ئالسنىڭ بىيان قوشىدىك قولغە قونمىس
 قولغە ئايب تون اويقوسىن قىلگىلى بىدار
 نىفس يولىغە كىرگان كىشى رسوا بولور
 يولدىن آزىپ تايب توزوب گمراھ بولور
 ياتسە قوبسە شىيطان بىيلە ھمراھ بولور
 نىفسنى تىكىلى نىفسنى تىكىلى ئاى بد كردار
 نىفسىنىڭ سىنى آخىر دىمدە گدا قىلگىلى
 دىن اويىنى غارت قىلىپ ادا قىلگىلى
 اولار وقتدە ايمانلىنىدىن جدا قىلگىلى
 عاقل ايرىسنىڭ نىفسى بىددىن بولگىلى بىزار
 فرعون، قارون، شىيطان سوزىن مىھىم توتىدى
 بول سىبىدىن يىتر يارىلىدى ئانى يوتىدى
 موسى كلىم ناصىھ بولوب سوزلار ايتىدى
 قولاق توتماي اول ايكىسى اولدى مىردار
 گناھنىڭ كا توبە قىلىپ يىغلاپ يورغىل
 كىتار مىن دىپ يول باشىغە بارىپ تورغىل
 كىتكانلارنى كوروب سىن ھىم عبرت ئالغىل
 عبرت ئالسنىڭ ياتمىش يىرىنىڭ بولور گلزار
 مۇمىن قوللار درد ھالىت پىدا قىلدى
 ھىق يولىدە جان و دلنى شىدا قىلدى
 دىنيا تاشلاپ آخىرتنى سودا قىلدى
 سودا قىلىسنىڭ ھور وغلان بارى طىيار

قول "خواجہ احمد" نفس ایلکیدین قیلورمن داد
 پیر مغان بولغای موکین انکا جلاد
 بیخبرلار ایشیتماسلار داد و فریاد
 قان ییغلاغیل ایشیتسون اول پروردگار

(۳۰)

حکمت

عشق یولیده فنا بولای حق بیر و بار
 هر نه قیلسنک عاشق قیلغیل پروردگار
 ایلکیم آچیب دعا قیلای ایزیم جبار
 هر نه قیلسنک عاشق قیلغیل پروردگار
 عشقی تیکسه کویدور کوسی جان و تنی
 عشقی تیکسه ویران قیلور ما و منی
 عشق بولمسه تانیب بولمس مولیم (مولام) سنی
 هر نه قیلسنک عاشق قیلغیل پروردگار
 عشق دفتری سغماس دوستلار درکاهی کا
 جمله عاشق ییغیلیب بارکای بارکاهی کا
 یتی دوزخ طاقت قیلمس بیر آهی کا
 هر نه قیلسنک عاشق قیلغیل پروردگار
 خاص عشقینکنی کورسات منکا شاکر بولای
 ارّه قویسه زکریادیك ذاکر بولای
 ایوب صفت بلاسیغه صابر بولای
 هر نه قیلسنک عاشق قیلغیل پروردگار
 عشق دردینی طلب قیلدیم درمانی یوق
 عشق یولیده جان بیرکانی ارمانی یوق
 بو یول لارده جان بیرمسه امکانی یوق
 هر نه قیلسنک عاشق قیلغیل پروردگار

قایدین تاپای عشقینک توستی قراریم یوق
 عشق ثناسین تونی کونی قویاریم یوق
 درکاهنکدین اوزکا بیرکا باراریم یوق
 هر نه قیلسنک عاشق قیلغیل پروردکار
 عشق بازاری. اولوغ بازار سودا حرام
 عاشق لارکا سندین اوزکا غوغا حرام
 عشق یولیغه کیرکانلارکا دنیا حرام
 هر نه قیلسنک عاشق قیلغیل پروردکار
 عاشق‌لیق‌نی دعوی قیلیب یورالمیم
 نفسدین کیچیب من امری‌نی قیلالمادیم
 نادان‌لیقده حق امرینی بیلامادیم
 هر نه قیلسنک عاشق قیلغیل پروردکار
 قول "خواجه احمد" عشق دین قاتیغ بلا بولماس
 مرهم سورمه عشق دریغه دوا بولماس
 کوز یاشیدین اوزکا هیچ کیم گواه بولماس
 هر نه قیلسنک عاشق قیلغیل پروردکار

(۳۱)

حکمت

هر کشی کورسه جمال‌نک دنیا ایشین برباد ایتار
 کیچه کوندوز تنه بیلماس خداینی یاد ایتار
 کیم آننک کوینده بولسه حق آننک کونکلنده‌دور
 هر ساری بارسه اوشال یاری بیلان پرواز ایتار
 کاشکی من دایم سنک یادنک بیلان بولغای ایدیم
 باقشنک یوز مینک متنکداک بنده‌نی آزاد ایتار
 معرفت میدانی ایچره بو کونکلنی شاد ایتیپ
 دنیاسین ترک ایلکانلار حق بیلان سودا ایتار

عارف اول دور بولسه عاشق حلقهده جولان ايتيب
 استعانتني تىلاب اول پيرنى قالقان ايتار
 خوش عجايب و غرايب بو خدانينك ايشلارى
 بيرسين گويا قىلوبن بيرسين ترکان ايتار
 کورکل اوشبو دنيا ايچون کوب جفالار ايلسانک
 آخرى هيچ اوشبو دنيا ييرييلان يکسان ايتار
 کيچه - کوندوز آرزو قىلسانک آنک ديداريني
 صاف قىلغیل بو کونکلنى بير کونى دربار ايتار
 ای قول احمد سين يوروب غمکين کونکلنى اولاغیل
 اهل دل بولغان کشى غمکين کونکلنى شاد ايتار

(۳۲)

حکمت

ناگهان توروريمده قموغ بزرک
 حق عشقنى کونکلوم ايچره سالدی دوستلار
 خضر بابام حاضر توروب لطف ايلابان
 مدد قىليب ايلکيم توتوب آلدی دوستلار
 اوتوز بيرده خضر بابام می ايچوردی
 وجوديمدين عزازيلنى حق قاچوردی
 سودا قىلديم، يازوقلاريم حق کيچوردی
 آندين سونکره حق يوليغه سالدی دوستلار
 اوتوز ايکي ياشده يتی حقدین فرمان
 بنده ليک کا قبول قىلديم قيلمه ارمان
 جان بيوروده بيرکوم سنکا نور ايمان
 غريب جانيم شادمان بولوب کولدی دوستلار

خالقیم دین خبر یتی شاکر بولدوم
 هر کیم سوکتی بلکه تیبتی صابر بولدوم
 بو عالمده هیچ اوخلامای حاضر بولدوم
 های - هوس، ما و من لیک کیتی دوستلار
 اوتوز اوچده ساقی بولوب می اولاشتیم
 جام شراب قولغه آلیب توپا ایچتیم
 لشکر توزاب شیطان برله مین اوروشتیم
 بحمد الله ایکی نفسیم اولدی دوستلار
 اوتوز تورتنده عالم بولوب دانا بولدوم
 حکمت ایت دیب سبحان ایدی گویا بولدوم
 چلتن برلان شراب ایچتیم همراه بولدوم
 ایچ و تاشیم حق نوریغه تولدی دوستلار
 اوتوز بیشده مسجد کیریپ دوران سوردم
 طالب لارکا عشق دوکانین تولا قوردوم
 ایگری یولغه هر کیم کیردی سوکتوم اوردم
 عاشق لارکا حق دین مژده یتی دوستلار
 اوتوز یتی یاشقه کیردیم او یغانمادیم
 انصاف قلیب الله سری تولغانمادیم
 سحر وقتده زاری قلیب اینکرانمادیم
 توبه قیلدیم خواجم قبول قیلدی دوستلار
 اوتوز سیکز یاشقه کیردیم عمروم اوتی
 ییغلامیمو اولار وقتیم یاق یتی
 اجل کیلیب پیمانہ سین منکا توتی
 بیلمای قالدوم عمروم آخر بولدی دوستلار
 اوتوز توقوز یاشقه کیردیم قیلدیم حسرت
 وادریغا اوتی عمروم قانی طاعت
 طاعت لیک لار حق قاشیده خوش سعادت
 قیزیل یوزوم طاعت قیلمای سولدی دوستلار

ساچ و سقال خوب آقاردی کونکلوم قرا
 روز محشر رحم ایتما سنک حالیم تباہ
 سنکا عیان عمل سیز من کوبتور گناه
 جمله ملک یازوقلاریم بیلدی دوستلار
 پیر مغان جرعه سیدین قطره تاتیم
 یول تاپایدیب باشیم برله تونلار قاتیم
 بحمد الله لطف ایلادی نورکا باتیم
 کونکل قوشی لامکانغه یتی دوستلار
 قیامت نی شدتی دین عقلم حیران
 کونکلوم قورقغان، جانیم هورکان، خانه ویران
 صراط آتلیغ کوفروکی دین دلیم لرزان
 عقلم کیتی بیهوش بولوب قالدیم دوستلار
 قول "خواجه احمد" قیرقه کیردینک نفسینکی قیرق
 مونده ییغلاب آخرتده بولکیل اریق
 پوست ایمان شریعت دور مغزی طریق
 طریق کیرکان حقدین اولوش آلدی دوستلار

(۳۳)

حکمت

اولیالار ایتکان وعده کیلدی بولغای
 قیامت نی کونی یاوق بولدی دوستلار
 عاقل قوللار بولغانی نی ییلدی بولغای
 خلق ایل دین مهر شفقت کیتی دوستلار
 اولوغ کیچیک یارانلاردین ادب کیتی
 قیز و ضعیف جوانلاردین حیا کیتی
 الحیاء من الایمان دیب رسول ایتی
 حیا سیز قوم عجایب لار بولدی دوستلار

مسلمان مسلماننی قیلدی قاتل
 ناحق توتوب حق ایشلارین قیلدی باطل
 مرید پیرغه قیلما دیلار یوزی خاطر
 عجب شوملوغ زمانه لار بولدی دوستلار
 اهل دنیا خلقمیزده سخاوت یوق
 پادشاهلارده وزیرلارده عدالت یوق
 درویشلارنی دعاسیده اجابت یوق
 تورلوك بلا خلق اوستیغه یاغدی دوستلار
 آخر زمان عالم لاری ظالم بولدی
 خوش آمد ایتکوچی لار عالم بولدی
 حقنی ایتکان درویشلارکا غنیم بولدی
 عجب شوملوغ زمانه لار بولدی دوستلار
 قیامت کون یاوق یتتی قالغانی یوق
 قول احمدنی ایتکان سوزین یالغانی یوق
 اوز اوزیغه بیر نصیحت قیلغانی یوق
 نصیحتین خلقه ایتیپ کیتی دوستلار

(۳۴)

حکمت

محبتنی جامین ایچکان دیوانه لار
 قیامت کون اوت آغزیدین ساچار دوستلار
 قدرت برله یراتیلکان یتتی تموغ
 عاشقلارنی نعره سیدین قاچار دوستلار
 دوزخ ییغلاب داد ایلاکای خدایی کا
 طاقتیم یوق عاشقلارنی بیر آهی کا
 قاچیب بارکای حق تعالی پناهی کا
 عاشقلارنی یاشی برلان اوچار دوستلار

عاشقلاری عشق دوکانین بارسه قوروب
 انشاء الله دوزخ قاچقاي آندین قورقوب
 یاشین ساجیب کوکسین آجیب یوزین سوروب
 ییتی آسمان طاقت قیلمای کوچار دوستلار
 رحمن ایکام ساقی بولوب می ایچورسه
 اهل عیال خانماندین پاک کیچورسه
 وجودیمدین عزازیلنی حق قاچورسه
 جرم عصیان کره لارین آچار دوستلار
 عشق بابی نی حق یوزیغه وا ایلاسه
 خاص عشقی نی کونکل ایچرد جا ایلاسه
 لطف ایلاسه ایکی عالم شاه ایلاسه
 عاشقلاری حق ساریغه اوچار دوستلار
 سبحان ایکام بیر قطره می قیلسه انعام
 ذکر سرنی ایته ایته قیلسام تمام
 حور و غلمان جمله ملک انکا غلام
 اوچماخ ایچره حریر تونلار بچار دوستلار
 الله دیبان گوردین قویسه عالم کوپار
 خاص بندم دیب رحمان ایکام یالغوز سویار
 یاش اورنی غه قانین توکوب یوزنی بویار
 حمدین ایتسه شیطان لعین قاچار دوستلار
 مین ایتما دیم الله اوژی وعده قیلدی
 یولسیز ایدیم لطف ایلابان یولغه سالدی
 غریب بولوب ناله قیلدیم. قولوم آلدی
 انداغ عاشق شوق شرابین ایچار دوستلار
 قول خواجه احمد عشق سیزلارنی ایشی دشوار
 تانکلار بارسه حق کورساتمس انکا دیدار
 عرش کرسی لوح قلم همه بیزار
 عشق سیزلارکا دوزخ بابین آچار دوستلار

کوزوم نملیک دلیم غملیک جان الم لیک
 نیچوک علاج ایتاریمنی بیلمام دوستلار
 بو حسرتده ندامتده یاشیم آقیب
 قایو طرف کیتاریمنی بیلمام دوستلار
 تورلوك تورلوك علامتلار بولدی پیدا
 یوراکیمده جراحتلار بولدی پیدا
 بو دنیاده لحظه فارغ بولماغ پیدا
 نیچوک علاج ایتاریمنی بیلمام دوستلار
 الله اوچون فرزندلاریم یتیم قیلسام
 جاندين کیچیب مالدين کیچیب غریب بولسام
 بیابانده یالغوز قاز دیک ناله قیلسام
 نیچوک علاج ایتاریمنی بیلمام دوستلار
 خاص قوللار دیک کیچهلاری قایم بولسام
 مردانلار دیک کوندوزلاری صایم بولسام
 کیچهلاری آرام آلمای ریم دیسام
 نیچوک علاج ایتاریمنی بیلمام دوستلار
 تخم عصیان بیحد ساختیم طاعتیم آز
 اوتی عمروم غفلت بیلان هم قیش و یاز
 یاقین تورور جانم قوشی قیلسه پرواز
 نیچوک علاج ایتاریمنی بیلمام دوستلار
 قول خواجه احمد خدمتیده جان بیرمه
 دهقان ایرمس کیتمان چاییب نان بیرمه
 وا بولمغای کل غنجهسی نم بولمه
 نیچوک علاج ایتاریمنی بیلمام دوستلار

(۳۶)

حکمت

عشق سَرینی بیان قیلسام عاشق لارکا
طاقت قیلمای باشین آلیب کیتار دوستلار
تاغ [قه] تاشقه باشین اوروب بیخود بولوب
اهل عیالیم خانماندین اوتار دوستلار
عشق شدتی باشقه توشسه عاشق تیلار
بیکانه لار تاشلار آتیپ آنکا کولار
دیوانه دیب باشین یاریب قانغه بولار
شاکر بولوب حمد ثنا ایتار دوستلار
عشق سیزلارنی هم جانی یوق هم ایمانی
رسول الله سؤزین ایدیم معنی کانی
نیچه ایتسام ایشیتکوچی بیلکان قانی
بیخبرکا ایتسام کونکلی قاتار دوستلار
عشق گوهری توبسیز دریا ایچره پنهان
جاندین کیچیب گوهر آغان بولدی جانان
بولهوسلار عاشق مین دیب یولده قالغان
دین لارینی پوجک پلغه ساتار دوستلار
اوتقه کویدوم، جاندین تویدوم، حیران بولدوم
بو نچوک اوت؟ کویمای، یانمای، بریان بولدوم
محبتنی آتین ایشیتیب کریان بولدوم
کوزی کریان مرادیغه ینار دوستلار
زار ییغلابان زار اینکرا کیل رحمی کیلسون
یول اداشنک رحمی کیلیب یولغه سالسون
آمین دینکلار پیر مغان قولونک آلسون
خدمت قیلغان مرادیغه یتار دوستلار

زمانه آخر بولدی خویونک کیتی
 رسول الله وعدهلاری یاوق ییتی
 خاص قوللاری یخشی سوزکا قولاق توتی
 یمان قوللار کوندین کونکا بتر دوستلار
 کل یوم بتر دیدی حق مصطفی
 امت بولسنگ قولاق سالغیل اهل وفا
 یخشیلارنی اجرین بیرور بدکا جزا
 قیامت کون جزالارین تارتار دوستلار
 فاسق، فاجر هوا قیلیب ییرنی باسماس
 روزده نماز قضا قیلیب مسواک آسماس
 رسول الله سنتلارین کوزکا آلماس
 گناهلاری کوندین کونکا آرتار دوستلار
 دنیادارلار مالین کوروب هوا قیلور
 من - من لیک دین اول دعوی خدا قیلور
 اولار وقتده ایمانیدین جدا قیلور
 جان برارده حسرت برلان کیتار دوستلار
 قموغ دنیا یقانلارنی والله کوردوم
 اولار وقتده قلا ی سین دیب حالین سوردوم
 شیطان ایدی ایمانی غه چنکال اوردوم
 جان چیغاردده ییغلای ییغلای کیتار دوستلار
 قول خواجه احمد عاشق بولسنگ جانینک کویسون
 صدقینک برلان الله دیکیل تنکری بیلسون
 دعا قیلغیل مؤمن قوللار دنیا قویسون
 دنیا قویغان آخرتقه یتار دوستلار

محبت‌نی شرابی‌دین ایچورمسه
 جان، دلیم حسرت بیلان کیتار دوستلار
 الله یادین ورد ایلامای اولوب کیتسام
 ایسز عمروم ارمان برله اوتار دوستلار
 الله دیکان چین عاشقلار براق مندی
 معشوقیدن محنت یتسه بویون سوندی
 طریقت‌نی بازارینده جولان قیلدی
 حقیقت‌نی دریاسیدین اوتار دوستلار
 حقیقت‌نی دریاسیدین آغان کشی
 اوزی مونکلوغ، کونکلی سینوق، کوزده یاشی
 خوارلیق، زارلیق، مشقت‌دور دایم ایشی
 دیدارینی طلب قیلیب تاپار دوستلار
 حقیقت‌لیغ عاشقلارنی نفسی اولوک
 اوچ یوز آلتیش، تورت یوز قرق تورت همه سلوک
 سوزی شرین خلق خوشی یوز مینک تورلوك
 بو دنیانی پوچک پل‌غه ساتار دوستلار
 عارف، عاشق بولای دیسنگ الم تارتغیل
 حق وصلی‌غه یتای دیسنگ تونلار قاتغیل
 بو دنیانی عشرتی‌نی تاشلاب آتغیل
 تاشلاب آتسنگ ما و من لیک کیتار دوستلار
 قیامت‌نی شدتی‌نی بیلماکانلار
 قاتیغ عذاب تار لحد‌دین قورقماغانلار
 حق قهریدین قورقوب یاشین توکماکانلار
 دوزخ ایچره یوز مینک عذاب تارتار دوستلار

وا دریغا اوتی عمریم بیلالمادیم
 جاندین کیچیب حضرت سری بارالمادیم
 نفسدین کیچیب حق امرینی قیلالمادوم
 اولوب بارسام حسرت منکا یتار دوستلار
 اوتی عمروم شریعت کا یتالمادیم
 شریعت سیز طریقت کا اوتالمادیم
 حقیقت سیز معرفت کا باتالمادیم
 قاتیغ یولدور پیرسیز نیچوک اوتار دوستلار
 قول خواجه احمد نفسیم سالدی اوشبو یولغه
 آنینک اوچون قاچتیم دوستلار چولدین چولغه
 الله دیب هیچ باقمادیم اونک سولغه
 الله دیکان شوق شرابین ایچار دوستلار

(۳۸)

حکمت

یراتقان بیر و باریم یولین ایزلاب
 شیطان لعین یول لاری دین قایتینک دوستلار
 اخلاص برلان محبتنی جامین ایچیب
 جان و دلده حیّ ذکرینی ایتینک دوستلار
 حیّ ذکرین ایتیپ ایچکان جام شراب
 یول اوستیده عزیز باشی مثل تراب
 الله اوچون حالی خراب. بغری کباب
 جان و دلده حیّ ذکرینی ایتینک دوستلار
 آستانه غه باشیم قویوب زاری قیلسام
 حلقه قوروب کیم ذکر ایتسه یاری بیرسام
 ذکرین ایتیپ اول صحبتده درلار تیرسام
 جان و دلده حیّ ذکرینی ایتینک دوستلار

عمل قىلماي عالم علمين باسيب يوركاي
 اولوب بارسه تار لحدده جاني كويكاي
 الله رسول دينيك كيمديب هيبت قىلكاي
 جان و دلده حيّ ذكريني ايتيك دوستلار
 منكر - نكير "من رَبُّكَ" ديب سؤال قىلغاي
 قال علميدين بير نكتهسى كار قىلماغاي
 وا حسرتا عمل سىزلار نيچوك قىلغاي
 جان و دلده حيّ ذكريني ايتيك دوستلار
 الله ديكان قند و غسل پيدا قىلدى
 آخرتده الله برله سودا قىلدى
 عمل قىلغان چين عالمنى دانا قىلدى
 جان و دلده حيّ ذكريني ايتيك دوستلار
 قالينك چراغ، حالينك پلته، ياغى ياشينك
 نچه ايتسام بهره آلمس كونكلى تاشينك
 يول اوستيده تفراق بولسون عزيز باشينك
 جان و دلده حيّ ذكريني ايتيك دوستلار
 ايسز عالم عمل قىلماي يولده قالور
 اوقوب - اوقماي دنيا مالين قولغه آلور
 من - من ليكيدين ايسز عمرين ضايع قىلور
 جان و دلده حيّ ذكريني ايتيك دوستلار
 ظاهر بوزوب باطن توزه عالم بولسك
 روز محشر قولونك توتقاي تانكلار بارسك
 وا ويلتا ندامت ديب يولده قالسك
 جان و دلده حيّ ذكريني ايتيك دوستلار
 عالم اولدور، نماز اوقوب طاعت قىلسه
 حقدن قورقوب آخرتني غمين ييسه
 قرآن اوقوب حقدن قورقوب زاراينكراسه
 جان و دلده حيّ ذكريني ايتيك دوستلار

آنداغ عالم ايكي گوزي گريان بولور
 سحرلاري ايرته قوپوب نالان بولور
 حق يولیده کویوب یانیب بریان بولور
 جان و دلده حی ذکرینی ایتینک دوستلار
 خوارلیق تارتقیل کافر نفسینک باشی قاتسون
 دایم مدام بو دنیادین ییغلاب اوتسون
 تفریق بولغیل عالم سنی باسیب اوتسون
 جان و دلده حی ذکرینی ایتینک دوستلار
 خوارلیق تارتیب حق مصطفی امت دیدی
 عاصی جافی امتلارین غمین ییدی
 آنک اوچون امتلاری قوت آلدی
 جان و دلده حی ذکرینی ایتینک دوستلار
 امت اوچون بغریده یوق ذره بوتون
 امت دیسه دماغی دین چقاي توتون
 حق تعالی قیلغایمو دیب بیزنی اوتون
 جان و دلده حی ذکرینی ایتینک دوستلار
 قول خواجه احمد آلاي دیسنک حقدین اولوش
 بایزیددیک نفسینک بیله تون کون اوروش
 ای بیخبر امت ایرسنک بولدور روش
 جان و دلده حی ذکرینی ایتینک دوستلار

(۳۹)

حکمت

دیدار اوچون جان نی قربان قیلماکونچه
 اسماعیل دیک دیدار آرزو قیلمنک دوستلار
 جاندین کیچیب طریقت کا کیرماکونچه
 عاشق مندیب یالغان دعوی قیلمنک دوستلار

عاشق ليق اولوغ دعوى قيلسنىك مونى
 محنت برله سنار ايرميش موليم سيني
 رنج محنت برله بولسنىك تونى - كونى
 معشوقينكىدين كونكل اوزكا قيلمنىك دوستلار
 منليك برله طريقتكا كيرمادى لار
 جاندين كيچماي يولغه قدم قويماي لار
 نفس اولتورماي تسليم فنا بولماي لار
 خام طمع ليغ برله يولغه كيرمنىك دوستلار
 اوشبو عشقنى يولى تسليم بولمق ترور
 مونده يغلاب آخرتده كولماق ترور
 كل رنىك لارى زعفران ديك سولماق ترور
 مونداغ بولماي عاشق منديب ايتمانك دوستلار
 مرشدلارنى خدمتىنى قيل اختيار
 اوزلوكومدين يولغه كيرديم ديمه زنهار
 يخشى بيلسنىك طريقتنى خطرى بار
 قلاوزسىز اوشبو يولغه كيرمنىك دوستلار
 مرشدلاركا خدمت قيلسنىك نفسكا آفت
 تيكمه نادان بو يوللارده قيلمس طاقت
 صادق قوللار بو يوللارنى بيلور راحت
 تريك اولماي ديدار آرزو قيلمنىك دوستلار
 الكذاب لا امتى ديدى سيزكا
 اول محمد حق رسولى ديدى بيزكا
 يالغانچى غه جنت يوقتور والله آنكا
 يالغان سوزلاب ايمانسىزين كيتمنىك دوستلار
 خانمانين ترك ايتمايين كورمس ديدار
 ديدار كوراي ديكان عاشق بولور بيدار
 آنداغ عاشق آخر كوركاي آنده ديدار
 ديدار كورماي سردين خبر توبنمك دوستلار

سردین معنی تویماکانلار بیکانه دور
 اول عاشقنی مکان لاری ویرانه دور
 عشق یولیده جان بیرکانلار جانانه دور
 جاندین کیچمای جاندین خبر بیلمنک دوستلار
 قول خواجه احمد اوزدین کیچمای دعوی قیلمه
 خلق ایچیده عاشق من دیب تیلکا آلمه
 عاشق لیغ اولوغ ایشدور غافل بولمه
 غافل بولوب حق دیدارین کورمنک دوستلار

(۴۰)

حکمت

محبتنی جامین ایچیب رقص ایلاکان
 دیوانه لیغ مقامی غه کیردی دوستلار
 آج و توقلوق سود و زیان هیچ بیلמן
 سرمست بولوب رقص سماع اوردی دوستلار
 رقص سماع اورکانلارکا دنیا حرام
 اهل عیال خانماندین کیچتی تمام
 سحر وقتده حقه سیغنیب ییغلار مدام
 آندین سونکره رقص سماع اوردی دوستلار
 رقص سماع اورکان عاشق اوزین بیلماس
 بیهوش یورار دنیا مالین قولغه الماس
 یوز مینک آدم تقصیردیه مغرور بولماس
 دنیا تیغیب رقص سماع اوردی دوستلار
 دنیا تیغمای رقص سماع اورکان جاهل
 حق یادینی بر دم ایتمای یورور غافل
 درویش من دیر دنیا سری کونکلی مایل
 دنیا اوچون رقص سماع اوردی دوستلار

اوزدین کیتمای رقص سماع اورمق خطا
 سبحان ایکان انکا قیلمس ایمان عطا
 طاعت قیلسه دل لارینی قیلمس صفا
 ریا قیلیب رقص سماع اوردی دوستلار
 وای اوشنداغ نادانلاردین امید قیلمانک
 فیض فتوح الور من دیب یوکروب یلمنک
 نفسی اولوغ شرعی بوزوغ ولی بیلمنک
 شیطان لعین نوخته اورمای مندی دوستلار
 اوزدین کیتمای رقص ایلاسه الله بیزار
 سماعیدین یریر تبرانیب تارتقای آزار
 دعا قیلای کورساتمسون انکا دیدار
 دین دین کیچیپ رقص سماع اوردی دوستلار
 دیوانه لیغ غالب کیلمای سماع اورار
 حق مصطفی چهار یار دین بیزار یورار
 باشدین ایاغ کنه لاری حاضر تورار
 کنه تیلاب رقص سماع اوردی دوستلار
 شبلی عاشق سماع اوردی پرتو کوروب
 مصطفی نی حاضر کوروب سؤال سوروب
 دنیا عقبین آرقه تاشلاب کوزین یوموب
 انداغ قول لار رقص سماع اوردی دوستلار
 شبلی عاشق ییغلاب ایدی ایا رسول
 بیطاقت من سماع اورسام هم من ملول
 رسول ایدی انشاء الله قیلکای قبول
 رخصت تیلاب رقص سماع اوردی دوستلار
 قول خواجه احمد رقص سماع هر کیمکایوق
 تقلید برله اورسه کیرکای تموق
 بو روایت پنهان ایردی ایتسام قموق
 حقنی تاپیب رقص سماع اوردی دوستلار

شریعتنی شرایطین بیلکان عاشق
 طریقتنی مقامی نی بیلور دوستلار
 طریقتنی ایشلارینی ادا قیلیب
 حقیقتنی دریا سیغه باتار دوستلار
 دیدارینی کوروب بولمس تون - کون اویوب
 پاک عشقنی قولغه آلمای بولمس یوروب
 حقیقتنی دریا سی نی خطری کوب
 هیچ اوخلامای دیدارینی کوردوم دوستلار
 ایا عاشق بو دنیاده محنت تارتقیل
 تارتقان جور و جفالارنی راحت بیلکیل
 هو صحبتین قورغان بیرکا اوزونک اورغیل
 اورکان عاشق مرادیغه یتار دوستلار
 بو یوللارنی غذاسی دور قیغو محنت
 محنت تارتیب جفا چیکان کورار راحت
 سحرلارده زاری قیلغان خوش سعادت
 هو - هو تیو بو دنیادین اوتار دوستلار
 چین دل برله ییغلاغانلار کورکای لقا
 سبحان ایکام دیدارینی قیلغای عطا
 قلاوزسیز یولغه کیرمنک عین خطا
 یولغه کیرکان منزللاردین اوزار دوستلار
 وا دریغا اوتی عمروم بیلمای قیلدیم
 بو دنیا اسبابی نی قولغه آلدیم
 دنیا ایزلاب دین ایشینی آرتقه سالدیم
 بیلالمس مین حالیم نیچوک بولور دوستلار

محبتنى شرابى دین تاتماغانلار
 بايزيد ديك هر گون اوزين ساتماغانلار
 بو دنيانى عزتى دین اوتماكانلار
 حيوان ايرور بلکه آندین بتر دوستلار
 عاشق بولسنىك عشق يوليغه قويغیل قدم
 دنيا عقبين طلاق قويغیل مثل ادهم
 عاقل ايرسنىك دنيا اوچون ييماكيل غم
 قيامت گون جزالارين بيرار دوستلار
 سر شرايين ايچكان عاشق اوزين بيلمس
 بو دنيانى عزت لارين كوزكا ايلمس
 يوز مينك دانا ناصح بولسه پندین آلمس
 وا شوقا ديب اوزين بيلمای يورار دوستلار
 روز الست خدا اوزى ندا قيلغان
 "قالوا بلى" دييان روح لار جواب بيركان
 حضرت تبا روح لار اوچوب قارشو كيلكان
 انداغ عاشق حق جمالين كورار دوستلار
 قول خواجه احمد عاشق بولسنىك دنيا قويغیل
 آخرتنى عذابى دین قايعو ييكيل
 ايرانلارنى قيلغانلارين سين هم قيلغیل
 خدمت قيلغان آخر مراد تاپار دوستلار

(۴۲)

حکمت

حقہ يانيب مؤمن بولسنىك طاعت قيلغیل
 طاعت قيلغان حق دیدارين كورار دوستلار
 يوز مينك بلا باشقه توشسه اينكرانمكيل
 اندین سونكره عشق سرينى بيلار دوستلار

عاشقلاری زار اینکرا بان یولغه کیردی
 هر نه جفا تیکسه آنی حق دین بیلدی
 راضی بولوب بیر آستیغه حاضر بولدی
 زار ییغلابان سحرلارده قوپار دوستلار
 ایا دوستلار هیچ بیلدیم من یولومنی
 سعادته باغلامدیم من بیلیمنی
 غیبت سوزدین هیچ ییغمادیم من تیلیمنی
 نادانلیقیم منی رسوا قیلدی دوستلار
 کیچه - کوندوز بی غم یوردوم ذکرین ایتمای
 جهد ایلابان تونی - کونی فکرین ایتمای
 محبتنی بازارینده اوزنی ساتمای
 نفسیم منی یوز مینک طعام تیلار دوستلار
 نفسینکنی سن اوز رأیی کا قویمه زینهار
 ییمای، ایچمای، طاعت برله بولغیل بیدار
 آخر بیر کون کورساتکوسی سنکا دیدار
 بیدار بولغان انده دیدار کورار دوستلار
 ایا غافل حق ذکرینی تیلدین قویمه
 دنیا لیق دین بیر ذرّه سین قولغه آلمه
 ایرانلارنی آرقاسیدین هرکز قالمه
 یولغه کیرکان آخر مراد تاپار دوستلار
 وا دریغا ارمان بيله عمریم کیچتی
 نفسیم منی طغیان قیلدی حد دین آشتی
 جانیم قوشی پرواز قیلسه روحوم قاجتی
 غافل یورکان عمرین ییل کا ساتار دوستلار
 دیدار کورای دیکان قوللار بیدار بولور
 یورسه، قوبسه، یاتسه، تورسه، ذکرین ایتور
 ایچی تاشی انداغ قولنی نورکا تولور
 الله نورین انداغ قولغه ساچار دوستلار

عارف عاشق اوز جانینی اوتقه یاقمس
 بی دردلارکا عشق چیقماقین یاقیب چیقمس
 دنیا کیلیب جلوه قیلسه قیا باقمس
 عشق سیز کشی بهایمدین بتر دوستلار
 قول خواجه احمد بنده بولسنگ ییغلاب یورکیل
 محبتنی مجلسی غه اوزونک اورغیل
 قیامتنی شدتیدین ماتم قورغیل
 ماتم قورغان سردین خبر آلور دوستلار

(۴۳)

حکمت

روح قوشینی تترار بولسه بال پری
 پرواز قیلیب عرشدین عرشقه قونار دوستلار
 قول مین دیکان دایم تینمای ذکرین ایتار
 عشق اوتی غه بغری کویوب فریاد ایتار
 بیخبرلار عمرین ییلمای ییل کا ساتار
 غفلت برلان جهنم کا کیتار دوستلار
 آخر زمان شیخی توزار صورتلارین
 زهد تقوی قیلمای بوزار سیرتلارین
 کرامت دیر خواب غفلت رؤیتلارین
 ریا برله خلقه اوزین ساتار دوستلار
 ایا غافل عمرینک سنی اوتار ییل دیک
 کوز یاشینکنی آقوزدایم آب سیل دیک
 سینی سویار درکاهیده مثل قول دیک
 خواجه سویسه سینی آزاد ایتار دوستلار

غفلت برله عمرينك سنى اوتار بيلكيل
 جانينك برله پير خدمتين توروب قيلكيل
 اندين سونكره دركاهى كا لايق بولكيل
 خدمت قيلكان مراديغه يتار دوستلار
 قول خواجه احمد حكمت ايتيب ييغلا سحر
 ايرانلارنى الفاظى دين آليب خبر
 سوز اصلنى بيلكانلاركا اصل گوهر
 ظاهريغه باقغان قوروغ قالار دوستلار

(۴۴)

حكمت

كيلينك دوستلار الله يادين دايم ايتينك
 الله يادى كونكل ملكين آچار دوستلار
 استغفر استغفارنى تينماي ايتينك
 شيطان لعين تن ملكى دين قاجار دوستلار
 شيطان لعين سيزكا دشمن حاضر بولونك
 كيچه الله كوندوز الله، ايتيب كويونك
 تار لحدكا كرار وقتده نوركا تولونك
 ملايك لار الله نورين ساجار دوستلار
 الله نورى قبر ايچىنى روشن قيلكاي
 ملايك لار تيكراسيده روزن قويكاي
 مؤمن بنده كوروب آنى حيران قالكاي
 بو عالمنى روشنيدين كيچار دوستلار
 بارچه ارواح يغيليب كيلكاي مبارككا
 خلایق لار مشغول بولكاي تبارككا
 دعا قيليب يانغاندين سونك قالوريكا
 جمله ارواح سويونوب بر بر قوچار دوستلار

ييتى قدم قويغاندين سونك منكر نكير
هيت برلان كيريب كيلكاي قليب قهير
ايكى كوزى اوتديك يانيب اوقراب تورير
نورين كوروب تعظيم قليب قاچار دوستلار
منكر نكير سورماي چيقيب ناله قيلغاي
كوز ياشيني آقوزوبان ژاله قيلغاي
حق ياديني آئيپ اوزين واله قيلغاي
پرواز قليب هوا سري اوچار دوستلار
ندا كيلكاي الهيم دين نه ييغلادينك
خاص قولوم دين قبر ايچنده نه تينكلادينك
اي بي ادب قولاق ساليب نه آنكلادينك
منكر نكير اونك سونكى كا قاچار دوستلار
يورسه، تورسه، ياتسه، قوبسه ميني ياديم
خط برات قولغه آلغان اول آزاديم
انداغ قولنى صيدى دور من، اول صياديم
قىلميش، ايتميش كناهلارين كيچار دوستلار
كناهلارين حق باغيشلاب نظر قيلغاي
اونكده، سونكده ياتقانلارى شاكِر بولغاي
اندين سونكره بارچه ارواح حاضر بولغاي
قبرستانغه حق رحمتين ساچار دوستلار
بحمد الله يخشى كىلدى بيز قوتولدوك
قبر ايچنده هر عذابدين فارغ بولدوك
نيچه يىللار مرده ايردوك باز ترىلدوك
دعا قليب حقه ايلكين آچار دوستلار
منكر نكير ييغلاب ايتورسين بيلورسين
ذاتينك اولوغ هر نه قىلسنك سين قىلور سين
لطف ايلاسنك يول سزلاركا يول بيورورسين
سجده ايلاب شاكِر تيلين آچار دوستلار

لَا إِلَهَ إِلَّا اللَّهُ غه شیدا بولغان
 دیدار اوچون بو عالمده رسوا بولغان
 دنیا قویوب آخرت نی سودا قیلغان
 حوض کوثر شرابی دین ایچار دوستلار
 روز ازل تقدیر قیلسه حق جمالی
 یوز مینک شیطان قصد ایلاسه یوق زوالی
 کوندین کونکا زیاد بولغای قال و حالی
 دانا بولوب حق یوللارین آچار دوستلار
 محبت نی میدانیده جولان قیلغان
 حقیقت نی دریاسیدین کوهر آغان
 معرفت نی مناعی نی ایچکا سالغان
 یورسه، تورسه، دُر و گوهر ساچار دوستلار
 عاشق اولدور حقه جانین قربان قیلسه
 ذکرین ایتیپ چهار ضرب اوروب سحر تورسه
 ایرانلاردین فیض فتوح توله آله
 سلطان بولوب دُر و گوهر ساچار دوستلار
 حق تعالی بویین آغان مونده تورمس
 دعوی قیلیب ایشانلیق نی لافین اورمس
 قاید بارسه فقیر مسکین دوکان قورمس
 غریب بولوب ویرانه غه کوجار دوستلار
 قول خواجه احمد نفس دین اولوغ بلا بولمس
 ییر و کوکدین طعمه بیرسنگ هرکیز توبمس
 تفراق اولوب ییرده یاتسنگ کافر اولمس
 نفسی اولکان حور غلمان قوجار دوستلار

حکایتده بیلینک مونداغ کیلتوردیلار
 "بابا ماچین" اول سلطاننی ییتکوردیلار
 خراسانده تورت یوز یاشنی یاشادیلار
 یکرمه تورت یغاچ هر کون اوچار دوستلار
 ایشتی "بابا ماچین" اول زمانده
 احمد آتلیغ بیر شیخ چیقمش ترکستانده
 صحبت قیلیمش قیز و جوان برلان انده
 منع ایتکالی ترکستانغه کیلدی دوستلار
 کیلدی ایرسه کوردیلار اول مشایخنی
 سین شیخ موسین آزغورغوچی خلایقنی
 اوشل آیغان کمرادهور من بیلکیل مونی
 تیو حضرت آنکا جواب بیردی دوستلار
 امر ایتیلار حکیم خواجه سلیمانغه
 اوشل صوف محمدی دانشمندغه
 باغلاب اورونک بیش یوز قمچی اول نادانغه
 بر ستونغه محکم باغلاب قویدی دوستلار
 یوز کشی کیلسه توتا بیلمس ایدی
 ایکی کشی توتوب آنی هم باغلادی
 اوشل دمده بیش یوز قمچی سیناب اوردی
 نه آد دیدی، نه واه دیدی، بیلینک دوستلار
 یلانکاج قیلیب آنی باغلاب قویدی
 بیش یوزدین بیر قمچینی آرتوق اوردی
 بیر قمچیده زار ییغلابان فریاد قیلدی
 انا احمد ییشتوروبان قویدی دوستلار

اوڭل دمدە مریدلاری قیلدی سؤال
 بیش یوز قمچی اورغانده یوق هیچ قیل و قال
 بیر قمچی نی اوردی ایرسه بولدی بیحال
 سر نیدور دیب اصحاب انده سوردی دوستلار
 اتا ایدی آرقاسیده دیو پری
 اورناب ایردی بیش یوز قمچی آنکا تیکدی
 دیو پری آرقاسیدین در حال کوچتی
 بیر قمچی سی آنکا تیکدی بیلینک دوستلار
 "بابا ماچین" اولدوم ایدی وا احمد
 کیلمسم رسوا بولوب خلقلار آرا
 اولایا ایردیم اوشبو حالت برلان منا
 زار ییغلابان عرض حالین ایتی دوستلار
 اتانینک ایرلیکی نی انده بیلدی
 ریاضت تارتقوزوبان یول کورساتی
 اتا برله اوچ مرتبه خلوت کیردی
 مراد مقصد پیردین ایرمیش بیلینک دوستلار
 مرشد بولمای هرکز مراد تابمادیلار
 خدمت قیلمای حقه واصل بولمادیلار
 زار ییغلابان کیچه بیدار بولمادیلار
 زار ییغلامای حق دیدارین کورمس دوستلار
 یاد ایتالوک قول "خواجه احمد" اولیانی
 مریدلاری "بابا ماچین" اول سلطان نی
 قوللاغایمو عاصی یوسف بیضاوی نی
 نظم ایلادیم بو حکایت بیلینک دوستلار

(۴۶)

حکمت

خضر بابام سالدی مینی اوشبو یولغه
آندین سونکره دریا بولوب تاشتیم دوستلار
شریعت نینک بازارینی سیران قیلدیم
معرفت نینک بوستانیده جولان قیلدیم
طریقت نینک پیشگاهنده طیران قیلدیم
حقیقت نینک ایشیکینی آچتیم دوستلار
الست خمرین پیر مُغان تويا بیردی
ایچار بیردیم مقداریم چه قویا بیردی
قول خواجه احمد ایچ و تاشیم کویا بیردی
طالب لارکا دُرّ و گوهر ساجتیم دوستلار

(۴۷)

حکمت

قایو مخلوق خالقیغه مطیع بولسه
عالم خلقی اوشل قولنی سویار دوستلار
یادین ایتیپ بغری پیشیب ایچی کویسه
دم اورسه سانسیز اوچقون اوچار دوستلار
تیلی کونکلی سری برلان ذاکر بولوب
اوج یوز آلمیش تمورلاری قانغه تولوب
یازی قیشین بلبل لارین واله بولوب
سیرایو شاخ دین شاخقه قونار دوستلار
بو کونکل بوستانیدور عجب بوستان
ایچنده سیراشورلار هزار دستان
کورونور هر شاخ اوزره تورلوك الوان
نعمت لارنی بیشکانینی کورار دوستلار

ظاهر نعمت شکرینی غافل بیلماس
 باطن داغین قیاس برله کورسه بولماس
 ظاهر کوزی غفلت برله باقیب کورماس
 ظاهر کوزی آچلسه اول کورار دوستلار
 باطن کوزی آچلسه جمله پرده
 آجلور کیتار، قالماس حجاب سرده
 جان نینک کوزی حیران بولور اوئل ییرده
 باقیب ایمان نوری برله کورار دوستلار
 قول "خواجه احمد سوی" نینک اوئشو سوزی
 عجب ایرمس باقیب کورسه سردین کوزی
 فنالیق مقامینده اوزنینک اوزی
 فنالیق ایچره باقیب کورار دوستلار

(۴۸)

حکمت

خوش غایب دین ییتوشتی بر جماعه درویشلار
 باطینده "هو" - دیرلار سری پنهان درویشلار
 تینمای روان یورارلار تنسه تکبیر ایتورلار
 تابسه صحبت قورارلار خوش صحبت لیغ درویشلار
 جندهلاری پر صلاح تسبیح لاری الا الله
 خدمت قیلور هر صباح بلا خوردور درویشلار
 ژندهلاری کیرجفان کونکلیده یوز مینک ارمان
 اوئشو دنیا بی پایان کوزکا ایلمس درویشلار
 ژندهلاری ایکنیده، عصالاری ایلکیده
 ایزد یادی کونکلیده الله دیور درویشلار
 اصلی فقیر بیلسهلار وجود شهرین کیزسهلار
 ظاهر - باطن تورسهلار سعادتلغ درویشلار

مشایخ لار سراسرار خدمتیده بول زینهار
 پیغمبردین یادکار قالغان ترور درویشلار
 قول خواجه احمد مسکین بول، مسکین لاردین معنی سور
 درویشلیکنی بیل حضور "هو" قوشیدور درویشلار

(۴۹)

حکمت

یول اوستیده اولتوروب یولنی سورکان درویشلار
 عقیدین خبر ایشتیب یولغه کیرکان درویشلار
 عصالاری ایلکینده، همت قوری بیلینده
 ایدیم یادی تیلینده الله دیکان درویشلار
 خرقلاری کیرچقان کونکلیده یوز مینک عیان
 بیلینکز ایکی جهان کوزکا ایلمس درویشلار
 درویش حقنک منظوری ذکر تورور کلزاری
 حقنی یادی اسراری خوب ادبلیغ درویشلار
 یازوقوم کوب یولاتمس اسباب داروسین تابماس
 کوزده یاشین قوروتمس یاشی اققان درویشلار
 سری برلان سوزلارلار تیلکا حکمت توزارلار
 عشق برلان جان کزارلار رنکی سریغ درویشلار
 ایت نفسینی اولدورور قیزیل یوزین سولدورور
 خواجه احمد قول بوتورور ساتیب یسون درویشلار

(۵۰)

حکمت

اون سیکز مینک عالمده حیران بولغان عاشقلار
 تابمای معشوق چراغین سرسان بولغان عاشقلار
 هر دم باشی اورگولوب کوزی حلقه تیلوروب
 "هو - هو" تیو جور کولوب کریان بولغان عاشقلار

کویوب. یانوب کل بولغان. عشقیده بلبل بولغان
 کیمنی کورسه قول بولغان. مردان بولغان عاشقلار
 یول اوستیده خاک بولغان سینهلاری چاک بولغان
 ذکرین ایتیپ پاک بولغان نالان بولغان عاشقلار
 همّت قورین باغلاغان یورک بغرین داغلاغان
 فریاد اوروب ییغلاغان کریان بولغان عاشقلار
 کاهی یوزی سارغایب کاهی یولیده غریب
 تسبیحلاری یا حبیب جولان بولغان عاشقلار
 احمد سین هم عاشق بول صدقینک برله صادق بول
 درکاهی کا لایق بول جانان بولغان عاشقلار

(۵۱)

حکمت

غریب لیغده غریب بولکان غریبلار
 غریبلار حالینی بیلکان غریبلار
 سبب برله یراق بیرکا باریبان
 قرینداش قدرینی بیلکان غریبلار
 سوساکانده سوکا محتاج بولغان
 تریکده زار اولوب اولکان غریبلار
 کشی بیلمس غریبلار حالی نیدور
 مکر بیلکای غریب بولغان غریبلار
 غریب لیغ قاتیغ ایشدور ای عزیزیم
 کیم اول بی قدر اولار مسکین غریبلار
 کیل ایمدی احمد اوزونکا باقغیل
 غریب سین سین غریب مسکین غریبلار

(۵۲)

حکمت

حق قول لاری درویشلار حقیقتنی بیلمیش لار
حقه عاشق بولغانلار حق یولیغه کیرمیشلار
حق یولیغه کرکانلار الله تیو یورکانلار
ایرانلار ایزین ایزلاب مملکتدن دین کیچمیشلار
عالم فخری مصطفی انداغ ایدی مرحبا
معراج تونی ایتی فخر فقیر یولی نی آلمیشلار
کونکل بیرمای دنیاغه شروع قیلمای حرامغه
حقنی سویکان عاشقلار خلایق دین کیچمیشلار
دنیا مینیک دیکانلار جهان مالین آغانلار
کرکس قوشدیک بولوبان اول حرامغه باتمیشلار
ملا، مفتی بولغانلار ناحق دعوی قیلغانلار
آقنی قرا قیلغانلار اول تموغه کیرمیشلار
قاضی، امام بولغانلار نا حق دعوی قیلغانلار
اول حماردیک بولوبان یوک آستیده قالمیشلار
حرام یکان حاکملار رشوت آلیب یکانلار
اوز بارماقین تیشلابان قورقوب توروب قالمیشلار
تاتلیغ - تاتلیغ یکانلار تورلوک - تورلوک کیکانلار
آلتون تخت اولتورکانلار تفراق آستین قالمیشلار
مؤمن قوللار صادق لار صدقی برله تورکانلار
دنیاغین صرف ایتیپ اوچماخ حورین قوچمیشلار
قول خواجه احمد بیلمیش سین حق یولیغه کیرمیش سین
حق یولیغه کیرکانلار حق دیدارین کورمیشلار

(۵۳)

حکمت

هر حلقه‌سی قورولدی ای درویشلار کیلینکلار
حق سفره‌سی یایلدی آن‌دین اولوش آلینکلار
"قال" علمنی اوقوبان "حال" علمکا ییتیان
یوقلوق ایچره یاتیان بارلیقلاردین آلینکلار
یرتیب شفقت پرده‌سین تیلاب دیدار وعده‌سین
آچیب کونکل دیده‌سین مشاهده قیلینکلار
"هو" اَرده‌سین آلیبان نفس باشیغه سالیبان
تونى - کونى طالبلار جاننى قربان قیلینکلار
حلقه ایچره هو دینکیز عشق اوتیغه یانینکیز
تن جان برلان طالبلار تکبیر باشلاب ایتینکلار
"هو - هو" تیو زار اینکراب "هو" دیمکده معنی بار
دیدارین امید وار رحمتیدین آلینکلار
قول خواجه احمد قول بولغان یول اوستیده کل بولغان
طالب لارغه مل بولغان اندین عبرت آلینکلار

(۵۴)

حکمت

قد علمنا انت فی کل امور
انت کافی، انت عافی، یا غفور
کافی فی الغیب هو من فی الحضور
انت کافی، انت عافی، یا غفور
مصطفی در حالت نزع ایردیلا
بیر کروهنی عاصی دیب قایغوردیلا
امتیم وای، امتیم دیب ایدیلا
انت کافی، انت عافی، یا غفور

بیزنی سویدی اوزکالارنی سویمدی
 هم اتا اناسی نی هم سویمدی
 یرلقادیم دیما گونچه قویمدی
 انت کافی. انت عافی، یا غفور
 حق تعالی دین ندا کیلدی آنکا
 امتینک اشین حواله قیل منکا
 جمله سین باغشلایین انده سنکا
 انت کافی. انت عافی، یا غفور
 ایدی مندین سونکره امت بولغوسی
 فرض و سنتنی قویوب فسق ایتکوسی
 اکثر امت دین ایمان کیتکوسی
 انت کافی. انت عافی، یا غفور
 امتیم امتلار ایچره صافی دور
 نیلایین کوبراکی عاصی، جافی دور
 قادریم اوز وعده سیغه وافی دور
 انت کافی. انت عافی، یا غفور
 مسکین احمد سین بو یازوق زهریدین
 قوتولونک ایچسنک شراب مهریدین
 کرچه کوب قورقوم الهیم قهریدین
 انت کافی. انت عافی، یا غفور

(۵۵)

حکمت

محمدنی بیلینک ذاتی عرب دور
 طریقتنی یولی کل ادب دور
 حقیقت بیلمکان آدم ایمس دور
 بیلینکز هیچ نیمه کا اوخشاماس دور

بیلینک بیچون ایرور هم بی چکونه
 و بی شبهه ایرور هم بی نمونه
 قهرلانسه قیلور ییر برله یکسان
 بولادور زلزله ییر برله آسمان
 رحم قیلسه بیلینکیز رحمتی بار
 بیروور بولسه توکانمس نعمتی بار
 محمدنی صفت قیلسم کمینه
 آناسینی آتی بیلکیل امینه
 اتاسی آتی عبدالله ایکان دور
 آنادین توغمایین اولکان ایکان دور
 محمدنی باباسی ساقلاغان دور
 یلانکاچ آچلارنی یوقلاکان دور
 باباسین بیلسنکیز عبدالمطلب
 کونکلده ساقلاکای سیزیخشی بیلیم
 باباسینی اتاسی ایردی هاشیم
 ایشیتکانده آقادر کوزده یاشیم
 بیلینک تور تونچی سی دور عبد المناف
 آلارنی بیلسه هرکیم کونکلی دور صاف
 رسولنی بیلسه هرکیم تور ت پشتین
 قیامتده کزار سیکز بهشتین
 باباسی یتتی یاشیده اولوب دور
 رسولنی عمی سی کا بیرب دور
 ابوطالب علینی آته سی دور
 قاموغ اعرابی لارنی کاته سی دور
 ابوطالب بولادور ایش باشیده
 محمد اولتورور دایم قاشیده
 محمدنی یاشی اون یتتی بولدی
 که اول وقتده خدیجه آنی کوردی

محمدنی بیلینک کیم مثل شونقار
 خدیجه آنی کوروب بولادور زار
 خدیجه کونکلیده آنی سویادور
 محمد عشقیده ایچی کویادور
 کیچه - کوندوز تیلار آنی خدادین
 بیلینکیز عاقبت تابتی مرادین
 کورونکیزلار خدانی شیوه سینی
 محمد باقغان ایکان تیوه سینی
 خدیجه غه رسول چاکر بولوبتور
 بو باعث برله بیل آنی آلیب دور
 خدیجه نی خدا بختین آجیب دور
 رسولنی باشیغه دُرلار ساجیب دور
 رسولنی یاشلاری قرقه یتیب دور
 که اندین سونک خدادین وحی اینیب دور
 که آندین سونک محمد بولدی پادشاه
 رسولنی کونکلیده یار بولدی الله
 محمدنی ایشین الله بیتوردی
 خلایق بارجه سی ایمان کیتوردی
 رسولنی باشیده بولدی عمامه
 کمال تابتی اوتوز اوچ مینک صحابه
 رسول غه بارجه سی خدمت قیلادور
 ادب برلان یوروب عزت قیلادور
 رسول آلدیغه بیر یتیم کیلیب دور
 غریب و مبتلا مین دیب ایتیب دور
 رحم قیلدی رسول آنی حالیه
 تیلکانین آنی بیردی قولیغه
 رسول ایدی ایکامین هم یتیم مین
 یتیم لیکده، غریب لیغده یتیب مین

محمد ايدىلار هر كيم يتيم دور
 بيلينكلار اول ميني خاص امتيم دور
 يتيمنى كورسنگيز آغريتمنگيزلار
 غريبنى كورسنگيز داغ ايتمنگيزلار
 يتيملار بو جهانده خوار ايكاندور
 غريبلارنى ايشى دشوار ايكاندور
 غريبلارنى ايشى دايم سلوك دور
 تريك ايرمس غريب مثل اولوك دور
 خدايى غه غريبلار بيلكولوك دور
 غريبنى ايرته اخشام سوركولوك دور
 صفت قيلسام على شير خدادور
 كه شمشير برله كافرنى قرادور
 كافرلارنى قيلور ايمانغه دعوت
 برادور هر زمان اسلام كا قوت
 كه مؤمن بولغانين آليب كيلادور
 قبول قيلماغانين چاپيب كيلادور
 كه شمشير قولغه آليب مينسه دلدل
 توشادور قوم كافرلارغه غلغل
 قوليدهكى يراغى ذوالفقارى
 چاپوشقاندە اوزالور قرق قارى
 علىنى بار ايدى اون سيكز اوغلى
 آنى هر قايسىسى دور كاته توغلى
 على اسلام اوچون قانلار يوتادور
 كه اسلام توغىنى محكم توتادور
 "خواجہ احمد" بيل غريبليك كا توشوب دور
 رسول اولاديغه سوزلار قاتيب دور

(۵۶)

حکمت

کورکان زمان اینانکان ابابکر صدیق دور
اوستون یولوب تیانکان ابابکر صدیق دور
مونکلاشقانده ییغلاکان قوللوقغه بیل باغلان
ایچ بغری نی داغلان ابابکر صدیق دور
بیر قولیدین قیتماکان سرین هرکز ایتماکان
غافل بولوب یاتماکان ابابکر صدیق دور
جان جانانغه قاوشورکان قزین قولدین تابشورکان
قول قاوشوروب یالبارکان ابابکر صدیق دور
اینکان سوزیکا ییتکان نفس هوادین کیتکان
حق رسول نی برکیتکان ابابکر صدیق دور
محمدکا قین انا قیلکان ایمس هیچ خطا
بوینیغه سالغان پوطا ابابکر صدیق دور
قول "خواجه احمد" قیل تصدیق یار غارین قیل تفریق
عارف لیکده بیل صادق ابابکر صدیق دور

(۵۷)

حکمت

ایکنچی سی یار بولغان عدالت لیغ عمردور
مؤمن لیغده یار بولغان عدالت لیغ عمردور
بالاغه اذان ایتورکان شریعت نی بیلدورکان
دین سوزینی اوقتورکان عدالت لیغ عمردور
کعبه ایشیکین آچدرکان بارجه بتنی سندورکان
رسول کونکلین تیندورکان عدالت لیغ عمردور

شریعتنی پاس توتقان طریقتنی راست توتقان
 حقیقتنی خوب بیلکان عدالتلیغ عمردور
 اوغلین جرلاب کیلتورکان دره اوروب اولتورکان
 عدل قیلیب یول سورکان عدالتلیغ عمردور
 چراغ بولوب اوجماکان دین یولیدین یانماکان
 ناحق ایشنی ایتماکان عدالتلیغ عمردور
 مسکین "احمد" قیلکیل یاد قیلکیل عجزینکنی بنیاد
 شاید روحی شاد قیلکای عدالتلیغ عمردور

(۵۸)

حکمت

اوچونجی دوستی یار بولغان عثمان با حیادور
 هر نفسده یار بولغان عثمان با حیادور
 حق رسولنی دامادی دینمیزنی آبادی
 بندهلارنی آزادی عثمان با حیادور
 اوقوغانی شاطبی آیت حدیث کاتبی
 منبر اوزره خطیبی عثمان با حیادور
 مناجاتی کوه طور آغانلاری ایکی نور
 ایتکانلاری بارچه دَر عثمان با حیادور
 کوبلار کیلیب پیاده قویمادیلار شهزاده
 شهید قیلدیلار انده عثمان با حیادور
 توصیف قیلدینک عثماننی خواجه احمد سینانی
 یوقتور شک و کمانی عثمان با حیادور

(۵۹)

حکمت

تورتونچی سی یار بولغان شیر خدا علی دور
هم معراجده یار بولغان شیر خدا علی دور
ایتکان سوزی رحمانی کورسنگ یوزی نورانی
کافرلارنی قرآنی شیر خدا علی دور
همت قوری بیلیده مولیم یادی تیلیده
ذوالفقاری ایلکیده شیر خدا علی دور
منیب جیقسه دلدغه بیرکا توشار زلزله
کافرلارغه غلغله شیر خدا علی دور
دشمنلارکا مقابل بولدی کافرغه . قاتل
زایل قیلکان باطلنی شیر خدا علی دور
رحمت قیلکای بیر و بار هر نه قیلسه ایرکی بار
"خواجه احمدکا" مددکار شیر خدا علی دور

(۶۰)

حکمت

حکمت برلان اول عدم دین بار ایلادی
اون سکیز مینک قاموغ عالم حیران ایرور
"قالوا بلی" دیکان قوللار اولوش آلدی
سکوت ایتکان قوللار دینی ویران ایرور
حق تعالی ایمان عطا قیلدی بیزکا
اول مصطفی رسولی ایدی بیزکا
درود ایتسک قوّت برور دینمیزکا
یوق ایرسه قیلغانلاریم یالغان ایرور

اول "أَلَسْتُ بِرَبِّكُمْ" دیدی خدا
 "قالوا بلى" دیان روح لار قیلدی صدا
 ییغلاب کیلدوک ایشکینک کا جمله کدا
 لطف ایلاسنگ یوزمینک عاصی خندان ایرور
 توبه قیلسام کیچارمو کین قادر اله
 یوق ایرسه نیتکوم انده مین رو سیاه
 تانکلا بارسام ایلک آیاغ بارچه کواه
 حق قاشیده برجه ایشلار آسان ایرور
 ییغلامایمو اوتی عمروم ایا شاهیم
 قسب کیلدی قرانغولوق چیقیل ماهیم
 سندین اوزکا یوق پناهیم. تکیه گاهیم
 کیچه - کوندوز تیلاکانیم ایمان ایرور
 امت اوچون رسول دایم قایغو ییدی
 تیلاب امت کناهی نی حقدین آلدی
 کیچه - کوندوز قایم توردی تنکریم بیلدی
 تیلده امت مین دیر دلدہ یالغان ایرور
 امت بولسنگ مصطفی غه پی رو بولغیل
 ایغانلارین جان دلدہ سین هم قیلغیل
 کیچه قایم کوندوزلاری صایم بولغیل
 چین امت نی رنکی مثل سامان ایرور
 سنتلارین محکم توتوب امت بولغیل
 کیچه کوندوز درود ایتیپ الفت بولغیل
 نفس نی تیغیب محنت ییتسه راحت بیلکیل
 انداغ عاشق ایکی کوزی کریان ایرور
 قول "خواجہ احمد" نفس دین مدام سوا بولغیل
 کویوب پشیب دردی برلان ادا بولغیل
 کیچه - کوندوز تینمای ییغلاب کدا بولغیل
 دردین تارتسنگ خواجہ سیندین رضا ایرور

اوشبو سرنی بیلماکان جاهل کشی
 درویشلارنی قدرینی قاچان بیلور
 تیل اوچیده امت مین دیب دعوی قیلور
 مصطفی نی قدرینی قاچان بیلور
 طریقتنی لذتی دین تاتقان کشی
 دنیا سنی دین یولیده ساتقان کشی
 کیچه - کوندوز کوزده یاشی آققان کشی
 بو دنیانی قدرینی قاچان بیلور
 کیچه - کوندوز طاعت قیلسه اوشال عاشق
 بو دنیاده کناهی دین بولور فارق
 درویشلارنی غیبت قیلغان اول منافق
 معرفت نی قدرینی قاچان بیلور
 دنیا مالین ییغیب یولنی یتورکانلار
 ایسز عمرین کفر ایچینده کیچورکانلار
 قلاوزسیز بیابانده یوروکانلار
 محبت نی قدرینی قاچان بیلور
 کوب کیشیلار دعوی قیلور نفس کوزاتیب
 ییب ایچیب حیوان کبی تونلار یاتیب
 روزه توتمس زکوة بیرمس هم اویاتیب
 حق تعالی قدرینی قاچان بیلور
 کل متقی آل مین دیب ایدی رسول
 ای قول "احمد" بو حدیثنی قیلغیل قبول
 سویری خلقی قبول قیلمای بولدی ملول
 جاهل خلقی پیر قدرینی قاچان بیلور

(۶۲)

حکمت

عارف عاشق جان ملکیده الم تارتسه
اون سیکز مینک قاموغ عالم غلغل بولور
کونکل قوشی شوق قناتین توقوب اوچسه
جمله وجود یادین سیرار بلبل بولور
محبتنی میدانغی اوزین سالسه
معرفتنی میدانغی اوزین اورسه
سر شرابین ایچیب عاشق روحی قانسه
مودتنی کلزاریده خوش کل بولور
ایرانلار حق یادی دین غافل بولماس
"رجال لا تلهيهم" دیر خالق الناس
ایران یولین توتقان هرکز یولده قالماس
اول حضرتده سر اسراری مقبول بولور
"الست" خمرین کیمکا بیرسه اوشال ساقی
بلا مدام ایچیب اسرو منکو باقی
تنین جانین کوی دوروب شوق احراقی
ایچیدین کویار یاقیلور هم کل بولور
ظاهرین آتی برلان بزه کانلار
باطنلارین آتی برله توزه کانلار
شوق اوتی نی ایچ کونکل کا کیزا کانلار
ماسوی برلان قاچان مشغول بولور
طریقت دور بو یول آتین بیلسه درویش
معرفتنی متاعیدین آلسه درویش
اوزکا یوللار باد هوا سانسه درویش
حقیقتنی میدانیده ایر اول بولور

قاتیغ لانیب قول "خواجه احمد" یولغه کیکیل
 قولنی کورسنگ قولی بولوب معنی سورکیل
 یا الهیم روزی قیلسه معنی آلکیل
 معنی سوراب معنی آغان چین قول بولور

(۶۳)

حکمت

سبحان ایدیم بندهسیغه لطف ایلاسه
 ایچی یاروب تاشی کویوب بریان بولور
 پیر ایتاکی توتوب عاشق یولغه کیرسه
 حقنی ایزلاب ایکی کوزی گریان بولور
 جاندین کیچمای عشق سرینی بیلسه بولماس
 مالدین کیچمای من - من لیکنی قویسه بولماس
 سومی بولمای یالغوز اوزین سویسه بولماس
 انداغ عاشق ایل کوزیدین پنهان بولور
 جانینک قیناب زقوم چیناب عاشق بولکیل
 یاشینک توکوب کوزونک سولاب صادق بولکیل
 اندین کین درکاهیغه لایق بولکیل
 جانینک بیرسنگ رحم ایلاسه جانان بیلور
 عشق یولیده کیچه - کوندوز ییغلاغانلار
 جاندین کیچیپ بیلین محکم باغلاغانلار
 خدمت قیلیب حق سرینی آنکلاغانلار
 تون اویقونی حرام قیلیب نالان بولور
 وا دریغا عشق یولیده جانم بیرمای
 غوّاص بولوب دریا ایچره کوهر تیرمای
 حقدین اوزکا غفلت لارنی یراق سالمای
 تانکلا بارسه ندامت لار چندان بولور

عاشق بولسنىك بايزيدديك اوزونك ساتقىل
 واللّه. باللّه دنيا حرام تاشلاب آتقىل
 قانلار توكوب كوزلارينكىدىن تونلار قاتقىل
 بىر لحظه ده شيطان ملكى ويران بولور
 تانك آتقونچه ذكرين ايتكىل جانينك برله
 تاغ - چولنى بستان قىلكىل قانينك برله
 تاشدين قاتيغ تاشقه ياتقىل يانينك برله
 يولدين آرغان يوزمينك غافل مردان بولور
 تاشدين قاتيغ تاشنى سوزكان بى خبرلار
 عقبى ايشين آرقة تاشلاب دنيا ايزلار
 آيت - حديث بيان قىلسام قاتيغ سوزلار
 ظاهر آدم باطنلارى شيطان بولور
 ذكرين آيغىل قانلار آقسون سوزلارينكىدىن
 حكمت آيغىل، درلار تامسون سوزلارينكىدىن
 كللار اونسون هر بر باسقان ايزلارينكىدىن
 كل كا باقسنىك كل آچىلىب بوستان بولور
 سحرلارده ايرته توروب قانلار يوتكىل
 پير مغان ايتاكىنى محكم توتكىل
 حقه عاشق بولغان بولسنىك جاندين اوتكىل
 جاندين كيچكان چين عاشقلار عريان بولور
 بو دنياده فقيرلىقنى عادت قىلكان
 خوارلىق تارتىپ مشقتنى راحت بىلكان
 قول "خواجه احمد" يخشىلاركا خدمت قىلكان
 قيامت كون انداغ كشى سلطان بولور

(۶۴)

حکمت

تجلی نی مقامی دور عجب مقام
اول مقامده عاشق قول لار جولان قیلور
قی کونکل کا تجلی سین پَرْتُو سالسه
بیخود بولوب اوزین بیلماي افغان قیلور
اول مقام نی یول لارینی رهزنی بار
قلاوزسیز یولغه کیرسه یولدین آزار
وسواس ایلاب شیطان لعین دینین بوزار
اوز یولغه سالیب آنی حیران قیلور
اول مقام نی بیلدورکالی رهبر کراک
طریقت نی بیشه سیده صفدر کراک
اوشبو یول نی ضبط ایلاکان سرور کراک
انداغ مرشد اوجماق ملکین طیران قیلور
اول مقام غه یتکان عاشق شراب ایچار
خانمانین برباد بیریب جاندین کیچار
شوق قناتین حضرت تبا توقوب اوچار
عرش، کھسی، لوح، قلم طیران قیلور
دیدار تیلاب ترک ایلاسنک ماسوانی
اولماس بورون وجودینکنی ایلا فانی
"وَأَنهَارٌ مِّنْ عَسَلٍ مُّصَفًّی"
اوجماخنی خاص قولی غه احسان قیلور
اول مقام نی توحید آتلیغ درختی بار
سایه سیده عاشق قول لار براق سوار
هر بر شاخی مینک ییل چیلیق یول نی توتار
هر قایسی سی اوز اوزیکا عنوان قیلور

اول درختنی میوه سیدین تاتقان قوللار
 دنیاسینی آخرتقه ساتقان قوللار
 کور ایچنده آسایشده یاتقان قوللار
 سحرلارده کوز یاشینی عمان قیلور
 همت قورین قول "خواجه احمد" بیل کا باغلا
 محبتنی اوتی برله یورک داغلا
 یقام توتوب تانک آتقونچه تینمای یغلا
 شاید سنکا رحم ایلابان جانان قیلور

(۶۵)

حکمت

محبت سیز خلایق دین هر کیم قاچسه
 عارفلارنی صحبتیدین جولان قیلور
 اورتاب کویوب عشق یولیده یاشین ساچسه
 سبحان ایکام عرش اوستیده مهمان قیلور
 بندم دیکای کویکانلارنی سویوب الله
 حق کورسانکای دیدارینی والله، بالله
 قایده بارسه تسبیح لاری "شیئاً لله"
 هر نه تابسه حق یولیده احسان قیلور
 ذاکر بولوب ذکرین ایتسه کیلکان ندا
 شیطان لعین یتیمیش فرسنگ بولغای جُدا
 دردی بولسه حق درد یغی بیرکای دوا
 انداغ قولنی اوزی ایزلاب جانان قیلور
 تون سحرلار حق اویغاتیب قان بیغلانار
 بیدار قیلیب اوز عشقی غه بیل باغلانار
 دواسی یوق دردنی بیریب زار اینکراتار
 مونده بیغلاب انده بارسه سلطان قیلور

حقە عاشق بولغان قوللار دايم بيدار
 رضوان ايماس مقصودلارى ايرور ديدار
 اهل عيال خانماندين بولور بيزار
 اسماعيل ديك عزيز جانين قربان قيلور
 ديوانه ژولیده مو حقنى تاپقان
 شمشير حق قولغه آليب نفسنى چاپقان
 قايدە بارسە كوزنى يوموب سرنى تابقان
 انداغ سرنى تابقان كشى مردان بولور
 شيخ مين تيو باش کوتاركان حقە رقيب
 منليك قيليب سبھانىغە بولماس حبيب
 بيدار بولوب دردسيزلاركا بولغان طبيب
 بو دنيانى مؤمنلاركا زندان قيلور
 اى مؤمنلار طاعت قيليب طايانمنكلار
 امانت دور عزيز جانغە اينانمنكلار
 حرام حريش ييغميش مالغە اينانمنكلار
 ماللارينكنى قریش آتليغ ييلان قيلور
 بو دنياغە بنا قويغان قارون قانى
 دعوى قيلكان فرعون بيله هامان قانى
 وامق، عذرا، فرھاد، شيرين، مجنون قانى
 قهر ايلاسه بير لحظەدە يکسان قيلور
 هيچ بيلدينكمو آدم اولماي قالغانىنى
 بو دنيانى وفاسينى بيلكانىنى
 دنيا طلب بوى خدا آلقانىنى
 الله ديسنك كوز ياشينكنى باران قيلور
 عشق درديغە دوا سورغان حاضر تيلبه
 ظاھردە يوق باطن ايچرە قيلور جلود
 مغز سرينك بغرينك ايچرە قيلور غلبه
 عشق درديغە دوا قيلسە رحمن قيلور

كيمن كورسنگ بو يول لارده يالغان عاشق
 ظاهر صوفى باطن ايچره ايرماس صادق
 اينيك اوچون معشوقيغه بولماس لايق
 يالغانچىنى روز محشر سرسان قيلور
 تن سوزلامس، جان سوزلامس ايمان سوزلار
 جاندين كيچكان چين عاشقلار حقنى كوزلار
 عارفلاركا خدمت قيليپ يولين توزلار
 اول عاشقنى خلايققه سلطان قيلور
 عاشق بولسنگ كيچه - كوندوز عشق استاكيل
 طاعت قيلكيل كيچه قوپوب هيچ ياتماكيل
 عاقل بولسنگ نادانلاركا سن ايتماكيل
 چين درويشلار طاعتلارين پنهان قيلور
 درويش بولسنگ طاعت قيلكيل قيلمه ريا
 هر كوشه ده طاعت قيليل تنكريم كواه
 يالغان درويش قايد بارسه رزق و دعا
 عادل پادشاه طاعتلارين عصيان قيلور
 وای اوشنداغ درويشلاردین پناه بيركيل
 اول نادانغه الفت قيلماي جانيم آلكيل
 ايا محبوب يولده قالديم يولغه سالكيل
 توبه ليقنى خواجم جاين بستان قيلور
 درويش مين ديب طاعت قيلور خلق ايچنده
 ريا قيليب يوكوروب يورار انده مونده
 الله اوچون طاعت قيلكان درويش قنده
 چين درويشلار تاغ - چولنى مكان قيلور
 عاشق بولسنگ عشق يولیده فنا بولكيل
 ديدار ايزلاب حسرتیده ادا بولكيل
 مرهم بولوب چين دردليك كا دوا بولكيل
 خلق خوشنى جان آلورده آسان قيلور

عاشقلاری حقه باقیب نعره تارتار
 محبتنی دریاسیغه چوموب باتار
 کوهر آلیب معشوقیغه رازین ایتار
 قطره یاشی بیرکا تامسه عمان قیلور
 عاشقلارکا بیردی عشقین کویدورکالی
 زیخادیک قدین دوتا قیلدورکالی
 ریاضتده رنک - رویین سولدورکالی
 چین عاشقنی رنک - رویین سامان قیلور
 عاشقلاری حق قهریدین قورقوب تترار
 بیر و کوکده ملایک لار ییغلاب تورار
 کاهی قیزیل، کاهی سریغ بولوب یورار
 ناله قیلیب بیر و کوکنی لرزان قیلور
 عاشقلارنی خاص معشوقی سحر خیزلار
 ندا قیلکای یا عبدی دیب باطن کوزلار
 عشق شدتی طغیان قیلسه دردی زورلار
 قایدده سیندیپ یورک بغرین بریان قیلور
 قایدده سیندیپ، قایدده سین دیب عاشق ایتار
 عاشقلارده حدنه بولغای معشوق ایتار
 آغزی ایتمس، تیلی ایتماس دلی ایتار
 اوج یوز التمیش تمورلاری لرزان قیلور
 عاشقلارنی قیامت کون حالین سورکای
 چین عاشقنی کوکسین یاریب داغین کورکای
 پاک آغزیدین کفکی آقیب یوکروب یورکای
 کیمکا بیرسه پاک عشقنی حیران قیلور
 عاشقلارنی، طلبلاری جام شراب
 معشوقیغه یتماک اوچون بغری کباب
 روحلارینی غذاسی دور چنک، رباب
 آهی چیقسه یتتی اقلیم ویران قیلور

قدرت برله هر نه قیلسه ایرکلیک اوزی
 قدرتیدین معلوم تورور قیش و یازی
 ای نا انصاف الله بيله قیلمه بازی
 قهار ایکام جانلیغ لارنی بیجان قیلور
 ییغلامقنی هر آدمغه بیرکان قانی
 ییغلاماقلیغ آسان ایماس بغرقانی
 کوز یاشینکنی ریا قیلمه حقنی تانی
 حق تعالی سویکان لارنی کریان قیلور
 قول "خواجه احمد" بندهمین دیب اورمکیل لاف
 ریا برلان قیلغان طاعت بارجه کذاب
 شریعتده طریقتده کارینک خلاف
 آخرتده کذابلارنی عریان قیلور

(۶۶)

حکمت

محبتنی بوستانیده هزار داستان
 بلبل لاری سیرار انده افغان قیلور
 معرفتنی میدانیده جولان قیلغان
 کیچه - کوندوز کوز یاشینی عمان قیلور
 اول بلبلنی آوازینی ایشکانلار
 تکبرنی تاغین کسب اوشاکانلار
 بو دنیانی مزاسینی اونوتقانلار
 فریاد اوروب ییغلاب کوزین کریان قیلور
 عاشق قوللار بو دنیانی کوزکا ایلماس
 دنیا عشقین زاهد قوللار تیلکا آلماس
 کیچه - کوندوز مست و حیران اوزکا کیلماس
 دیدار تیلاب کوکسین تیشیب نالان قیلور

وا دريغا كيچتى عمروم تويمای قالديم
 راحله سيز يولغه كيريب هاريب قالديم
 همت قورى بيل كا محكم چاليب آلديم
 اوزى سويكان عاشق لارين سرسان قيلور
 ايا عاشق كيچه - كوندوز تينماي ييغلا
 كويوب پشيب يورك بغرينك ايزيب داغلا
 اجل ييتسه مردانه وار بيلينك باغلا
 مونداغ عاشق بارسه انده مهمان قيلور
 شيخ منصور اوز باشيني دارد كوردى
 پرتو سالدى حق ديدارين انده كوردى
 بيخود بولوب اوزين بيلمای افغان قيلدى
 واشوقا ديب اوزين بيلمای جولان قيلور
 شيخ شبلى عاشق بولوب بيلمای اوتى
 شيخ بايزيد ييتميش يولى اوزين ساتدى
 بو دنيانى عزت لارين تاشلاب آتى
 اوتكان ايشقه ندامت ديب افغان قيلور
 انداغ ايرلار صحبتى نى تابقان كيشى
 مست و حيران بولوب يورار ياز و قشى
 سحرلارده چار ضرب اورمق آنى ايشى
 ظاهر خنده باطن لارين پنهان قيلور
 مونداغ بولماي حق وصلی غه ييتيب بولماس
 رسوا بولماي سردين معنى آيب بولماس
 "هو" ذكرينى ايتيب دايم تيلدين قويماس
 وهمى برلان دل لارينى لرزان قيلور
 قول "خواجه احمد" بو حكمت نى كيمكا ايدينك
 عارف مين ديب خلايقغه اوقوب يايدينك
 تأثير قيلماس عالم لارغه ايغان پندينك
 عارف اولدور تن ملكى نى ويران قيلور

(۶۷)

حکمت

محبتنی دریا سیده غواص بولوب
معرفتنی کوه رینی آغوم کیلور
طریقتنی میدانیده پرواز قیلیب
اول طوبی درختی غه قونغوم کیلور
اول طوبی درختی نی ایکسه بتماس
الله دیکان عاشق قول دین تقصیر کیلماس
چین عاشق ایران هرکز یولده قالماس
عاشق بولوب الله یادین ایغوم کیلور
عاشق قول لار حق یادی دین خالی ایماس
حقیقت لیغ بو دنیا غه میل قیلماس
چین عاشق لار دنیا عقبن هرکز آلماس
من تقی بو دنیانی قویغوم کیلور
تجلی نی نوری برلان عقلی شاشقان
الله تیو کونکل باغلاب طور غه آشقان
محبتنی اوتی برلان قیناب تاشقان
من تقی الله تیو بارغوم کیلور
الله یادی کونک لارنی قیلدی خرم
بلخ ملکی نی تاشلاب کلیم کیدی ادهم
کلیم کیب هدایت کا اوردی قدم
هدایت کا انداغ قدم اورغوم کیلور
کلیم کیکان اول عزیزلار حقه یاقار
جون سرلاری دوکان ایچره حقنی تاپار
آه لاری دین تلیم تاغلار سیزیب آقار
سلیم بولوب اول کلیم نی کیکوم کیلور

سلیم بولوب صاف بولدی جنید شبلی
 نفسین تیغیب قهر قیلدی حسن بصری
 خلقنی قویوب فنا بولدی ذو النون مصری
 عزیزلارکا متابعت قیلغوم کیلور
 الله یادی تکبرنی اویین بوزدی
 مشایخلار بو حلقهنی کورکلوک توزدی
 چون "هو" دیدیم معصیتلار توزکا توزدی
 من هم تقی اول حلقهده بولغوم کیلور
 شوق شرابین ایچتیم ایرسه قیلدی خراب
 محبتنی اوتی برلان بغریم کباب
 دیدارینی روزی قیلسه ایذیم وهاب
 دارالسلام سراییغه کیرکوم کیلور
 قول "خواجه احمد" کوهرینکلیغ حکمت ایدی
 عزیزلارنی مدح برلان سوزین یایدی
 اوزون توننی کونکا اولاب قیام توردی
 دعا اوقوب روان حکمت ایغوم کیلور

(۶۸)

حکمت

قایو بیرده عزیزلارنی جمعی بولسه
 اوشال بیرده حال علمینی ایغوم کیلور
 آلارنی صحبتینی خوشلاسّم مین
 اوزومنی اوزلاریغه قاتقوم کیلور
 خوش صحبتلیغ درویشلارکا جانیم بیرسام
 هر بر باسقان ایزلارینی کوزکا سورسام
 خدمت قیلیب یخشیلاردین دعا آلسام
 اندین سونکرده شوق شرابین تاتقوم کیلور

شوق شرایین ایچکان قیلور دنیا طلاق
 خضر بابام کیلیب آنکا بیروور سباق
 دنیا تیغیب قیلیب یورکیل یوز مینک طلاق
 شونداغ ایرکا عزیز جانیم بیر کوم کیلور
 وا دریغا خوبلار همه ییغلاب اوتی
 اناسیدین توغدی ایرسه ماتم توتی
 کوزوم یوموب تا آچقونچه عمریم اوتی
 بو دنیانی پوچک یلغه ساتقوم کیلور
 تیلی برله امت مین دیب یالغان سوزلار
 کیشی مالین آماق اوچون هزیان سوزلار
 حالانی مونده تاشلاب حرام کوزلار
 نادانلارغه بو سوزلارنی ایغوم کیلور
 زمانه آخر بولسه عاقل کیتکای
 آدم اوغلی بر - برینی توتوب ییکای
 دنیا اوچون ایمان اسلام دینین ساتغای
 عاقللارغه بو سوزلارنی ایغوم کیلور
 ملائک لار ییغلیب بر کون صحبت قوردی
 رقص سماع اورمق اوچون یوکوروب یوردی
 معراج اوزره حق مصطفی مونی کوردی
 ایمدی مین هم رقص سماع اورغوم کیلور
 حق مصطفی بیخود بولوب اوزدین کیتی
 جبریل کیلیب حق مصطفی باشین توتی
 سبحان ایکام قدرت بیلان ذکر اورکاتی
 امت بولسام مین هم ذکرین ایغوم کیلور
 عاشق بولسنگ کوز یاشینکنی ساچیب یورکیل
 بایزیددیک دنیا عقبین تیغیب یورکیل
 ادهم صفت تخت بخت دین کیچیب یورکیل
 همت بیرسنگ دنیا عقبین تبکوم کیلور

قول "خواجه احمد" دنيا كورسنگ زينه‌ار قاقچيل
 ذكرين ايتيب طريقتنى يولين آچقيل
 آيت - حديث سوزى برله دينار ساچقيل
 ايرانلاردين دُر و كوهر آغوم كيلور

(۶۹)

حکمت

محبتنى بوستانى‌غه بلبل كى
 سحرلارده ناله ايلاب قونغوم كيلور
 اوشل وقتده الهيمنى جمالىنى
 معنى كوزى برله عيان كوركوم كيلور
 مردان ايرور حق يولىنى باشچى لارى
 مرید برله خدا آرا ایلچی لاری
 وحدانیت دریاسینی یولچی لاری
 آستانه‌ده باریب دربان بولغوم كيلور
 حق وصالین تیلکانلار تونى - کونى
 تینمای جانی برله ایتور ذکر "هونى"
 حقدین الهام یتیب كيلور بیلسنگ مونى
 آخرتنى آزوقىنى آغوم كيلور
 مودتنى عصاسینی الكا آلب
 سعادتنى خرقة‌سینی تن‌کا سالیب
 محبتنى یونكى برلان قناتلانیب
 معرفتنى بوتاغى‌غه قونغوم كيلور
 ايرانلار بارچه باروب بولدى مزار
 قاتیغ‌لانیب ای دوستلاریم بولکیل بیدار
 موسى صفت طور تاغیده كوروب دیدار
 "رَبِّ أَنْظِرْ إِلَيْكَ" ديب ايغوم كيلور

وا دریغا ایسز عمروم بیردیم بیلکا
 عبادتدین هیچ نیمه یوق باقسم قولکا
 قوللوق قورین کیچ باغلادیم ایمدی بیلکا
 همت قیلیب پیر خدمتین قیلغوم کیلور
 قول "خواجه احمد" دون اهلی دین بیل ایرمس اول
 ریاضت سیز هیچ عالمین کور گوزمس اول
 الله دیمک مؤمن قولغه عار ایمس اول
 حق یادیغه جانیم قربان قیلغوم کیلور

(۷۰)

حکمت

ایا دوستلار عشق غواصی بولماکونچه
 وحدانیت دریاسیغه کیرسه بولماس
 اول دریانی کوهریدور حق وصالی
 جاندین کیچیپ کیرمکونچه کورسه بولماس
 همت قورین جان بیللیغه محکم چالما
 ماسوانی محبتین اوزدین سالمای
 کوز یاشینی نیاز ایلاب رازین ایتما
 اسرار یولین مردان لاردین بیلسه بولماس
 "يُجِبُّهُمْ" شرابی نی ایچماکونچه
 "وَيُجِبُّوْهُ" لباسینی کیماکونچه
 ریاضت نی پوته سینی بوغماغونچه
 حق جمالین مرادینچه کورسه بولماس
 "لِيَ مَعَ اللَّهِ" مقامیغه بارماکونچه
 "أَنْ تَمُوتُوا" سرایغه کیرمکونچه
 "فَنَّا فِي اللَّهِ" دریاسیغه چومماغونچه
 "بقا بالله" کوهریدین آلسه بولماس

شریعت نی سلاحی نی کیماکونچه
 طریقت نی براقی غه مینماکونچه
 جذب جنون عالمی غه بارماکونچه
 حقیقت نی میدانی غه کیرسه بولماس
 مردانلارنی مرادی دور حق دیداری
 حق دیداری کیراک بولسه بول بیداری
 قول "خواجه احمد" سحر وقتیده قیلغیل زاری
 بیدار بولمای حق جمالین کورسه بولماس

(۷۱)

حکمت

ایا طالب جفا چیکیب یولغه کیرکیل
 جفا چیکمای یولغه کیرسنگ وفا بولماس
 جفا چیکمای آخرتده یوقتور راحت
 جفا چیکمای کوزونک یاشی ضیا بولماس
 کیمنی کورسنگ قولی بولوب خدمت قیلکیل
 رحم ایلابان غریبلارکا شفقت قیلکیل
 عالم لار کیلسه توروب عزت قیلکیل
 نا جنس لارده ذره هرکز وفا بولماس
 غریبلارکا رحیم قیلماق رسول ایشی
 غریبلارنی کورکان بیرده آقار یاشی
 غریبلارکا کویار دایم ایچی تاشی
 غریبلارنی دعاسیدیک دعا بولماس
 مدینه کا رسول باریب بولدی غریب
 غریب بولوب حقه آخر بولدی قریب
 رحمن ایکام دیدارینی قیلدی نصیب
 چین دردلیک کا غریبلیک دیک دوا بولماس

امت بولسنىك حق رسولغه تابع بولكىل
 اتى چيقسه درود ايتيب تعظيم قيلكىل
 غريب بولوب غريبلار دين معنى آلكىل
 غريب بولكىل غريبلاردىك كدا بولماس
 غريبلارنى كوركان ييرده آغريتمنكىز
 غريبلارغه آچىغلانىب سوز قاتمنكىز
 ضعيف كوروب غريبلارغه تاش اتمنكىز
 بو دنياده غريبلىك دىك بلا بولماس
 شامغه توشوب غريب بولدى حكيم اتا
 يىغلای - يىغلای قدى آنى بولدى دوتا
 ايزيم قيلكاي جمله قولغه ايمان عطا
 چين غريبنى قدى هرگز دوتا بولماس
 تركستانده غريب بولدى قول خواجه احمد
 آنىك اوچون حق رسولغه بولدى امت
 ايچميش، ييميش نعمتلارى قايغو محنت
 تن پرستدين حق تعالى رضا بولماس

(۷۲)

حکمت

عشق دعوى سين قيلكان عاشق كريان بولور
 بو دنيانى غربتى دين اولسه بولماس
 هوشى كيتيب بغرى آنى بريان بولور
 حيا كيتيب پرده سيني ترسه بولماس
 بو دنيانى عشرتى دين كيچكان كشى
 بيخود يورار تينماي آقار كوزدين ياشى
 واله بولوب حيران يورار ياز و قيشى
 وحشى ينكلېغ ايلدين چقار يورسه بولماس

کیچه - کوندوز کوزده یاشین ژاله قیلکان
 فریاد اوروب سحرلارده واله بولکان
 کوکسین تیشیب چار ضرب اوروب ناله قیلکان
 مونداغ ایرنی درکاهیدین کیتسه بولماس
 کیچه توروب یرمای تینمای ییغلاکانلار
 عشق اوتی‌عه یورک بغرین داغلاکانلار
 رسوا بولوب سردین معنی انکلاکانلار
 خلق ایچیده رسوا بولوب یورسه بولماس
 الله یادین ایتیپ یوروب زاری قیلکان
 کوزده یاشین آقوزوبان جاری قیلکان
 سرسان بولوب قباب برله یوروش قیلکان
 آنداغ ایردین جدا بولوب یورسه بولماس
 عاشقلاردای دایم مدام حقنی ایزلار
 ظاهر یوزوب باطننده عرشنی کوزلار
 طالب‌لارکا آیت حدیث سوزین سوزلار
 سر سوزینی نادانلارغه ایتسه بولماس
 قایده بارسه عشق دوکانین انده قوردی
 لیلی مجنون بو دنیانی دورین سوردی
 شیخ منصور انا الحق دیب غوغا قیلدی
 آنداغ عاشق بولدی کورونک بشر حافی
 ایر اول ترور وعده‌سیده بولسه وافی
 وفا قیلکان ایراتلاردین یانسه بولماس
 سردین معنی تویماکانلار بیکانه‌دور
 اول عاشقلار مکانلاری ویرانه‌دور
 قایده بارسه همخانه‌سی جانانه‌دور
 تونلار قویمای عاشق مین دیب یورسه بولماس

غواص بولمای کوهر اوچون دریا چومماس
 جاندین کیچمای جومغونچه هرکز آلماس
 بیر قطره‌غه قانع بولمای اول در بولماس
 قانع بولمای شوق شرابین ایچسه بولماس
 قول "خواجه احمد" لاهوت ارا مقام توتمای
 "فنا فی الله" مقامیدین ییلیب اوتمای
 پیر مغان قطره‌سیدین جرعه یوتمای
 "لی مع الله" مقامی‌غه یتسه بولماس

(۷۳)

حکمت

معرفت‌نی منبریغه مینماکونچه
 شریعت‌نی ایشلارینی بیلسه بولماس
 شریعت‌نی ایشلارینی ادا قیلمای
 طریقت‌نی میدانی‌غه کیرسه بولماس
 طریقت‌ده تورلوک ادب بیلماکونچه
 نفسی برله محاربه قیلماکونچه
 عشق یولیغه اوزین لایق ایتماکونچه
 حقیقت‌نی سرلارینی بیلسه بولماس
 شریعت‌ده مراد اولدور یولغه کیرماک
 طریقت‌ده مراد اولدور نفسدین کیچماک
 حقیقت‌ده عزیز جان‌نی فدا قیلماک
 جاندین کیچمای عشق شرابین ایچسه بولماس
 بو ریا بولمای شیخ مین دیبان دعوی قیلکان
 اوزی قیلمای خلق‌لار آرا وعظین ایغان
 سوزی یالغان دنیا اوچون عمل قیلکان
 دنیا قویمای حال علمی‌نی بیلسه بولماس

ایرانلار اوشبو یولغه قدم اوردی
 مجاهده مونکی برله عمل قیلدی
 مکاشفه باطن ایچره معلوم بولدی
 مونداغ بولمای درکاهی غه یتسه بولماس
 نی عمل دور ایرمن تیو دعوی قیلماق
 سجاده‌نی خلقلار آرا تورکا سالماق
 اوزی بیلمای بو معنی کا نفسین اورماق
 غواص بولمای در کوهرنی آلسه بولماس
 وحدانیت کیمه‌سینی سرین بیلمای
 عشق اسرار سوزلاریدین خبر آلمای
 تجرید، تفرید ایشلارینی ادا قیلمای
 او توحیدنی میوه‌سیدین آلسه بولماس
 قول "خواجه احمد" تفرید، امید قیلغیل
 مصطفی‌نی سوزلاریغه عمل قیلغیل
 توبه دیبان تونلار قوبوب زار اینکراکیل
 زار ییغلامای دیدارینی کورسه بولماس

(۷۴)

حکمت

محبت‌نی دریاسیغه جوماغونچه
 ای دوستلاریم عشق کوه‌رین آلسه بولماس
 تانک آتقونچه فریاد اوروب زار اینکرامای
 صراف بولوب عشق دردینی بیلسه بولماس
 عشق دردینی بیلکان کیشی دنیا تبار
 ایرانلارنی ایزین آلیب تینمای اوپار
 محبت‌نی شوقی برلان یاشین سبار
 یاشی آقمای ریاضت‌ده سولسه بولماس

حقہ عاشق درویشلاری سنک محک
 بو عالمده مکان قیلماس جانی فلك
 نفسی اولوک، کونکلی تیریک مثل ملک
 مونداغ بولمای سردین بهره آلسه بولماس
 جاندین کیچیب باش اوینامای خالص بولماس
 تیریک اولمای مجازیغه راس سورلاماس
 حقیقتنی شاهی برله راز ایتاماس
 خالص بولمای دنیا عقبن سالسه بولماس
 اخلاص کیراک ایا طالب عاشق بولسانک
 جاندین کیچیب محنت تارتیب صادق بولسانک
 آندین سونکره درکاهی کا لایق بولسانک
 لایق بولمای دیدارینی کورسه بولماس
 عاشقلارکا درد و بلا آفت کیراک
 حقدین بیزارتن بیورورغه راحت کیراک
 ملامت کا اهانت کا طاقت کیراک
 طاقت قیلماق حقہ عاشق بولسه بولماس
 عشق سیزلارنی کوردوم دوستلار حیران یورار
 مؤمن مین دیب ایمانلاری ویران یورور
 روز محشر دیدار کورمای سرسان یورور
 پیر مغان نظر قیلمای کورسه بولماس
 عاشقلاری محنت استار جاندین بیزار
 روزه، نماز تسبیحلاری پروردکار
 تینمای کویار طاعتلاری حقسین دیدار
 یار استمای بنده میندیب تورسه بولماس
 طریقتنی شوقی ذوقی کویماک یانماق
 حقدین قاجقان ناجنس لاردین قاجیب تانماق
 یوز مینک تورلوک جفا تیکسه بویون سونماق
 بویون سونمای عشق دوکانین قورسه بولماس

نادان کیم دیب سورسه ایتینک بیخبرلار
 حقدین قورقماي ناجنس لارنی سوراب ایزلار
 آیت حدیث بیان قیلینک قاتیغ سوزلار
 همدم بولوب نادان برله تورسه بولماس
 زینهار - زینهار قاچیب یورکیل بولسه نادان
 حق یادینی ایتسه هر کم اوئل مردان
 جاننی جانغه پیوند قیلسه اوئل ایشان
 اورسه سوکسه اول عزیزدین تانسه بولماس
 تبرک دور اول عزیزدین اولوش آلینک
 یاستانیان آستانه سین یولی سورینک
 یول کورساتسه جان دلنی برباد بیرینک
 برباد بیرمای عشق یولیغه کیرسه بولماس
 عاشق لارنی خلق ایچینده سَری پنهان
 آهی سردی کوک کا یتار رنکی خزان
 کوزی کریان، بغری بریان خانه ویران
 مونداغ بولمای حق یولی نی بیلسه بولماس
 قول "خواجه احمد" زاهد بولمه عاشق بولکیل
 بو یول لارده بی باک یورمه صادق بولکیل
 لیلی - مجنون، فرهاد - شیرین، وامق بولکیل
 عاشق بولمای حق دیدارین کورسه بولماس

(۷۵)

حکمت

دوستلاریغه آچدیم ایدیم کوهری نی
 آسان لیق برله او کوهردین آلسه بولماس
 جفا چیکمای محنت تارتمای خدمت قیلمای
 اوئشو پیرنی سرایی غه کیرسه بولماس

عاشق قوللار خله كييب براق منار
 حور و قصور اونك سونك فرشتهلار
 اول براققه باقيب آندە حيران قالار
 عاشق بولماي اول براققه مينيب بولماس
 رحمان ايكام رحم قيليب كيركوز يولغه
 رحمتينكدين مژده بيركيل عاصي قولغه
 يولدين آزغان قوللارينكني سالكيل يولغه
 قلاوزسز اوشبو يولغه كيرسه بولماس
 محبتني درياسيغه جوموب باتقيل
 عاشقلارني صحبتيغه اوزونك قاتقيل
 محبتني بازاريغه اوزونك ساتقيل
 اوزين ساتماي حق رحمتين آلسه بولماس
 ايرانلارني ايزين ايزلاب يولغه كيرسك
 كيچكيل فاني دنيا سيدين چين قول بولسك
 قلاوزسز اوشبو يولغه كيرار بولسك
 ايزلاب آني تابماغونچه كيرسه بولماس
 محبتني درياسيغه آچكيل كوزني
 توبه قيليب حق يوليغه آلكيل اوزني
 محبتني درياسيغه سالكيل اوزني
 توبه قيلماي بو سوداني قيلسه بولماس
 شريعتنينك ميدانيغه اوزين سالمای
 طريقتنينك بوستانیده جولان قيلماي
 حقيقتنينك درياسيدين كوهر آلماي
 معرفت آدابيني بيلسه بولماس
 قول "خواجہ احمد" حق يولیده تورغيل مدام
 عاشقلاركا درمان بيركيل علي الدوام
 عاشقلارني آرزوسيدور دارالسلام
 عاشق بولماي دارالسلام كيرسه بولماس

"کل من علیها فان" آیتند
 بیر خدادین اوزکا مخلوق اولار ایرمیش
 اسرافیل سورین آلیب هورکاننده
 کوردین ینه تیر کوزوبان قویار ایرمیش
 ایلیک مینک ییل کور باشنده تورکاننده
 آندین کین عرصاتکا سورکاننده
 ییلانک باش وییلانک ایاغ یورکاننده
 آدم اوغلی بیهوش ینکلیغ بولار ایرمیش
 اول حساب ایلاکای طهارتدین
 ایکنچی حساب ایلار نمازینکدین
 اوچونچی حساب ایلار حلال - حرامینکدین
 مین مین دیکان حیران بولوب قالار ایرمیش
 حساب ایلاب یوروتکایلار محشر ساری
 خلایقلار قدم اورکای ناجار باری
 معاینه انده کورکای دوزخ ناری
 الامان دیب اوکروشوبان تورار ایرمیش
 جمله امت یوزیکرمه مینک صف بولغایلار
 اطرافیدین فرشتهلار صف توزکایلار
 "اَیْنَ الْمَقَرَّ" نداسینی بیتکورکایلار
 قاجنب قوتولوب بولمس دیبان ایتار ایرمیش
 اول وقتده ندا کیلکای "وَامْتَازُوا الْیَوْمَ"
 اوشل کونده دستکیر بولغای نماز - صوم
 عقل هوشینک کیتب اندر قالمکای فهم
 تیل لال بولوب سوزلا یالمای قالار ایرمیش

بارجه خلقلار آدم آتا سری بارکای
 ای اتامیز ایمدی بیزنی قوللانک دیکای
 نافرمانلیغ میندیب اوتی فرزند دیکای
 ابراهیم کا بارالوک دیب ایتار ایرمیش
 ابراهیم کا باریب ایتکای آدم اتا
 شفاعت قیل بولارنی سین باریب حالا
 اول هم ایتور سیزده نوقرب آدم اتا
 موسی سری بارالوک دیب ایتار ایرمیش
 موسی دیکای ربّ آرنی دیدیم اولکون
 خجالت دین چقانیم یوق تا اوشبو کون
 بارالوک محمدکا بولوب واژکون
 بارجه لاری حضرت ساری بارار ایرمیش
 موسی دیکای یا محمد اورغیل قدم
 امتلارینک دوزخ ایچره بولدی عدم
 محمد هم ابا قلیب تورکای اولدم
 موسی قویمای ایکاولاری بارار ایرمیش
 تاجین آلیب کیسو سالیب عرش آستنده
 نعره تارتیب ییغلاب تورکای او شل کونده
 "یا قادرا"، "یا غفورا"! دیکاننده
 یا حبیبیم باش کوتاردیب ایتار ایرمیش
 آلیب کیلکیل امتینکنی درکاهمغه
 باغشلایین بارجه سینی من سزلارغه
 داخل قیلای جمله سینی جنتیمغه
 مونداغ دیبان حقدین ندا کیلار ایرمیش
 زاهد، عابد، خاص قوللاردین علمانی
 آلیب کیلکان درکاهیغه اوشبولارنی
 تنکریم ایغای یا محمد عاصی قانی
 عاصی لایق ایماس دیبان ایتار ایرمیش

عاصی، جافی لایق دیکای رحمتیم کا
 داخل ایتای مین اولارنی جنتیم کا
 کنادلارین باغشلایین بارین سنکا
 رسول خرم بولوب یوکوروب کیلار ایرمیش
 موسی برلان رسول اللہ یوکوروب کیلکای
 عاصی، جافی امت لاریم یورونک دیکای
 کنادلارینک عفو ایلابدی قادر، حی
 بهشت ایچره آلدین سالیب کرار ایرمیش
 قول "خواجه احمد" قیامت دین ایدی مونی
 حکمت قلیب خلایقه یایدی مونی
 اولوغ - اولوغ کتابلاردین ایدی مونی
 اوقوغاندین دعا طمع قیلار ایرمیش

(۷۷)

حکمت

شریعت کا مرشد بولغان عاشق قوللار
 شریعت دین آلور منزل آلار ایرمیش
 نمازیغه شروع قیلغان مؤمن قوللار
 اوجماخ اوین امید توتوب تورار ایرمیش
 ملك الموت فرمان برله جانیم آلسه
 اغا اینی بارجه ییغلیب قویوب یانسه
 یتتی قدم باسقان دین سونک خبر بیرسه
 منکر نکیر کیریپ سؤال سورار ایرمیش
 منکر نکیر سؤال سورور بولسه
 اول اوتلوغ عمود برله اورور بولسه
 یاشین یاشناب جان تنیم اوتقه یانسه
 قیناب جانیم تار لحدده کویار ایرمیش

تورت يوز قرق تورت پيغمبر مرسل نبی
 قالماديلار بو دنيادين اوتی باری
 کل نفیس ذائقه الموت آیتی
 قرآن ايچره مونداغ خبر بيرور ايرميش
 شريعت دين، طريقت دين بيان قيلدی
 حقيقت دين قرآن سوزی کلام بولدی
 بول جهان غه محمدنی نوری تولدی
 اول نوريلان ايکی جهان يارور ايرميش
 خوش دولت دور ولايتده پادشاه بولسه
 عادل بولوب بير مؤمننی قاضی قيلسه
 اوشل قاضی بارجه ایلنی راضی قيلسه
 راضی ليق دين اوچماخ اوین آلار ايرميش
 مؤمن قوللار نماز اوقوب بولسه فارغ
 اول قولنی مونده بولغای رنکی ساريغ
 اول خدمتدين حق قاشيده بولوب لايغ [لايق]
 حور قيزلاری قرشو کيليب قوچار ايرميش
 جاهل کيشی نماز قدرین قچان بيلور
 هر نمازده ايمان باشدین تازه بولور
 صلوٰۃ ديسه غافل باشین يورکاب اوور
 غافل قوللار عمرین يیل کا ساتار ايرميش
 قول خواجه احمد! "قول من" - ديسنک طاعت قيلکيل
 قيامتنی کونلارینی ياق بيلکيل
 حقه ياقين بولای ديسنک جانينک بيرکيل
 طاعت قيلکان حقه ياق بولار ايرميش

(۷۸)

حکمت

طریقت کا شریعت سیز کیرکانلارنی
شیطان کیلیب ایمانی نی آلور ایرمیش
اوشبو یولنی پیرسیز دعوی قیلکانلارنی
سرسان بولوب ارا یولده قالور ایرمیش
طریقت کا سیاست لیغ مرشد کیراک
اول مرشد کا اعتقاد لیغ مرید کیراک
خدمت قلیب پیر رضاسین تاپماق کیراک
مونداغ عاشق حق دین اولوش آلاز ایرمیش
پیر رضاسی حق رضاسی بولور دوستلار
حق تعالی رحمتیندین آلاز دوستلار
ریاضت ده سر سوزیدین بیلور دوستلار
آنداغ قوللار حقّه یاق بولور ایرمیش
اوشبو یولغه ای برادر پیرسیز کیرمه
حق یادیدین لحظه غافل بولوب یورمه
ما سواکا عاقل ایرسنگ کونکل بیرمه
شیطان لعین اوز یولغه سالور ایرمیش
ایا دوستلار هیچ بیلمادیم مین یولومنی
سعادت غه باغلامدیم مین بیلمنی
ماسوادین هیچ ییغمادیم مین تیلیمنی
نادان لقیم مینی رسوا قیلور ایرمیش
شریعتنی طریقتنی بیلائی دیسنگ
طریقتنی حقیقت کا اولائی دیسنگ
بو دریادین دُرّ و گوهر آلائی دیسنگ
جان دین کیچان خاصلاری آلاز ایرمیش

عاشق قول لار كيچه - كوندوز هرگز تينماس
 بر ساعتی حق ياديدين غافل بولماس
 انداغ قولنی سبحان ايكام ضايع قويماس
 دعا قيلسه اجابت ليغ بولور ايرميش
 وآه دريغا كيچتي عمروم غفلت بيلان
 سين كيچوركيل كناه لاريم رحمت بيلان
 قول "خواجه احمد" سنكا ياندی حسرت بيلان
 اوز اوزيغه اوزی يانیب كویار ايرميش

(۷۹)

حکمت

عارف عاشق شوقی برله قیامت کون
 خدایی غه بحث و جواب قيلور ايرميش
 بو عالمده تارتقان جور و جفالارين
 كوكسين ياروب حق قاشيغه سالار ايرميش
 بو عالمده قيلدينك مینی خلق غه رسوا
 دیداریمنی كورساتای ديب قيلدينك شیدا
 عالم خلقين دشمن قيليب سالدینك غوغا
 خدایی غه باریب عرضه بولار ايرميش
 دیداریمنی آرزو قيلسنك كيچه ياتمه
 بو دنيانينك طعمه سيدين ذره تاتمه
 حالدين سورسه نادانلاركا سرنی ساتما
 مونداغ ایرلار فيض فتوح آلاز ايرميش
 دیداریمنی طلب قيلسنك عرشه باققيل
 عرش اوستیده آهنگ برله اوتلار ياققيل
 امت بولسنك محمدغه قپوق قاققيل
 سبحان ايكام چين عاشقنی سنار ايرميش

ایشیتیب عاشق رقص و سماع اورغای
 یتتی کوکدین ملایک لار ییغلیب کیلکای
 عرش کرسی لوح قلم داد ایلاکای
 بیر تیرانیب حقّه زاری قیلار ایرمیش
 ای بیر و کوک! عاشقلاردین حذر قیلینک
 اوتلوغ آهی چیقار بولسه حاضر بولینک
 کوک کا باقیب نعره تارتسه قورقوب تورینک
 بیر آد اورسه عالم یکسان بولار ایرمیش
 چین عاشقلار ضعیف بولوب سلام قیلکای
 قدرت بیلان پرده ایچره علیک آغای
 دیدار اوچون کویکان لاریم کیل کیل دیکای
 لطفین کوروب چین عاشقلار تیلار ایرمیش
 "صَفًّا - صَفًّا" عاشقلارکا ندا کیلکای
 یوز یکره مینک عاشق تیکین صفی بولکای
 جَنّت کیردیب الهیم دین ندا کیلکای
 جَنّت کیرمای دیدارینی کورار ایرمیش
 ندا کیلکای . ملایک کا زنجر سالکیل
 زنجر سالیب محشرکا ده آلیب یورکیل
 دیدار اوچون کویکان لاریم معلوم قیلکیل
 عاشقلاری بیخود بولوب یورار ایرمیش
 ایتکان لارین قیلغان عاشق دیدار کورکای
 واصل بولوب محشر آرا دوران سورکای
 افغانی دین یتتی دوزخ اورناب یانغای
 مالک کیلیب قاچغای تعظیم قیلار ایرمیش
 عاشقلارنی هییتی دین مالک قاچغای
 قورقوب باریب دوزخ ایچره اوتلار ساچقای
 وهم برله زهر زقوم تويا ایچکای
 قدرتی غه حیران بولوب قالار ایرمیش

ملك لاردين عاشقى كوب اى بى خبر!
 بير آه اورسه عالم بولور زير و زير
 زاهد. عابد، سالكلارين عشق بتر
 عشق سيز آدم والله يولده قالار ايرميش
 قول "خواجه احمد" ديدار ايزلاب كدا بولكيل
 كيچكيل اهل - عيالنكدين جدا بولكيل
 الله حقى بولار دشمن رسوا بولكيل
 جدا بولغان ديداريني كورار ايرميش

(۸۰)

حکمت

كيلينك، ييغلينك ذاكر قوللار ذكر ايتالوك
 ذاكرلارنى خدا بيشك سويار ايرميش
 عشق سيزلارنى ايمانى يوق اى يارانلار!
 دوزخ ايچره تينماي دايم كويار ايرميش
 محبتليك عاشقلارنى خدا سويدي
 آئينك اوچون دنيا عقبين طلاق قويدى
 جاندين كيچيب ياشين ساجيب عاشق بولدى
 روز محشر ديداريني كورار ايرميش
 عاشقلارنى چين دوستيغه جاني قربان
 شوقى برلان آنى ايزلاب قيلور افغان
 عشق سوداسى باشه توشسه خانه ويران
 شيدا بولوب آنى ايزلاب يورار ايرميش
 عاشق بولسنىك كيچه - كوندوز تينماي ييغلا
 پير مغان خدمتىغه بيلينك باغلا
 كويوب بيشيب دردى برله كوكسنك داغلا
 داغده كيتكان وصاليني كورار ايرميش

حقنى سويكان عاشقلارى تابتى مراد
 يالغان عاشق بولوب يورمه تانكلا. اويات
 قيليج دين تيز قيل كفروكنى آتى صراط
 يالغان دعوى قيلغان اوتماي قالار ايرميش
 عاشق بولسنىك يالغان دعوى قيلمه زنهار
 يالغان دعوى قيلغانلاردين خدا بيزار
 قهار ايكام قهر ايلاسه آتى قهار
 قيامت كون يوزى قرا قوبار ايرميش
 عاشقلارى كيچه ييغلاب سحر قوپار
 سر شرايين ايچكان عاشق سرنى ياپار
 هر كيم سوكسه بلكه تبسه قولين اوپار
 آنداغ ايرانلار فيض فتوح آلا ايرميش
 محبت دين خبر الغان خاننى بيلماس
 باشين كيته تايارى يوق جاننى بيلماس
 عشق كلامى ذوق طعامى ناننى بيلماس
 "هو - هو" تيو ذكرين ايتيب يورار ايرميش
 عاشقلارنى كوزى كريان. بغرى بريان
 پرواسى يوق. ناموسى يوق. يورار عريان
 ايل كوزيكا تفراقدين كم سري پنهان
 جاني برله يادين ايتيب يورار ايرميش
 توغرى يوركان عاشقلاردين خدا راضى
 عاشقلار ايشى آسان ايماس قيلمه بازى
 يالغانچى لار عاشق مين دير الله قاضى
 ايماننى پوچك پلغه ساتار ايرميش
 عاشقلىقنى آسان ايشى باش بيرمكليك
 منصور صفت اوزدين كيچيب جان بيرمكليك
 "موتوا قبل ان تموتوا" خاك بولمكليك
 عاشقلارى اولماس بورون اولار ايرميش

سودا قیلسنك آخرت نی سوداسینی
 باشقه آلمه بو دنیانی غوغاسینی
 عمل قیلغیل، جنت آلکیل ماسواسینی
 جنت آغان دیدارینی کورار ایرمیش
 قول خواجه احمد! عاشق بولسنك جان دین کیچکیل
 آندین سونکره شوق شرابین تو یا ایچکیل
 کناهنکنی سبك قیلیب مونده اوچکیل
 عاشقلاری اوچماق ایچره اوچار ایرمیش

(۸۱)

حکمت

لا إِلَهَ إِلَّا اللَّهُ دیکان قول نی آغزیدین
 بیر یاشل قوش بولوبان اوچار ایرمیش
 قناتلاری توقوغلوق درّ یاقوت دین
 پرواز قیلیب عرش دین عرشکا اوچار ایرمیش
 اول قوشقه قدرت برلان مینک تیل بیرکای
 بارچه تیلده اوشال قولنی حقدین قولکای
 ربانی غه چنکالی نی اوروب یولغای
 تونی - کونی یارلقه دیب ایتار ایرمیش
 ایا دوستلار اوشال قوشتی عیانی نی
 مین ایتاین سیز تینکلانکیز بیانی نی
 کوب نادانلار بیلماس اولقوش پایانی نی
 قولونك توتوب بهشت ایچره کرار ایرمیش
 اول قوش ایتور هرکز تینمام مین بر زمان
 تا بیرمه قادر منکا دار الامان
 هیچ قالماکای بوکونکلده ذره کمان
 آندین سونکره قرار تاپیب قونار ایرمیش

روزه توتوب نماز اوقوب توبه قیلغان
 سحر توروب الله تیو قولوق قیلغان
 مشایخ لار خدمتی نی تمام قیلغان
 آنداغ قول لار حق دیدارین کورار ایرمیش
 بو یسوی مسکین احمد حیران قالیب
 لا اله الا الله نی تیل کا آلیب
 حق ذکر نی جان دلغه واصل قیلیب
 اوچ قوشینی لامکانده کورار ایرمیش

(۸۲)

حکمت

محبت دین خبر بیلکان عاشق لاری
 الله دیسه توقوز آسمان کویار ایرمیش
 عرش اوستیدا نعره تارتسه صادق لاری
 فرشته لار عزیز جان دین تو یار ایرمیش
 سین عاشق بول پرتو سالور عاشق لارغه
 پرده آلیب جلوه قیلور صادق لارغه
 دیدارینی حق کورساتور لایق لارغه
 حق تعالی لایق لارنی سویار ایرمیش
 عاشق بولسنگ شونداغ بولغیل بیر سون شراب
 صدیق صفت خلقغه یتسون بوی کباب
 الله دیسنگ لیک دیب بیرسون جواب
 آنداغ عاشق دنیا عقبین قویار ایرمیش
 عشقه قدم قویغان عاشق اوزین بیلماس
 شیخ بایزید مرید بولسه قولین آلماس
 دنیا کیلیب جلوه قیلسه کوزین سالماس
 کوز قانندین ساچ و سقال بویار ایرمیش

عاشقلارغه بیر خدادین اوزکا حرام
 رحمتی دین قطره تامسه ایشی تمام
 رزق روزی ایزلاماسلار توکل تام
 حق ذکرینی آیته آیته تویار ایرمیش
 عاشق لاری حق دین قورقوب بولور بیدار
 حقیقت لیغ عاشقلارنی فکری دیدار
 باش بیردیه جان و ایمان آنکا طیار
 جان دین کیچیب حق یولیده اولار ایرمیش
 لالا دیکیل عالم سینی کافر دیسون
 کافر دیبان منصور صفت دارغه آسون
 باشینک بیرکیل دیدارینی حق کورساتسون
 باشین بیرکان حق دیدارین کورار ایرمیش
 دروازدغه آسیب قویونک جمله کورسون
 مونی کوروب خلق عالم عبرت آسون
 اولوغ کیچیک یول بارغوجی اوروب اوتسون
 انا الحق دیب پنھاسویونوب کولار ایرمیش
 خواجه ملا شاه آلدیغه یغیلیب باردی
 کافر منصور اولمادی دیب عرضه قیلدی
 رسول شرعی نه بویورسه قیلینک دیدی
 ظاهرین لر شادغه تعظیم قیلار ایرمیش
 شریعت دور دیب عالم لاری بویوردیلار
 کافر منصور اولمادی دیب کویوردیلار
 آخر قیلیب کلین کوککا سوردیلار
 تاغ توزلار انا الحق دیب تورار ایرمیش
 شوقی برلان اوت کویوردوب کوککا چیققی
 ملایک لار افغان قیلیب حقه باقتی
 جنت ایچره حور و غلمان قپوق قاقتی
 دیوانه لار یا منصور دیب کویار ایرمیش

کلین یغیب دریا ایچره تاشلا آتی
 زمستانده دریا تاشیب نعره تارتی
 شهر خلقی یوکوروب بیلیب باسی قاتی
 جاندین قورقوب داد فریاد قیلار ایرمیش
 شیخ ذوالنون شاه منصورنی پیری ایردی
 پادشاه یوکوروب ولایتکا خبر بیردی
 بر اولیاء بارموکین دیب زاری قیلدی
 شیخ ذوالنون پنهایوروب بارار ایرمیش
 غریب منصور قولاغیمکا بیر سوز دیدی
 خاکستردین بیر کف آلیب مینکا بیردی
 دریا تاشسه یا منصور دیب سالینک دیدی
 ان شاء الله تاشقان دریا قیتار ایرمیش
 پادشاه ایدی حاضر پیریم بارا کورونک
 خاکسترین دریا ایچره سالا کورونک
 غریب یتیم ایلکین توتوب آلا کورونک
 پادشاه وزیر تعظیم ایتیپ تورار ایرمیش
 شیخ ذوالنون خوب بولوردیب بیردین قوبتی
 پادشاه وزیر اخلاص قیلیب ایزین اوبتی
 شیخ ذوالنون دریا سری یوروب یتتی
 خاکسترین دریا ایچره سالار ایرمیش
 خاکسترین یامنصور دیب سوغه سالدی
 قدرت برله دریا قوروب خاموش بولدی
 خواجه ملا مونی کوروب شاکر بولدی
 ایلکین آجیب شیخغه دعا قیلار ایرمیش
 پادشاه ایدی شهریم یر مین سیزکا برای
 حضرت پیریم بر قیزیم بار چوری قیلای
 اهل - عیالیم، احبابلاریم خادم قیلای
 شیخ ذوالنون قبول قیلماي تورار ایرمیش

مین دنیادین سوی بولغان ایشتیب پادشاه
 ظاهر پادشاه باطن ایچره مین شهنشاه
 دنیا عقبین طلاق قویا بولغیل آگاه
 کیلکان نذرین خلقه انعام قیلار ایرمیش
 ای بیخبر حقه اخلاص قیلماسموسین
 مونده اخلاص آنده خلاص بولماسموسین
 ایکی عالم خداینکنی بیلماسموسین
 بیخبرنی دوزخ ایچره سالار ایرمیش
 باطل کوزلار خاص ولینی تانومسلار
 آندین یوز مینک سرلار کورسه اونامسلار
 کیم یخشی دور، کیم یماندور، تانومسلار
 اول سبب دین آرا یولده قالار ایرمیش
 تازه - تازه حکمتلاریم ثانی دفتر
 ایسز سوزوم نادانلارغه قیلور ابتر
 بهره آلمای کوندین کونکا بولور بتر
 سوزکا یتیمای اوزکا بنا قیلار ایرمیش
 لا مکاندین چیقتی روحوم الله دیدی
 سلطان احمد ایشتیب مونی خلقغه یایدی
 منکرلاری شک کیلتوردی کوزین اویدی
 ناجنس لارنی حق جزاسین بیرار ایرمیش
 عاشقلارنی سرین ایتیم یالغانی یوق
 یالغان طالب بو یوللارکا کیرکانی یوق
 یالغانچیلار حقدین اولوش آغانی یوق
 اولوش آغان فقر تونین کیار ایرمیش
 فقیر تونین کیکان عاشق بولور تفریق
 زار ییغلابان دیداریغه بولور مشتاق
 ملایکلار آت قویارلار آنکا آفاق
 آنداغ عاشق ایلدین قاچیب یورار ایرمیش

نسیمی دیک حقنی ایتکیل، تیرینک سویسون
 خواجه ملا سامان تیغیب آسیب قویسون
 کوزینک یومکیل بو دنیا دین نفسینک اولسون
 کوشت، پوستین حق سوزلاتیب قویار ایرمیش
 قول خواجه احمد روحونک ایدی "قالوا بلی"
 وعدہ قیلدینک هیچ ایتمادینک حمد ثنا
 غضب قیلسه. نه قیلغای سین؟ قادر خدا
 یالغان بنده وعدہ سیدین تانار ایرمیش

(۸۳)

حکمت

کیلینک دوستلار بارچه توروب ایتالینک
 یادی بیزنی یاروغلو ققہ تارتار ایرمیش
 یادی برلان شروع قیلغان عاشقلارنی
 نیازلاری کوندین کونکا آرتار ایرمیش
 کیم که ایتسه حق یادینی بغری کویوب
 کوز یاشینی باران قیلیب رنکی سولوب
 اوز یاقاسین یانکلدیم دیب اوزی توتوب
 آنداغ عاشق سر شرابین تاتار ایرمیش
 اوشبو یولنی مزا سینی بیلماکانلار
 اوز یاقاسین توتوب توبه قیلماکانلار
 دنیا سیغہ مغرور بولوب یوروکانلار
 حیوان ایرور بلکه آندین بتر ایرمیش
 عشق سوداسی کیمکا توشسه خانه ویران
 کیجه - کوندوز دیدار تیلاب یورار حیران
 عشق یولیده کوزی یاشلیغ. بغری بریان
 شیدا بولوب اوزین ایزلاب یورار ایرمیش

ایا دوستلار قېساب کیلدی قرانغولوق
 امیدیم بار اول ایزیم وین هم یاروغلوق
 طریقتنی بازاری دور هم قوروغلوق
 نیازلیق قول کیریپ سودا ایتار ایرمیش
 قول خواجه احمد عبرت آغیل صد هزاردین
 نیازسیزلار بهره آلماس اول بازاردین
 فاضلیقده قروغ قالور اول نظردین
 نادان عمرین پوچك پلغه ساتار ایرمیش

(۸۴)

حکمت

عاشق کیشیلار کیچهلاری یاتمسه بهراق
 هر درد و الم تیکسه فغان ایتمسه بهراق
 باشینی یاریب قانغه بویاب قیلسه ستملار
 اوردی مینی دیب ظالمهسوز قاتمسه بهراق
 درویش بولوبان خلق ایچیده تسبیح اوکوروب
 صوفی بولوب عالمغه اوزین ساتمسه بهراق
 اوتکان صوفی لار ایل کوزیدین یورماین قاچتی
 حقنی تیلاکان خلق ایچیده یورمسه بهراق
 هر بیرده خدا حاضر و ناظر کلدرولار
 بیجا اوتوروب حقنی بلند ایتمسه بهراق
 صوفی بولوبان صاف بول ای بنده الله
 صوفی بولوب اول یالغان دمی اوتمسه بهراق
 الله دیسه قیلسه نهان بدعت بسیار
 آنداغ صوفی لار روزه - نماز توتمسه بهراق
 هر کیمنی اوز یولیده ایلائی شیدا
 دیوانه ژولیدنی عیب ایتمسه بهراق

حغنی تنوکان اوزکانی هرکز تانومس لار
 الله دیماکان بولسه انی اولکانی بهراق
 صوفی بوله سین های - هوس قیلماغیل اصلا
 ایت نفسی اوچون بنده که قان توتmse بهراق
 رزاق دیدینک بیردی سینکا رزق فراوان
 شیطان سوزیکا بنده قلاق سالمسه بهراق
 حقدین ایشیتیب ایدی مونی احمد مسکین
 چین بنده سینی سینه سیدین کیتmse بهراق

(۸۵)

حکمت

عاشق لیقنی دعوی سینی قیلغان کیشی
 معشوقیدین ذره غافل بولغانی یوق
 عشق کوهری توب سیز دریا ایچره مهمان
 جاندین کیچمای اول کوهردین آغانی یوق
 کوهر آلور غواص اکر جاندین کیچسه
 شیدا بولوب عشق شرابین هر کیم ایچسه
 نیچه آیلار، نیچه کونلار اکر اوتسه
 عشقنی کلی آچیلیب هرکز سولغانی یوق
 عاشق بولوب تاپای دیسنک حقنی یولین
 اسراغین سین عشق باغیده اسرار کلین
 محنت برلان سنار ایرمیش یخشی قلین
 چین عاشقنی اندین کونکلی قالغانی یوق
 محنتنی دریاسیدا موج اورغوسی
 علم - عمل، قیل - قال لار شوق اولکوسی
 بوتنکزکا کیم کیریبان؟ کیم چقغوسی
 عاشق قوللار معشوقیدین قالغانی یوق

قول خواجه احمد قبول قیلدی ایماغلیقنی
قبول قیلدی عشق اوتی غه کویماغلیقنی
جانین بیریب ساتقون آلدی کویماغلیقنی
چین سوزوم دور هرکز آنی یلغانی یوق

(۸۶)

حکمت

عشق سرینی بیان قیلسام بو عالمده
بی خبرلار ایشیتیب قولاق توتقانی یوق
حق یادینی کیمکا ایتای همه غافل
مؤمن من دیب بو دنیادین اوتکانی یوق
ایشان شیخ خواجه ملا دنیا ایزلار
اول سببدین پادشاهلارغه یالغان توزلار
آیت. حدیث سوزین قویوب مالنی کوزلار
حق یولیده هرکز محنت تارتقانی یوق
دنیا تیغیب حقنی سویکان تابتی مراد
شوق شرابین ایچکان عاشق شوقی زیاد
قیامت کون کذابلارنی یوزی اویات
یالغانچیلار حق یادنی ایتکانی یوق
آخر زمان شیخلار ایشی همه ریا
روز محشر ریالاری بولغای کوا
شیخ مین تیو مونچه هوا، مونچه بنا
الله اوچون ذره ثواب ایتکانی یوق
ایشان مین دیب تورلوك طعام تیریپ ییکای
یخشیلارنی کوزکا ایلمای مین مین دیکای
دنیا مالین آلیب بارسه سویونوب آکای
والله. بالله مین - مین لیکدین اوتکانی یوق

محمد دیک تفراق صفت حقیر بولسون
 ریاضتده رنکی، روی زهیر بولسون
 حق مصطفی ایل کا قاتیغ باققانی یوق
 خلقلار قلیب خلایقغه سوزلار ایتی
 یوز مینک کافر بت دین کیچب دین کاقیتی
 خلقلاریدین عالم همه نورکا باتی
 آندین سونکره ایمان اسلام کیتکانی یوق
 بنده بولسنک خلقلار قلیب امت بولغیل
 آندین سونکره ایمان اسلام قولغه آغیل
 سحر وقتده حقه ییغلاب زاری قیلغیل
 الله سخی هیچ کیم نومید قایتغانی یوق
 ایکی عالم شاهی تورور بیر یخشی خلق
 خلقلاریدین حق مصطفی بولدی اولوغ
 حق تعالی آیت بیرى مِمَّ خُلُق
 غافل آدم آیت ایشیتیب اوقغانی یوق
 "خلق مماء دافق" قاتیب ایدی
 مصطفیغه امتلارکا اوقوب بایدى
 ییلغان امت وعدهسیدین قایتیب تاپتی
 سبحان ایکام گناهیدین اوتکانی یوق
 میخانه دیب ایشیتیب قولاق کرکان ایماس
 ایرانلارینک خدمتی نی قیلغانی ایماس
 پیری کامل مکمل نی کورکان ایماس
 یالغانچی دور وحدت می دین تاتقانی یوق
 جاندین کیچکان چین عاشقلار دنیا دیماس
 نفسی اولوک آب طعام غمین ییماس
 بو دنیاده سود و زیان بولسه بیلماس
 دنیا کیلیب جلوه قیلسه باقانی یوق

محبت ليك ديوانه نينك نشانی بار
 جان و دلده عشق دردی نینک بیانی بار
 نی درد لارنی کیم نی کورسه کمانی بار
 بایزید دیک هر کون اوزین ساتقانی یوق
 عاشق بولسنک بغینکده یوق کوزنینک قانی
 ای نارسا جبهنکده یوق عشق نشانی
 خدمت قیلسنک پیری مغان درنیک کانی
 خدمت قیلمای درکانی غه باتقانی یوق
 بولهوسلار عاشق مین دیب کوب لاف اورار
 بی خبرلار قایدا بارسه دوکان توزار
 یالغان سوزلاب بو دنیانی دورین سورار
 دنیا ایزلاب تابانی غه تیکانی یوق
 حقدین قورقمای مین مین دیکان شه لار قانی
 آی - کون کا دعوی قیلغان مه لار قانی
 کیچه ییغلاب سحر تورکان خوبلار قانی
 عبرت آلیب قان زرداب توککانی یوق
 قرووق زاهد حق عشقی نی کوزکا ایلماس
 جنت ایزلاب دیدارینی طلب قیلماس
 عاشق لارنی ناله سیغه قولاق سالماس
 بو دنیانی ارقه تاشلاب اتقانی یوق
 قول خواجه احمد قول مین دیسه قولوم دیکیل
 اندین کین بنده لیک کا مقبول بولکیل
 محبت نی میدانیده باش اویناغیل
 باش اوینمای حق وصلی کا یتکانی یوق

عشق دعوی سین منکا قیلمه یالغان عاشق
 عاشق بولسنک بغرینک ایچره کوزقانی یوق
 محبتنی شوقی برله جان بیرمه
 ضایع کیچار عمری انی یالغانی یوق
 عشق باغی نی محبت تارتیب کوکارتمسینک
 خوارلیق تارتسه شوم نفسینکی اولدورمسینک
 الله دیوب ایچ کا نورنی تولدورمسینک
 والله - بالله سینده عشقنی نشانی یوق
 حق ذکرینی مغز جان دین چیقارمسینک
 اوچ یوز التمش تمورلارینک تییرانمسینک
 تورت یوز قرق تورت سونکارلارینک کل قیلمسینک
 یالغانچی دور حقه عاشق بولغانی یوق
 نفسدین کیچیب قناعتنی پیشه قیلغان
 هرکیم تپسه راضی بولوب بویون سونغان
 یخشی لارغه خدمت قیلیب دعا آغان
 انداغ عاشق محشر کونی آرمانی یوق
 راحت تاشلاب جان محتین خوشلاکانلار
 سحرلارده جانین قیناب اشلاکانلار
 های - هوس، ما و مین نی تاشلاکانلار
 چین عاشق دور هرکز آنی یالغانی یوق
 عشق دردینی بی دردلارکا ایتیپ بولماس
 بو یول لارنی عقبه سی کوب اوتوب بولماس
 عشق کوه رین هر نامردکا ساتیب بولماس
 بی خبرلار عشق قدرینی بیلکانی یوق

عشقه توشتونك، اوتقه توشتونك كرىوب اولدونك
 پروانه ديك جاندين كيچيب اخكر بولدونك
 دردكا تولدونك غمكا سولدونك تيلبه بولدونك
 عشق دردينى سورسنىك هرگز درمانى يوق
 باشنىك كيتار بو يوللارده حاضر بولغىل
 عشق يولیده اولماس بورون زينهار اولغىل
 پير ايتاكن محكم توتوب خدمت قيلغىل
 خدمت قيلغان هرگز يولده قالغانى يوق
 عاشق ايرماس جانانىكا جان بيرمه
 دهقان ايرماس كتمان چايب نان بيرمه
 مونده ييغلاب آخرتده جان بيرمه
 يولدا قالغان بوى خدا آغانى يوق
 اى بى خبر عشق اهلیدين بيان سورمه
 درد استاكيل عشق دردیغه درمان سورمه
 عاشق بولسنىك زاهدلاردین نشان سورمه
 بو يوللارده عاشق اولسه تاوانى يوق
 زاهد بولمه، عابد بولمه، عاشق بولكىل
 محنت تارتيب عشق يولیده صادق بولكىل
 نفسنى تيغيب دركاهى غه لايق بولكىل
 عشق سيزلارنى هم جانى يوق، ايمانى يوق
 عشق سوداسى كيمكا توشسه رسوا قيلور
 پرتو سالب حق اوزيغه شيدا قيلور
 مجنون صفت عقلين آلب ليلا قيلور
 الله حقى بو سوزلارنى يالغانى يوق
 قول خواجه احمد جاندين كيچيب يول غه كيركىل
 آندين سونكره ايرانلارنى يولين سوركىل
 الله دييان حق يولیده جانينك بيركىل
 بو يوللارده جان بيرماسنىك امكانى يوق

حاجت ایرماس عشق دردیغه دروا سورمق
 ویران ایتیپ کیتکان ایرمیش دواسی یوق
 جانینک قیناب، یاشنک اقیب، هوشینک کیتب
 عشق دردیدین دوستلار قاتیغ بلاسی یوق
 هر کیم کویار جانغه آلار عشقنی اوتین
 جانی کویسه اعضاسیدین چیقار توتون
 بغری انی صد پاره‌دور یوقتور بوتون
 خلق‌غه ظاهر کورونوب تورکان یراسی یوق
 جاندین کیچمای تابماس هرکیم جانانه‌نی
 کوروب همت قیلماق کیراک پروانه‌نی
 کوروب بیلیم اوتقه اوردی اوز جانی‌نی
 سود و زیان برله هرکز پرواسی یوق
 انچه یوردونک انچه توردونک ای بی خبر
 نفس شیطان ایشلاریدین قیلغیل حذر
 بیزدین بورون تیلیم کاروان قیلغان سفر
 ایتا کیتکان بو دنیانینک وفاسی یوق
 ایتیپ اوتکان ایرانلاردین یولنی سورکیل
 سحرلارده اوره قوبوب چار ضرب اورغیل
 هو صحبتین قورغان بیرکا اوزونک اورکیل
 یولغه کیرکان ایرانلارنی هواسی یوق
 قول خواجه احمدایدی دوستلار ایشیتنک مونى
 قاف تاغی دیک تاشلار تیکسه چیقماس اونى
 کیمکا ایتیپ، کیمکا ییغلای عشق دردینی
 والله، بالله عشق دردینی دواسی یوق

خوش غایب دین یتوشتی یخشی سوزوم تبرک
 عاشق بولسنگ ای طالب ریاضتده بیلینک بوک
 تون کیچهلار اوخلامای یاش اورنی غه قانینک توك
 ارسلان بابام سوزلارین ایشیتینکیز تبرک
 ارسلان بابام ایدیلا طالبلارده یوق اخلاص
 پیرینک حاضر بولغانده نه حاجت خضر و الیاس
 پیرغه قدم قویغانده یا ایتمه غوث الغیث
 ارسلان بابام سوزلارین ایشیتینکیز تبرک
 طالب مین دیب ایتورلار والله بالله نا انصاف
 نامحرمغه باقارلار کوزلاریده یوق انصاف
 کیشی مالین بیورلار چون دللاری ایماس صاف
 ارسلان بابام سوزلارین ایشیتینکیز تبرک
 پیر خدمتین قیلدوق دیب طالب مین دیب یورارلار
 ییب حرام حریشنی کولباریغه اورارلار
 کوزلاریده نمی یوق حلقه ایچره کیرارلار
 ارسلان بابام سوزلارین ایشیتینکیز تبرک
 ذاکر مین دیب زور اورار چیقماس کوزیدین یاشی
 دللاریده غمی یوق ناکه آغریغای باشی
 مکر و حیلہ قیلورلار معلوم خداغه ایشی
 ارسلان بابام سوزلارین ایشیتینکیز تبرک
 طالب مین دیب ایتورلار کونکلیده یوق ذره نور
 چین طالبنی سورسنگیز ایچی تاشی کوهر دور
 حقه عیان سرلاری ییمیشلاری صفا نور
 ارسلان بابام سوزلارین ایشیتینکیز تبرک

صورتلاری صوفی نقش قیامت دین قورقماسلار
 فسق - فجور حاصلی کنازلاردین هورکماسلار
 ایا تسبیح ایلکینده ییغلاب یاشین توکماسلار
 ارسلان بابام سوزلارین ایشیتینکیز تبرک
 ایا تسبیح ایلکینده زنار یخشی بیلسنکیز
 حق رضاسی بوتورور عشق سوداسین قیلسنکیز
 عشقین آلیب محشرده رسوا بولوب تورسنکیز
 ارسلان بابام سوزلارین ایشیتینکیز تبرک
 عشقه قدم قویغانلار حق دیدارین کورارلار
 موسی صفت محشرده حق دین سؤال سورارلار
 سرمست بولوب وصلیده "هو" ذکرینی قورارلار
 ارسلان بابام سوزلارین ایشیتینکیز تبرک
 انشاء الله ایشیتکاننی حقدین تیلاب آلور مین
 شیطان یولیدین آلیب حق یولیغه سالور مین
 مدد قیلسه مصطفی کنازلارین تیلارمین
 ارسلان بابام سوزلارین ایشیتینکیز تبرک
 ارسلان بابانی سورسنکیز پیغمبرغه اعتبار
 صحابهلار اولوغی خاص بنده کردگار
 یاتقان ییری ناهموار بر کازه خوار زار
 ارسلان بابام سوزلارین ایشیتینکیز تبرک
 چهار شنبه کون ایشیتیپ ناکه حضرت باردیلار
 ارسلان بابانی اویغه اولکون مهمان بولدیلار
 یاتکان یری ناهموار کوروب حیران قالدیلار
 ارسلان بابام سوزلارین ایشیتینکیز تبرک
 اول محمد مصطفی توروب دعا قیلدیلار
 ملائک لار آمین دیب ایلکین آچیب توردیلار
 شونداغ امت بیردینک دیب حق شکرینی قیلدیلار
 ارسلان بابام سوزلارین ایشیتینکیز تبرک

صحابه‌لار ايديلار ارسلان بابا دور آتينكيز
 عرب‌لارنى اولوغى پاكيزه دور ذاتينكيز
 تربيت تن فرض ديدى فرجه ساليب ياتينكيز
 ارسلان بابام سوزلارين ايشيتينكيز تبرك
 آخر زمان امت‌لار نقش قيلور اويلارين
 نفس هواغه قوانينب بوزار هر دم خويلارين
 شان شوكت‌لار بيلان برپا قيلور بويلارين
 ارسلان بابام سوزلارين ايشيتينكيز تبرك
 آخر زمان امت‌لار دنيا فانى بيلماسلار
 كيتكانلارنى كوروبان آندين عبرت آلماسلار
 ايرانلارنى قيلغانين كوروب كوزكا ايلماسلار
 ارسلان بابام سوزلارين ايشيتينكيز تبرك
 يخشى يول‌لاردين آزيب يامان يولغه آوشقان
 شيطان لعين پيريم ديب دامنى غه ياپوشقان
 غوازيلنى پيريم ديب ايرته آخشام كوروشقان
 ارسلان بابام سوزلارين ايشيتينكيز تبرك
 ايمان اسلامين آيب اولمايمن ديب كولوشكان
 اولمايمن ديب دنيا ده موليم برلان اوروشكان
 غافل ليق برله هر دم عمرينى برباد بيركان
 ارسلان بابام سوزلارين ايشيتينكيز تبرك
 وقتى ييتسه عزرائيل امانتنى بيردركاى
 شيطان لعين پيريم ديب جان بيرارده كورمكاى
 ايمان اسلامين آلوب حال دلين سورمكاى
 ارسلان بابام سوزلارين ايشيتينكيز تبرك
 توبه قيلسه توبه سين موليم قبول قيلماكاى
 الله ديسه خواجه سى قولين توتوب آلمكاى
 جرم، عصيان كرهين پيركا باريب چچيماكاى
 ارسلان بابام سوزلارين ايشيتينكيز تبرك

ييتى ياشده ارسلان باب تركستانغه كىلدیلار
باشم قويب يىغلادیم حالیه كوروب كولىدلار
مینك بیر ذكرین اوركاتیب مهربانلیغ قىلدیلار
ارسلان بابام سوزلارین ایشیتینکیز تبرک
کلیم قىلدىم خرما دین مینکا وحشت قىلدیلار
ای بی ادب كودك ديب عصا آلیب سوردیلار
وحشتی دین قورقمادیم مینکا باقیب توردیلار
ارسلان بابام سوزلارین ایشیتینکیز تبرک
آغزینك آچکیل ای كودك امانتینك بیراین
مزاسینی یوتمادیم آچ آغزینکغه سالاین
حق رسولنی بویروغین امت بولسام قیلاين
ارسلان بابام سوزلارین ایشیتینکیز تبرک
اغزیم آجتیم سالدیلار خرما ایسی قىلدى مست
ایکی عالم دین کیچیب والله بولدوم حق پرست
خواجه ملا ییغیلدى آلیب یوردی دست بدست
ارسلان بابام سوزلارین ایشیتینکیز تبرک
بابام ایدی ای بلام تکلیف قیلما دینك مینکا
بیش یوز ییلدور کامیمده سقلاب ایردیم من سینکا
مزاسینی سیز آلیب تلقین بیردینکیز مینکا
ارسلان بابام سوزلارین ایشیتینکیز تبرک
بابام ایدی ای بلام قاشیمده توراوالاین
جنازیمنی اوقوب کوم جان تصدق قیلاين
مدد قیلسه مصطفى علیین غه کرایین
ارسلان بابام سوزلارین ایشیتینکیز تبرک
یىغلاب ایدیم ای بابا یاش كودك مین بیلما سمین
کورونکیزنی قزلار من کوتاریب سالالماس مین
حق مصطفى سنتین كودك مین بیلما س مین
ارسلان بابام سوزلارین ایشیتینکیز تبرک

بابام ایدی ای بلام ملایک لار ییغیلکای
 جبرائیل امام بولوب اوزکالار تابع بولغای
 میکائیل و اسرافیل کوتاریب کورکا قویغای
 ارسلان بابام سوزلارین ایشیتینکیز تبرک
 قول خواجه احمد سوزونکنی نادانلارکا ایتماکیل
 سوزنی ایتیپ نادانکا پوچک پلکا ساتماکیل
 آج دین اولسنگ نامرد دین هرکز منت تارتماکیل
 ارسلان بابم سوزلارین ایشیتینکیز تبرک

(۹۰)

حکمت

هر کیم قیلسه طریقتنی دعواسینی
 اول قدم شریعتکا قویماق کیراک
 شریعتنیک ایشلارنی ادا قیلیب
 آندین سونکره بو دعوانی قیلماق کیراک
 شریعتسیز دم اورماسلار طریقتده
 طریقتسیز دم اورماسلار حقیقتده
 اوشبو یوللار ییری بیلنور شریعتده
 جمله سینی شریعتدین سورماق کیراک
 آندین سونکره بر ایر کیراک ارادتلیک
 بولمیش بولسه اول بر ایردین اجازتلیک
 شریعتده راست موافق کرامتلیک
 اوشال ایرنیک ایتاکنی توتماق کیراک
 کیم بیلماين بو یوللارنی شیخ مین دیسه
 کرامتدین ولایتغه خبر بیرسه
 باطل ایرور اگر روح الامین ایرسه
 اوزین آنداغ باطللاردین ساچماق کیراک

ارادت سيز. اجازت سيز مرشد بيلماس
 طريقت نينك يول لاريني هرگز بيلماس
 مبتدع دور ارادت كا لايق ايرماس
 آنداغلاردين ياراغ - ياراغ قاقماق كيراك
 آندين سونكره مجاهده تونين كييوب
 رياضت نينك بوته سنده ايريب آقيب
 من منليك اوتوب اوزني ياراق قليب
 عزت رختين ساتيب خوارليق آماق كيراك
 اوشبو يول دور ايرانلار نينك قيلغانلاري
 طالبلاري بيلسون تيو ايغانلاري
 حق دور بيلسنگ بر ذره يوق يالغانلاري
 جان قولاق برله موني اوقماق كيراك
 صدقي برله هر كيم قبول قيلسه موني
 اعتقادي برله بولسه توني - كوني
 يادي برله مشغول بولسه توني - كوني
 ايرانلاردين ياري مدد قولماق كيراك
 ارادت سيز اوشبو يولغه كيرماديلار
 اجازت سيز يولغه قدم قويماديلار
 اشارت سيز ياريم نفس اورماديلار
 مرید بولغان بو صفتليغ بولماق كيراك
 هر كيم كيرسه اوشبو يولغه بيلين باغلاب
 كيراك مخدوم، كيراك خادم اوزين بيليب
 نيتي ني خداييغه درست قليب
 توجه ني عزيزلاركا قيلماق كيراك
 هر كيم ايرسه اوشبو يولغه كيرار بولسه
 توبه قليب حضرتيكا قدم قويسه
 ذوالجلالني جماليني كورار بولسه
 خواجه احمد نفسي توتماق كيراك

هر کیم قیلسه طریقتنی دعواسینی
 اوّل قدم شریعتکا قویماق کیراک
 شریعتنی ایشلارنی ادا قیلیب
 آندین سونکرده بو دعوانی قیلماق کیراک
 شریعتسیز دم اورماسلار طریقتده
 طریقتسیز دم اورماسلار حقیقتده
 معرفتسیز دم اورماسلار حقیقتده
 بارچهسینی شریعتدین سورماق کیراک
 آندین سونکرده برابر کیراک ارادتلیک
 بولمیش بولسه اول پیری دین اجازتلیک
 شریعتکا موافق راست کرامتلیک
 شونداغ ایرنی ایتاکی نی توتماق کیراک
 هرکیم بیلمای بو ایشلارنی شیخ مین دیسه
 کرامتدین ولایتغه خبر بیرسه
 باطل ایرور اکر روح الامین ایرسه
 آنداغ شیخ دین یراق - یراق قاچماق کیراک
 ارادتسیز اجازتسیز مرشد بولماس
 طریقتنی نشانهسین هرکز بیلماس
 مونداغ کیشی ارادتغه لایق بولماس
 اول کمراده دین یراق - یراق تورماق کیراک
 ارادتنی بیرکیل اهل اجازتکا
 قایم بولغیل تونی - کونی ریاضتکا
 سانیب آنی قوللوغی نی عبادتکا
 قوللوغی ده بیلنی باغلاب تورماق کیراک

آندین سونکره مجاهده تونین کیوب
 ریاضت نی بوته سیده ایریب آقیب
 من - من لیک دین اوتوب اوزی نی صاف قیلیب
 عزت رختین ساتیب خوارلیق آلماق کیراک
 اوشبو تورور ایرانلارنی قیلغانلاری
 طالبلارغه بیلسون دیبان ایغانلاری
 راست دور بوسوز بیلکیل یوقتور یالغانلاری
 جان قلاقی برلان مونی بیلماک کیراک
 صدقی برله هر کیم قبول قیلسه مونی
 اعتقادی برله بولسه تونی - کونی
 یادی برله مشغول بولسه یلدا تونی
 ایرانلاردین همت یاری قولماق کیراک
 ارادت سیز اوشبو یولغه کیرمادیلار
 انابت سیز یولغه قدم قویمادیلار
 اجازت سیز یریم نفس اورمادیلار
 مرید بولغان بو صفت لیغ بولماق کیراک
 هر کیم کیرسه اوشبو یولغه بیلین باغلاب
 قول خواجه احمد کیراک اوزنی خادم ایلاب
 نیتی نی خدایی غه درست ایلاب
 توجه نی عزیزلارکا قیلماق کیراک

(۹۲)

حکمت

عزراییل بیرکون کیلور سدت برلان
 اسیغ تن دین عزیز جان نی بیرماق کیراک
 بیش کونلوك نقد عمری نی قولدین بیریب
 چارده تابمای آخر بیرکون اولماق کیراک

اوغول - قيزينك ييغلاب قالسه فرياد اوروب
 مال ملكينك مونده قالسه حيران بولوب
 دشمنلارينك قوانوشور سيني كوروب
 بويون سونوب اوزاليبان ياتماق كيراك
 ميراث ديبان باش اياغينك باغلاكايلار
 اسىغ سونى باشدين قويوب چايقه كايلار
 تورت طرفدين آسته - آسته اوشلاكايلار
 التى قرى بوزدين كفن قيلماق كيراك
 جنازنكنى اولوغ كيچيك كوتارسه لار
 كورستانغه قراب سيني يوروتسه لار
 يىتميش ييرده سؤال سورسه فرشته لار
 بر - بر آنى جوابىنى بيرماق كيراك
 خلايقنى مزاريده عمارتنى
 كورونك انده تورلوك - تورلوك علامتنى
 لحد آتليغ دروازه قيامتنى
 سياستليغ اويغه بارىب كيرماق كيراك
 كيرىب كورسنىق قرانغولوق يوقتور چراغ
 ايچى توله حسرت ايرور اوتلوق فراق
 اولكون سينكا كيم قيلكوسى انده يراق
 تا قيامت تانك آتقونچه ياتماق كيراك
 عمرينك آخر بولغوسى دور بر كون تمام
 بو ايش برلان بارسنىق اكر دار السلام
 حلال قويب يكان بولسنىق دايم حرام
 عذابىنى بارىب انده تارتماق كيراك
 قول خواجه احمد توبه قيلغيل اولماس بورون
 قيزىل يوزونك كورده ياتىب سولماس بورون
 يىلان چيان كورينك ايچره تولماس بورون
 قضا كيلسه رضا بولوب تورماق كيراك

(۹۳)

حکمت

قراکوندور اوشال ساعت که دنیادین سفر قیلسانک
زن - فرزند مال ملکک بار سندن کذر قیلسانک
سنی قویماس اجل هرگز نیچه حکمنک روان بولسه
حکومت برله عالمنی اکر زیر و زبر قیلسانک
محاصل دور خلايقنه اجل مثل سپاهلاردیک
غضب برله آلور جاننک نچه مازاریلار قیلسانک
بولوبدور بارچهغه فرمان اولومنی شربتین ایچمک
قاجوب آندین قوتولمزسن نیچه آندین حذر قیلسانک
خلایقیننک مزاریغه باریب بر - بر تماشا قیل
اولوکلاردین آلوب عبرت کیراک بغرنک کباب قیلسانک
همیشه یخشیلیق قیلغیل کیترسن اوشبو دنیادین
قیامت آب روییغه کیراک خون چکر قیلسانک
خدا فرماننی توتغان بولور اول اولیالاردین
بولورسن اولیالاردین ریاضت کوبراک قیلسانک
قونمه مال و ملکک کا قورتور بو اجل آخر
قرا بیرکا کیررسن اخر نیچه ما کر و فر قیلسانک
خواجه احمد معصیت برله حیاتنک قیلمغیل ضایع
بولورسن لایق حضرت اکر طاعت سحر قیلسانک

(۹۴)

حکمت

ایا دوستلار آخر زمان بولدی کورونک
بی دین کافر بو عالمغه تولدی کورونک
حق قوللوغین قویوب بارجه فاسق بولدی
اینک اوچون قهار غضب قیلدی کورونک

آخر زمان نشانی اول خیرات کیتی
 قهار ایکام قهر برله حکمین ایتی
 خلائق لار فاسق بولوب دینین یوتی
 اسلام ضعیف بولوب قولدین چیقیتی کورونک
 روزه، نماز، ایمان، اسلام قولدین کیتی
 کل یوم بتر دیبان حدیث اوتی
 اریغ رسول ایتقانلاری ایمدی ییتی
 بو دنیانی قرانغولوق باستی کورونک
 عالم لار بارچه علمین مالغه ساتی
 ییلیب کوروب اوزلارینی اوتقه اتی
 اوزی عمل قیلمای خلقه علم اورکاتی
 دنیا اوچون دینلارینی ساتی کورونک
 والله حلال هیچ قالمدی بولدی حرام
 اسیر قیلیب فرزندلارین سالدی کورونک
 فعلمیزدین بیزکا غضب قیلدی خالق
 شکر ایتمادوک بیزکا جزا کوب نه جاغلیق
 خیر احسان ایشیکین سلطان قیلدی باغلیق
 آنینک اوچون یوزمینک بلا تولدی کورونک
 کون کورمکان ایسز محبوب مه پاره لار
 یورک لاری قورقوب بولدی صد پاره لار
 درد لاریغه دوا تابمای بیچاره لار
 مونکلوع بولوب کافرغه خوار بولدی کورونک
 جان دین آرتوق کورکان جانانه لار
 یوزی آی کوزی چولپان مستانه لار
 بویلارینی هیچ کورمکان بیکانه لار
 کافرلارغه زار و حیران بولدی کورونک

يىغلايورلار فغان اوروب آى واى انام
 كورمكايدوك مونداغ قاتيغ كونلارنى خام
 بونه حسرت تيو زارين ايدى كورونك
 اتام تيو كيچه - كوندوز يىغلايورلار
 آريب قالغان بوتهلاردك بوزلاريورلار
 يتيم قالغان قوزى ينكليغ منكرايورلار
 نالشيغه تاشلار ايريب سوبولدى كورونك
 نه مشكل دور كلنى اوزوب غنجه سيدين
 اناسينى جدا قىليب بچه سيدين
 كوندوزينى قرا قىليب كيچه سيدين
 باشلاريغه قرانغونى سالدى كورونك
 نه قىلغانچه سيزدين جدا بولدى انا
 سونى سندن جدا قىلدى قادر خدا
 قيامت نيك تانكى آنى وا حسرتا
 جانمىزكا مونداغ جفا سالدى كورونك
 اتالارى قان يىغلايور تابماى علاج
 باشلاريغه قرا كييب يوز يرتيب ساج
 قالدى موكين بالالاريم آج يلالكاج
 آد اوروب ايچ بوينى ايزدى كورونك
 انالارى ترملوبان قالدى حيران
 كل يوزلارين زعفرانديك سرعرتيبان
 واى قلونوم بوتام دييان آد اوروبان
 يقا يرتيب ساجلاريني يولدى كورونك
 جاندين عزيز جان ايچينده مهربانم
 نور ديدم، جكرينديم، غمكساريم
 ايكي كوزوم ياروغلوغى، تنده جانم
 قايدة باردنك تيو فرياد قىلدى كورونك

كوركانيوز قيتنب ينه سيني ايچان
 اكر كورماي اولار بولسنگده نه ارمان
 ييغلاي - ييغلاي، كوزي كريان، بغري بريان
 نه قيلغوسين ييلماي حيران قالدی كورونك
 حسرت داغين كونكلوميزه سالدی تمام
 ايشينك بونه قدرت تورور اي خاص عام
 قدرتين كورشنده ادهلار بولدی علام
 حق يانيب مونداغ جزا سالدی كورونك
 قيزيل كل ديك نارسیده اول اوغلانلار
 دنيا اولوب كيم كوروبدور مونداغ داغلار
 مجنون يانكليغ ديوانه ديك بولدی ساغلار
 عاجز بولوب مسلمانلار قالدی كورونك
 ايركيم بولسه شاه مردان بولغای ايرديم
 بو ايلكيم كا آلماس قيليج آلغای ايرديم
 بو كافرلار بارچه چري سيني قيرغای ايرديم
 علاجيم يوق تيو ارمان قالدی كورونك
 آق سینه منی بجل قيلديم اي فرزنديم
 نه بازوق بير خدايمغه جكر بنديم
 اولومدين هم بتر بولدی مينينك درديم
 بو دنيا ده هجران داغين سالدی كورونك
 بارچه داغلار ايچره مشكل هجران داغی
 هجراندين هم بتر ايرميش فرزند [او] داغی
 بورا كيم دين سيريليب ايچيم كا قان تولدی كورونك
 بلا كوبتور مونداغ هرکز بلا يوقتور
 ترمليتوبان بيزدين كافر ايريب ايلتور
 اجل يتيب كوركا كيرمك نه دولت دور
 مونداغ ديوان نوحه فرياده قيلدی كورونك

سىن سىز منكا طعام يمك قىقىزىل قان
 سىن سىز منكا ينكا كىراك بوتىندە جان
 سىن سىز منكا قرانغودور اوشبو جهان
 سىنىنك دردىنك تىو حسرت قىلدى كورونك
 انا فرزند بر بريغه چوغلاشتىلار
 فرىاد اوروب قوجاغلاشيب يىغلاشتىلار
 حسرت ايتوب ارمان بيله يىغلاشتىلار
 نه مشكل دور الوداع ديب قالدى كورونك
 بىل بولارنى قرانغولوق باستى تمان
 بىزكا غضب قىلدى بو كون قادر اوغان
 كافر يىغىب آليب چىقتى شاد و خندان
 مسلمانلار فرىاد اوروب قالدى كورونك
 توبه دىنكلار نه قدرت دور خلقى جهان
 آخر زمان نشانلارى بولدى عيان
 غم داغينه يوز تسىلى قىلدىم بيان
 تانك عجايب كونلار ايمدى بولدى كورونك
 ازل كونده ايدىم بىزكا قىلدى تقدير
 بىزدىن اوتوب آنچه خطا قىلدوق تقصير
 آنىنك اوچون نارسىده بولدى اسير
 فعلىمىزدىن بىزكا جفا سالدى كورونك
 نه اناده رحم قالدى نه آتاده
 اغا اينى بر بريغه ماجراده
 مسلمانلار دعوى قىلور ايچار باده
 مستلىق بىلان قرىنداشدىن تاندى كورونك
 كورماسموسىز زمانه لار جوش ايلدى
 بورونغى قدردانلار هيچ قالمادى
 قدر بىلماس ناكسلاركا اورون تىكدى
 عالم درویش يخشىلار خوار بولدى كورونك

ناکس، خسیس، بی دیانت قول لار حاکم
 من - من لیک حد دین اشیب بولدی ظالم
 خلق ایچنده خوار بولدی لار درویش عالم
 حمایتی خلق نی کافر بولدی کورونک
 کونکل لارنی توتی تمن قرانغولوق
 بیزکا یوقتور ایمدی کورماک بر یاروغولوق
 یولدین آزیب شریعت نی پاس توتما دوق
 دین قالیبان بل مسلمان بولدی کورونک
 دیانت سیز، خسیس لارنیک خطری یوق
 دنیا مالین ییغیب هرکز تویاری یوق
 پر زور بولوب اولوم دین هیچ خبری یوق
 او فردنیک دین دنیا بولدی کورونک
 قول غریب نیک سوزی تقلید تحقیق ایماس
 دردی یوقتور بو سوزلارکا قان ییغلاماس
 غیب علمین حقدین او کون کیمسه ییلماس
 والله اعلم بالصواب دیب ایدی کورونک

(۹۵)

حکمت

ای کونکل قیلدینک کناه هرکز پشیمان بولمادین
 صوفی مین دیب لاف اوروب طالب جانان بولمادینک
 حیف عمرونک اوتی بیر لحظه کریان بولمادینک
 صوفی نقش بولدونک ولی هرکز مسلمان بولمادینک
 صوفی لیغ شونداغ مودور دایم ایشینک غفلت بیلان
 دانه تسبیح قولونکده تیل لارینک غیبت بیلان
 سله چل پیچ اورارسین نفس بد عزت بیلان
 صوفی نقش بولدونک ولی هرکز مسلمان بولمادینک

صوفى بولسنىك صاف بولغىل جرم عصيان بولماسون
 طاعت تقوى قىليب كونكلونك پريشان بولماسون
 جلن دلدە يىغلاغىل محشرده يالغان بولماسون
 صوفى نقش بولدونك ولى هرگز مسلمان بولمادينك
 صوفى ليق شرطى دورور تونلار قوبوب قان يىغلاماق
 هر جفاغه صبر ايتوبان بىلىنى محكم باغلاماق
 طالب الله بولوب هر يخشى سوزنى سوزلاماق
 صوفى نقش بولدونك ولى هرگز مسلمان بولمادينك
 صوفيا طاعت قىلورسين بارچهسى عجب و ريا
 جان و دل دنياغه مغرور تىللارينكده آه و آه
 جان بيوروده بولغونك نور ايماندين جدا
 صوفى نقش بولدينك ولى هرگز مسلمان بولمادينك
 صوفى بولماي نىلاسون اويدە قىلورغه ايشى يوق
 صوفى ليغ دعوى قىلور خلقغه بيورورغه آشى يوق
 آه و آه ديرلارينه كوزيده قطره ياشى يوق
 صوفى نقش بولدونك ولى هرگز مسلمان بولمادينك
 صوفى بولوب نفس اوچون هر دم ايشيك كا باقهسين
 نذر آليب كىلديموديب هر دم كيشيك باقهسين
 لعنتى اللهنى بوينونك كا هر دم تاقهسين
 صوفى نقش بولدونك ولى هرگز مسلمان بولمادينك
 صوفى مين ديب لاغ اورارسين سوز اغانينك قانى
 اشك سرخ و روى زرد و چشم خونبارينك قانى
 مرشد كامل، مكمّل راه مردانينك قانى
 صوفى نقش بولدونك ولى هرگز مسلمان بولمادينك
 صوفيا بى غم يورارسين دانه تسبيح آليب
 دنياغه مغرور بولوب دين ايشينى آرقه ساليب
 قورققىل ايمدى قورققىل ايمدى خداغه يالباريب
 صوفى نقش بولدونك ولى هرگز مسلمان بولمادينك

صوفى بولوب مال كس آلقاق اوچون قىلدىنك جدل
 ظاهرىنك صوفى نىمادور باطينىنك دون و دغل
 اى بى خبر اى بى خبر شرمندە سىن روز ازل
 صوفى نقش بولدونك ولى هرگز مسلمان بولمادىنك
 دانه تسبيح آلىب ايل كوزيغه خوب صوفى سىن
 نفس بدنى آلدیده ترسا جهودنى توفى سىن
 بنده ليغ قىلنك خداغه يوخسه سك كوفى سىن
 صوفى نقش بولدونك ولى هرگز مسلمان بولمادىنك
 صوفيا اوز طورىنكا يالغوز خداغه بنده سىن
 اصلينكا باقسىنك اكر عالم ايچنده كنده سىن
 پر كناه و پر خطر هم عاصى و شرمندە سىن
 صوفى نقش بولدونك ولى هرگز مسلمان بولمادىنك
 صوفيا قىلدىنك محبت دعوى سىن ديوانه بول
 مال و ملك و خانماندين كيچىكل و بيكانه بول
 كيم خدا ديب سوزلاسه مينك اوركولوب پروانه بول
 صوفى نقش بولدونك ولى هرگز مسلمان بولمادىنك
 صوفيا دعوى عشق قىل بارجه دين بيزار بول
 اويقونى ايلاب حرام تونلار قوبوب بيدار بول
 دردى يوق بيدردنى كورسنىك قاققىل و آزار بول
 صوفى نقش بولدونك ولى هرگز مسلمان بولمادىنك
 احمداسىن صوفى بولسنىك صوفى ليغ آسان ايماس
 حق رسول صوفى بولوب دنيا مالىن سويكان ايماس
 دنيانى سويكان كيشى بى شك يىلىنك انسان ايماس
 صوفى نقش بولدونك ولى هرگز مسلمان بولمادىنك

(۹۶)

حکمت

حق تعالی پرتو سالدی جانیم کویدی
کیلینک ییغلینک ذاکر قوللار ذکر ایتالیک
سحر وقتده پیر مغان باقیب سوردی
کیلینک ییغلینک ذاکر قوللار ذکر ایتالیک
ذاکرلارغه وعده قیلدی قادر خدا
کور ایچنده عطا قیلدی حوری لقا
ذاکرلارنی تورار جای دارالبقا
کیلینک ییغلینک ذاکر قوللار ذکر ایتالیک
ذاکر بولسه شاکر بولسه ییری جنت
قانلار آقسه کوزلاریدین قیلماس منت
امت بولسنک ذکرین ایتماک سیزکا سنت
کیلینک ییغلینک ذاکر قوللار ذکر ایتالیک
ذاکرلارکا خدا اوزی وعده قیلدی
فاذکرونی اذکرکم آیت کیلدی
فردوس آتلیغ جنتی دین محضر کیلدی
کیلینک ییغلینک ذاکر قوللار ذکر ایتالیک
ذاکرلاری هر نفسده ذکرین ایتار
توبه قیلیب ایکری یولدین راستغه قیتار
ذکرین ایتسه آسته - آسته شوقی آرتار
کیلینک ییغلینک ذاکر قوللار ذکر ایتالیک
ذاکرلاری حلقه ایچره پرتو کورار
آنینک اوچون حلقه ایچره اوزین اورار
معشوقی نی کورکان زمان جانین بیرار
کیلینک ییغلینک ذاکر قوللار ذکر ایتالیک

يالغان عاشق معشوقيدىن جانين ايار
 عقبى يولين آرقه تاشلاب دنيا سويار
 هو حلقه سين قورغان ييردين ايلار فرار
 كىلنك يىغلينك ذاكر قوللار ذكر ايتاليك
 "الكذاب لامتى" ديدى سرور
 بو سوزلاركا يول بير كوچى هادى رهبر
 يالغانجى نى امت ديماس اول پيغمبر
 كىلنك يىغلينك ذاكر قوللار ذكر ايتاليك
 رحمن ايكام چين عاشق نى يولين آچار
 محبت نى شوقى برله ياشين ساچار
 الله تيو قايدى بارسه شيطان قاچار
 كىلنك يىغلينك ذاكر قوللار ذكر ايتاليك
 ذاكرلارى ذكرين ايتيب ناله قىلور
 كوز ياشينى سريغ يوزكا ژاله قىلور
 بيابانلار كيزيب اوزن واله قىلور
 كىلنك يىغلينك ذاكر قوللار ذكر ايتاليك
 ذاكر قوللار حق فرمانين محكم توتار
 اخلاص برلان الله تيو قانلار يوتار
 حلقه ايچره كيركان وقتده جاندين اوتار
 كىلنك يىغلينك ذاكر قوللار ذكر ايتاليك
 بى طهارت ذكر ايكانكا لعنت ياغار
 اوشل كوني بولغان فرزند شيطان توغار
 اولار وقتده اول كيليب شيطان باقار
 كىلنك يىغلينك ذاكر قوللار ذكر ايتاليك
 بى طهارت ذكرين ايتكان ايمان ايتماس
 اولار وقتده حق مصطفى قولين توتماس
 سبحان ايكام كناهينى هرگز اوتماس
 كىلنك يىغلينك ذاكر قوللار ذكر ايتاليك

مؤمن بولسنىڭ بىي طهارت ذكرىنى ايتىمە
 كرامەتلار ايتىپ ھلقە دىنىنىڭ ساتمە
 مىلمانلىغى دعوى قىلىپ كافر كىتمە
 كىلىنىڭ يىغلىنىڭ ڤاكر قوللار ڤاكر ايتالىك
 ڤاكر بولسنىڭ ذكرىنى ايتماي ھركىز ياتمە
 نادان بىرلە ناچىنىس لاركا ھىچ سوز قاتمە
 منافىقلار ھالدىن سورسە بىر سوز ايتمە
 كىلىنىڭ يىغلىنىڭ ڤاكر قوللار ڤاكر ايتالىك
 قول خواجه احمد يامانلارنى يمانى سىن
 بارچە بىغداي ايل توتماكان سمانى سىن
 يولدىن آزغان كىمراھلارنى نادانى سىن
 كىلىنىڭ يىغلىنىڭ ڤاكر قوللار ڤاكر ايتالىك

(۹۷)

حکمت

اىزىم يادى اولوغ ياددور ايتور بولسم
 عىل يىنكىلىغى سچوك بولور تىلىم مىنىڭ
 اوزوم فقير قىلدىم مۇقر بولدوم ھقير
 قىنات قاقار اوجار قوشدىك كونكلوم مىنىڭ
 تورلوك عىشىم، تورلوك ايشىم، مونكلوغ باشىم
 ايردى جانىم، كىتى ھوشوم، آقتى ياشىم
 يازوق بىلان تولدى توكال ايچى تاشىم
 بى نىازىم آجا بىرسون يولىم مىنىڭ
 كوزوم توشتى، كونكلوم اوجتى عرىشە آشتى
 عمرىم كىچىتى، نىسىم قاچتى، بىرىم تاشتى
 كاروان كوچتى، منزل آشتى، ھارىب توشتى
 سر اولاشتى نىتاك بولغان ھالىم مىنىڭ

صورت مونده سیرت آنده قدرتینده
 اوزون تونده، یاروق کونده، کونکلوم آنده
 یورار تونده بولوب بنده باری قانده
 سورسه آنده یازوق تورور تیلیم منینک
 ایچتیم شراب، بولدیم خراب، اصلیم تراب
 کیلدیم کوراب، کونکلوم سراب، عشقه پراب
 حقدین خطاب کیلسه کورماس قوللار عذاب
 بولاق ینکلیغ آقار کوزدین یاشیم منینک
 توشتم اوزار، براق توزار، کیمسه بازار
 دنیا بازار ایچره کیریپ قوللار آزار
 باشیم بیزار، یاشیم سیزار، قانیم توزار
 آتیم احمد ترکستاندور ایلیم منینک

(۹۸)

حکمت

ایا دوستلار مصطفی دین بیان ایلای
 قولاق سالکیل خاص امتی بولای دیسنک
 اول رسول مجتبی نی عیان ایلای
 قولاق سالکیل خاص امتی بولای دیسنک
 یوز منک ندا حقدین کیلدی ایشیت آنکا
 امتلارنینک حواله سین قیلغیل مینکا
 جمله سینی باغشلایین آنده سینکا
 قولاق سالکیل خاص امتی بولای دیسنک
 آتام - آنام دیمادیلار دیدی امت
 حمد ثنا تینمای ایتیپ بولغیل الفت
 قیامتده کورمکای سین حقدین کلفت
 قولاق سالکیل خاص امتی بولای دیسنک

وا دريغا اوتى عمروم قانى عشقيم
 امت ايدىم دنيا سري بولدى ذوقيم
 باطن كذاب ظاهریمده باردور دلقيم
 قولاق سالکیل خاص امتى بولای دیسنك
 ییغلامایمو یولده قالدییم عملیم یوق
 امت دیدى آنینك سري جدلیم یوق
 باشیم کیتسه بو یول لاردین تایریم یوق
 قولاق سالکیل خاص امتى بولای دیسنك
 کوجوم ییتیپ کعبه ساری بارمادییم من
 عالم لارنى نصیحتین المادییم مین
 حقدین قورقوب یخشى یولغه کیرمادییم مین
 قولاق سالکیل خاص امتى بولای دیسنك
 یاشیم ییتیپ عمروم اوتوب توبه قیلماى
 آخرتنى اسبابنى قولغه آلمای
 یخشیلارنى خاك پای بولوب یورماى
 قولاق سالکیل خاص امتى بولای دیسنك
 امت بولسنك کیچه - کوندوز طاعت قیلغیل
 عقبى ساری بارغل آنده راحت کورغیل
 عاقل ایرسنك ییغلامقنى عادت قیلغیل
 قولاق سالکیل خاص امتى بولای دیسنك
 چین امتى جاندىن کیچیپ دنيا قویدی
 اولار وقتده امتیم دیب ناله قیلدى
 واله بولوب بلبل صفت حقنى سویدی
 قولاق سالکیل خاص امتى بولای دیسنك
 درود ایتکیل امت بولسنك ای بی خبر
 رسول الله سوزین ایتدییم کان کوهر
 رسول ایدی دنيا بیر کون قیلور ضرر
 قولاق سالکیل خاص امتى بولای دیسنك

وای اَمْتِیم، وای اَمْتِیم دیدی احمد
 آنینک اوچون سبحان ایذیم قیلدی رحمت
 آمین دیکیل قیامت کون قیلغای شفقت
 قولاق سالکیل خاص امتی بولای دیسنک
 قول خواجه احمد یولغه کیرکیل حالا فرصت
 الله دیکیل عمرونک اوتی دم غنیمت
 قیدا بارسنک تکبیر ایتیب قیلغیل صحبت
 قولاق سالکیل خاص امتی بولای دیسنک

(۹۹)

حکمت

مینک تومن تورلوك خطالار میندین اوتسه عفو قیل
 کفتکوی ناروالار میندین اوتسه عفو قیل
 کر تلاوت قیلمشیمده بو کلام اللهنی
 سهو، عصیان، خطالار میندین اوتسه عفو قیل
 اوقوغانده غافل اوتسه یا غلط نقصان بیله
 هر نیچوک بیجا بجالار میندین اوتسه عفو قیل
 مدّ بیلان اعراب و تشدیدلارنی تغیر ایلاسام
 بو کلامه هر خطالار میندین اوتسه عفو قیل
 فحش اوقوسام بیر کلمه سینی یا بیر حرفی نی
 مونداغ ناتام دعا لار میندین اوتسه عفو قیل
 آیت وعده وعیدنی قیلمسام مین تفرقه
 فهم قیلمای نارسالار میندین اوتسه عفو قیل
 عزت اکرام قرآننی بیجا کیلتورمسام
 بی ادبلیک بی ابالیغ میندین اوتسه عفو قیل

حضرتینکده من کبی قولنی خطاسی کوب ایرور
 رو سیاهلیک هر خطالار میندین اوتسه عفو قیل
 خواجه احمد مسکینی نقصانی کوبتور دنیاده
 کرچه یارب مینک خطالار میندین اوتسه عفو قیل

(۱۰۰)

حکمت

عقبی خبرین ایشیتیب دنیانی سالیب کیتارم
 توشدوم ایرانلار بحریکا دنیانی سالیب کیتارم
 ایرانلار دنیا دیمدی دنیا غمین یمادی
 حقدین اوزکانی دیمادی دنیا سالیب کیتارم
 موسی عمران قالمادی تختی سلیمان قالمادی
 مینک یاشلیغ لقمان قالمادی دنیا سالیب کیتارم
 دنیا دیکان آزار ایرمیش عاقل قوللار بیزار ایرمیش
 جاهلار برله یار ایرمیش دنیانی سالیب کیتارم
 سلطان خواجه احمد یسوی ایدی بو حکمتنی تمام
 ایشیتسون دیب جمله جهان دنیانی سالیب کیتارم

(۱۰۱)

حکمت

الله دیکان بندهنی جاین جنتده کوردوم
 حور غلمان جمله سین قارشو آلدیده کوردوم
 فاذکرونی ذکرینی ایتکان قوللار دایما
 جمله سین همراهی بهشت عدنیده کوردوم

تونی - کونی اوخلامای "هو" ذکرینی ایتقانلار
 ملائک لار همراهی عرشنی اوستیده کوردوم
 خیر سخا قیلغانلار یتیم کونکلین آغانلار
 چهار یارلار همراهی کوثر لبند کوردوم
 قاضی بولغان عالملار پاره رشوت بیکانلار
 انداغ عالم جایینی نار سقرده کوردوم
 مفتی بولغان عالملار ناحق فتوی بیرکانلار
 انداغ مفتی جایینی صراط کوفروکده کوردوم
 جماعت کا بارمایین ترک نماز قیلغانلار
 شیطان برله بر بیرده درک اسفلده کوردوم
 ظالم بولوب ظلم ایتکان مؤمنلارنی آغریتکان
 قرا یوزلوق محشرده قولین آرقهده کوردوم
 قول خواجه احمد کان آجتی در کوهرنی ساجتی
 تینکلامکان بو سوزنی غفلت ایچنده کوردوم

(۱۰۲)

حکمت

نیت قیلدوق کعبه کا رضا بولونک دوستلاریم
 یا اولکایمیز کیلکایمیز رضا بولونک دوستلاریم
 نیت قیلدوق کعبه کا حق مصطفی روضه کا
 نصیب قیلغای بارجه کا رضا بولونک دوستلاریم
 رضا بولونک اوزوم دین یخشی یمان سوزوم دین
 اوتونک مینی یوزم دین رضا بولونک دوستلاریم
 دوستلار بیزنی یوقلاغای فاسقلار کوب اوخلاکای
 مسجد ساری کیلماکای رضا بولونک دوستلاریم

سردين بولدى اشارت مونده قىلدوق عمارت
 دوستلار قىلغاي عبادت رضا بولونك دوستلاريم
 كعبه سارى كوجالوك ظالم لاردين قاجالوك
 اوغل - قيزدين كيچالوك رضا بولونك دوستلاريم
 تىليم سورسام قرار يوق غريب اولسه سورار يوق
 ييميشلارده حلال يوق رضا بولونك دوستلاريم
 كيچتى قولنك جانيدىن چىقتى خلقنى ساندىن
 دوستلار باركاي سونكىدىن رضا بولونك دوستلاريم
 خواجه احمد يوم كوزونكنى رضا بولونك دوستلاريم

(۱۰۳)

حکمت

نيچه يىلىق مهربانىم جان ايدىلار دوستلاريم
 بو وجودوم شهرىنى فانى قىلادور دوستلاريم
 بو قفسرنى طوطىسى پرواز ايتادور اوجكالى
 بير قرانغو شعله سيز ييركا بارادور دوستلاريم
 اى منى يارانلاريم همت توتونك ايمانيمه
 دشمنيم ايمانيمه زحمت برادور دوستلاريم
 اوشبو جان بىزلار بىلان بير نيچه يىل لار ايدى
 حق تعالى حكىمى برلان عزم ايتادور دوستلاريم
 بو منى اعضالاريم جانيم بىلان شادمان ايدى
 جان چيقارغه كل اعضام تتراشادور دوستلاريم
 امر حقه بارجه خلق عالمين بولدى رضا
 اول حقيقت بندلار دايم رضادور دوستلاريم
 قول خواجه احمد طوطىسى پرواز ايتادور اوجكالى
 نيلاسون مسكين حكم خدادور دوستلاريم

یولغه کیرکان ایرانلاردین یولنی سورمای
 بیغلامایمو ای دوستلاریم خطا قیلدیم
 حق ذکرینی کیچه - کوندوز ورد ایلامای
 ایا دوستلار اوز جانیمه جفا قیلدیم
 الله یادی کونکلارنی روشن قیلغان
 عاشقلارغه خدا اوزی وعده قیلغان
 عشق نسیمی مصطفی‌غه تحفه کیلکان
 اول سبیدین کوز یاشیمنی کواه قیلدیم
 الله ایتور عاشقلاریم براق سوار
 حق ذکرینی ایتکانلارکا رحمت یاغار
 کوب بیغلاغان دیداریمنی بی شک کورار
 روز محشر دیداریمنی عطا قیلدیم
 وعده قیلدی عاشقلارغه یوز مینک براق
 عالم خلقی ملامتی آنکا یراق
 بو عالمده ایل کوزیکا یاتغان جراق
 عقبی ایچره یوز مینک کوشک‌لار عطا قیلدیم
 دردسیز آدم. آدم ایرمس مونی آنکلانک
 عشق‌سیز آدم حیوان جنسی مونی تینکلانک
 کونکولونکیزده عشق بولمسه منکا بیغلانک
 کریان‌لارغه خاص عشقیمنی عطا قیلدیم
 بنده بولسنک من - من لیک‌نی زینهار تاشلا
 سحرلارده جانینک قیناب تینمای ایشلا
 یولدین آزغان کمراه‌لارنی یولغه باشلا
 بیر نظرده دل‌لارینی صفا قیلدیم

چين دردليك كا اوزوم دارو اوزوم درمان
هم عاشق مين، هم معشوق مين اوزوم جانان
رحم ايلاييم آتيم رحمن ذاتيم سبحان
بیر نظرده باطن لارين صفا قیلدیم
تأنك آتقونچه حق یادینی آیغان کیشی
تاغ جولنی بوستان قیلور آقان یاشی
الله ایتور اوزکا برله یوقتور ایشی
اول عاشقنی خلایق دین جدا قیلدیم
عشق بادینی بیرکا سالسام بیر کوتارماس
دفتر قیلسام تا تریك سین بیتیب بولماس
حقنی بیلکان بیک و خان و خلقنی بیلماس
اول بنده منی اوز یولومده دوتا قیلدیم
مال و پلنی پروا قیلماس عاشق کیشی
یول اوستیده تفراق بولوب عزیز باشی
آندین سونکره نورغه تولور ایچی تاشی
تأنکلا بارسه محشر آرا پادشاه قیلدیم
حق دین قورقوب مال و پلنی سویماکاننی
حقنی ایتیپ بیر دم یاتیپ اویماکاننی
یاتسه قویسه حق ذکرینی قویماکاننی
آچتیم باطن کوزلارینی بینا قیلدیم
روژه توتوب خلقغه ریا قیلکانلارنی
نماز اوقوب تسبیح قولغه آلکانلارنی
شیخ مین تیو اوزکا بنا قویغانلارنی
آخر دمدد ایمانی دین جدا قیلدیم
حقه عاشق بولوب ایدی قول خواجه احمد
صدقی برلان ایشیتکانکا یوز مینک رحمت
دعا قیلای کورمکایلار محنت زحمت
عاقل ایرسنک بیر سوز برلان ادا قیلدیم

ایا دوستلار حسب حالیم بیان ایلای
 نه سبب دین حقدین قورقوب غارکا کیردیم
 چین دردلیک کا بو سوزلارنی عیان ایلای
 اول سبب دین حقدین قورقوب غارکا کیردیم
 غار ایچنده کیچه - کوندوز طاعت قیلدیم
 تطوع نماز اوقوب عادت قیلدیم
 هر نه جفا تیکسه آنکا طاقت قیلدیم
 اول سبب دین حقدین قورقوب غارکا کیردیم
 غار ایچنده مصطفی نی حاضر کوردوم
 سلام قیلیب ادب برله بیخود توردوم
 عاصی، جافی امتلارنی حالین سوردوم
 اول سبب دین حقدین قورقوب غارکا کیردیم
 غارکا کیرماک رسول الله سنتلاری
 طاعت قیلماق حق رسولنی عادتلاری
 غریبلارکا رحم قیلماق شفقتلاری
 اول سبب دین حقدین قورقوب غارکا کیردیم
 امت بولسنگ کیچه - کوندوز تینمای ییغلا
 بغرینک بیشیب اوپکانک تیشیب یورک دغلا
 اجل کیلسه مردانه وار بیلینک باغلا
 اول سبب دین حقدین قورقوب غارکا کیردیم
 بیر کون سینی عمرونگ برکی بولغای خزان
 اجل کیلمای توبه قیلغیل ایا نادان
 شاید سینکا رحم ایلاکای ایزیم یزدان
 اول سبب دین حقدین قورقوب غارکا کیردیم

چين دردليكنى ايشى ايرور سوز و گداز
 كوز ياشى دور حق قاشيده تحفه نياز
 كيچه كوندوز تينماي قيلغيل روزه نماز
 اول سبب دين حقدين قورقوب غاركا كيرديم
 ايا فرزند امتلارنى دردى اورتار
 فسق فجور كناهلارى تاغدين آرتار
 ديننى قويوب دنيا مالين اوزكا تارتار
 اول سبب دين حقدين قورقوب غاركا كيرديم
 قول خواجه احمد تكبير ايتيب صحبت باشلا
 هاى هوس من - منليكنى ياراق تاشلا
 سحرلارده چار ضرب اوروب تينماي ايشلا
 اول سبب دين حقدين قورقوب غاركا كيرديم

(۱۰۶)

حکمت

محبتنى بازارينده جولان قليب
 آخرتنى سوداسينى باشلاسام مين
 بو دنيانينك عزتلارين آرقه تشلاب
 خارليق - زارليق يوللارنى خوشلاسام مين
 بو يوللارده خارليق - زارليق دركار ايرميش
 تسبيح، تهليل، روزه، نماز بيكار ايرميش
 يالغانچيدىن خدا، رسول بيزار ايرميش
 يالغان نماز ريالارنى تاشلاسام مين
 چين كونكلده نماز قيلغيل خدا بيلسون
 خلق ايچنده رسوا بولغيل عالم كولسون
 تفراق صفت خارليق تارتقيل نفسنك اولسون
 همت بيرسنك نفسيم ييغيب يغلاسام مين

دوستلاریمنی رسوا قیلغان نفس هوا
 آنینک اوچون شیطان لعین قیلور غوغا
 لطف ایلاسک من - من لیکنی قیلای ادا
 ریاضتده جانیم قیناب ایشلاسام مین
 عشق یولیده قطره قطره قانلار یوتای
 رحمن آتلیغ رحمتنکدین امید توتای
 جام شراب توپا بیرسک جانن دین اوتای
 حسرتنکده ایکی کوزوم یاشلاسام مین
 نفسیم مینی اوتدیک یانیب یولیم اوردی
 یوز مینک تورلوک طعام تیلاب دوکان قوردی
 آغزین آجیب هر ایشک کا مینی سوردی
 همت بیرسک ایت نفسیمنی اوشلاسام مین
 عشقیم تاشتی روحم قاچتی قایدین تاپای
 آرقاسیدین عشق آتنی مینیب چاپای
 کمی کورسام خضر ییلب قولین توتای
 خضر و الیاس مدد قیلیب اوشلاسام مین
 کناهیم کوب یرکا سیغماس کیم کا ایتای
 توبه قیلیب ایکری یول دین راست کا قایتای
 ندامتده ایتلاریمنی اوزوب تارتای
 صد دریغ دیب بارماق لاریم تیشلاسام مین
 کناه قیلیب توبه قیلما ی حد دین آشتیم
 نفسیم مینی طغیان قیلدی طرفه شاشتیم
 بحمد الله پیری مغان سای قاچتیم
 قولغه آلیب نفس بدنی اوشلاسام مین
 قول خواجه هر بیر سوزونک دردکا درمان
 طالب لارکا بیان قیلسام قالماس آرمان
 تورتمینک تورتم یوز حکمت ایتم حق دین فرمان
 فرمان بولسه تا اولکونچه سوزلاسام مین

تینماین حضرتنکده الله دیسام
 زار اینکرا بان ذاکر بولوب ربی دیسام
 قول بولونک قوللیقینکده بویون سونسام
 بو ایش برله یا رب سینی تابقایمومین
 زکریاتیک بو باشیمغه ارّه قویسام
 ایوبتیک بو تنیمغه قورتنی قویسام
 موسی تیک طور طاغیده طاعت قیلسام
 بو ایش برله یا رب سینی تابقایمومین
 یونس تیک دریا ایچره بالق بولسام
 یوسف تیک قدق ایچره تون - کون بولسام
 یعقوب تیک یوسف اوچون زار اینکراسام
 بو ایش برله یا رب سینی تابقایمومین
 شبلی تیک عاشق بولوب سماع اورسام
 بایزید تیک تون - کون تینمای کعبه بارسام
 کعبه کا یوزم سورتیب زار اینکراسام
 بو ایش برله یا رب سینی تابقایمومین
 معروف تیک اوشبو یولغه قدم قویسام
 منصور تیک جاندین کیچوب دارده قونسام
 دار اوزره شوقلانیان حقنی ایسام
 بو ایش برله یا رب سینی تابقایمومین
 قول خواجه احمد قول لوق ایچره ضابط بولسام
 ذکر ایتیپ ذاکر بولوب ربی دیسام
 ذکرنده شوقلانیب کویوب یانسام
 بو ایش برله یا رب سینی تابقایمومین

اول الست بر بکم دیکاننده
 قالوا بلی دیکانیمنی بیلا آلماسمین
 وما دینکم دیبان ینه سورکاننده
 دینیم اسلام دیکانیمنی بیلا آلماسمین
 آلهیمدین ینه اوج یول کیلدی خطاب
 مؤمن ارواح ربیم سین دیب بیردی جواب
 جواب ایتمانی کافر قیلدی ایزیم وهاب
 مین هم جواب ایتکانیمنی بیلا آلماسمین
 جمله روح کا شول ساعتده فرمان یتتی
 فرمان بولغاچ دم اوتماين صف قورولدی
 کافر چبده مؤمن بنده اونکده توردی
 قایسی طرف تورکانیمنی بیلا آلماسمین
 سجده قیلدیب حقدین ینه فرمان بولدی
 سجده قیلیب بارجه مؤمن اولوش آلدی
 سجده قیلماي قالغانلاری کافر بولدی
 مین هم سجده قیلغانیمنی بیلا آلماسمین
 ای مؤمنلار وهمی برلان بولدوم کریان
 بو غم برلان عقلم حیران یورارکیم قان
 تندین اوتوب دلدین اوتوب اورتادی جان
 نیچوک علاج ایتاریمنی بیلا آلماسمین
 خدایمنی قدرتی غه یتیب بولماس
 شقی، سعید امر قیلدی بیلیب بولماس
 طاقت قیلیب خلق ایچنده توزوب بولماس
 قایسی طرف کیتاریمنی بیلا آلماسمین

بیرنی گبر و بیرنی کافر یهود قیلدی
 بیرنی مؤمن بیرنی کافر یهود قیلدی
 عزایلنی درکاهیدین مردود قیلدی
 نه سببدین قیلغانینی بیلا آلماسمین
 کنهیم کوب تاغدین آغیر طاعتیم آز
 طاعت قیلمای عمرورم اوتی قیش و هم یاز
 درکاهی کا بارور بولسام یوقتور نیاز
 نه یوز برلان بازاریمینی بیلا آلماسمین
 جاندین کیچکان چین عاشقلار اوزین کوردی
 روز ازل ینه بیرنی عاشق قیلدی
 لطف کرم ایلاب آنکا عشقین سالدی
 آنده دیدار کوراریمینی بیلا آلماسمین
 زاهد قیلدی ینه بیرنی طاعت اوچون
 زاهد ینه طاعت قیلمس راحت اوچون
 حور غلمان طوبی ولدان جنت اوچون
 زاهد دیدار کوراریمینی بیلا آلماسمین
 آخرتنی یراغینی قیلا آلمادیم
 یوللار اوزاق یول آزوقین آلا آلمادیم
 جاندین کیچیب حق امرینی قیلا آلمادیم
 آزوق سزین بازاریمینی بیلا آلماسمین
 تویمای قالدیم دم اوتمایین عمریم اوتی
 ملک الموت کیلماکی هم یاووق یتتی
 ایا دوستلار عمل سیز مین یاشیم قاتی
 نه حال برله کیتاریمینی بیلا آلماسمین
 بیر فرصته یتیب کیلمای اوتمای ساعت
 هیتی کا یر و کوکلار قیلماست طاقت
 فرمان بولسه آلهیمدین ملک الموت
 نیچوک طاقت قیلاریمینی بیلا آلماسمین

جان آلورغه اول عزرائيل كيليپ تورسه
 جانينك بيرديپ هييت برله بير چنك اورسه
 اوچ يوز التميش تامورلاريم تترار بولسه
 نه حال برله باراريمنى بيلا آلماس مين
 اهل عيال يوزونك سارى باقيب توركاي
 باقيب توروب سوز ايتورغه تيلينك كيلماي
 رحم ايتمه يقين ايشينك يراق بولغاي
 حيران بولوب نيتاريمنى بيلا آلماس مين
 خدايمنى امرى برله جانيم آلسه
 جانيم آنده باريب تنيم مونده قالسه
 رنكيم مثل برك خزان ينكليغ سولسه
 ايمان برله باراريمنى بيلا آلماس مين
 اهل عيال قورشاب توركاي ييغلاب سيني
 يوغوچى لار تخته اوزره آلغاي سيني
 سونى قويوب پاك ايلاكاي ظاهرىمنى
 باطينىمنى يوغانىنى بيلا آلماس مين
 آندين سونكره كفن تونين كيدوركايلار
 پاك ناپاك ميني ساليب چولغاكايلار
 باش آياغيم محكم توتوب باغلاكايلار
 توبه تونين كيكانىمنى بيلا آلماس مين
 تورت آياغليغ تابوتىمنى كىلتوركاي لار
 ميني ساليب تورت طرفدين كوتاركاي لار
 ثنا ايتيب جنازهمنى اوقوكاي لار
 مين هم ثنا ايتاريمنى بيلا آلماس مين
 آندين سونكره ميني ساليب روان بولسه
 ييتميش ايكي يردده مندين سؤال سورسه
 جواب بير ديب فرشته لار وحشت قيلسه
 نيچوك جواب بيراريمنى بيلا آلماس مين

تابوت برله آلیب تورسه کور باشنده
 یارانلاریم ییغلاب تورکای کوب قاشیمده
 یالغوز ییغلاب قورغوم ایل باشیمده
 آنده نیچوک قیلاریمنی بیلا آلماسمین
 بو حسرتده کور اوی کا کرار بولسام
 الوداع دیب بارجه کیتیپ یالغوز قالسام
 مار کژدم اوفراب تورسه قاچا آلماسام
 نه حال برله قاچاریمنی بیلا آلماسمین
 ای مؤمنلار عجب اویدور قرانغو کور
 پر وحشتلیک سیاستلیک هیبتی زور
 الله اوزی لطف ایلاسه بولور پرنور
 لطف ایتماسه نه قیلاریمنی بیلا آلماسمین
 مینی قویوب یتتی قدم کیتار بولسه
 منکر نکیر اوشال دمده کیریپ کیلسه
 "من ربك" دیب فرشتهلار باقیب تورسه
 ربیم الله دیکانیمنی بیلا آلماسمین
 قول خواجه احمد منزل خطر یوللار یراق
 بارور یرینک یاووق تورور بارمو یراق
 توبه قیلیب اوزین بیلکان آلدی یراق
 مینهم توبه قیلغانیمنی بیلا آلماسمین

(۱۰۹)

حکمت

عشقنک قیلدی شیدا مینی جمله عالم بیلدی مینی
 قایغو سینسین تونی - کونی مینکا سینوق کرکسن
 تعالی الله زهی معنی سین یاراتدنک جسم و جانی
 قوللیق قیلام تونی - کونی مینکا سینوق کرکسن

کوزم آچدیم سینی کوردیم کل کونکلنی سنکا بیردیم
 اوروغلاریم ترکین قیلدیم مینکا سینوق کرکسن
 سوزلاسام مین تیلیمده سین کوزلاسام مین کوزیمده سین
 کونکلیمده هم جانیمده سین مینکا سینوق کرکسن
 فدا بولسون سینکا جانیم توکار بولسانک مینم قانم
 مین قلنک مین سین سلطانم مینکا سینوق کرکسن
 عالم لارکا کتاب کیراک صوفیلارغه مسجد کیراک
 مجنون لارغه لیلی کیراک مینکا سینوق کرکسن
 غافل لارکا دنیا کیراک عاقل لارغه عقبی کیراک
 واعظ لارغه منبر کیراک مینکا سینوق کرکسن
 عالم باری اوجماخ بولسه جمله حورلار قارشو کیلسه
 الله مینکا روزی قیلسه مینکا سینوق کرکسن
 اوجماخ کرم جولان قیلام نه حورلارغه نظر قیلام
 آنی - مونی مین نه قیلام مینکا سینوق کرکسن
 خواجه احمد در منم آتم تونی کونی ینار اوتم
 ایکی جهانده امیدیم مینکا سینوق کرکسن

(۱۱۰)

حکمت

سحرلارده قویوب ییغلاب دعا قیلسام
 دوستلار خواجه مینی بندم دیکایموکین
 یاش اوزینغه قانیم توکوب دعا قیلسام
 دوستلار خواجه مینی بندم دیکایموکین
 درکاهیغه باشیم قویوب ناله قیلسام
 کوز یاشیمنی آقوزوبان ژاله قیلسام
 بیابانلار کیزیب اوزوم واله قیلسام
 دوستلار خواجه مینی بندم دیکایموکین

قایدا بارسام یادین ایتب ییغلاسام مین
 خدمتیدا بیلیم محکم باغلاسام مین
 حسرتیده یوراک بغریم داغلاسام مین
 دیکایموکین دوستلار خواجم مینی بندم
 هرکون یوز مینک قولوم آجیب آمین دیسام
 موسی صفت طور تاغیدا رازین ایتسام
 توقسان توقوز رازین ایتب جانیم بیرسام
 دیکایموکین دوستلار خواجم مینی بندم
 بایزیددیک یتیمش یولی اوزوم ساتسام
 الله تیو دردی بیلان اولوب کیتسام
 ریاضتده اریب ازیب اچیب قاتسام
 دیکایموکین دوستلار خواجم مینی بندم
 الله اوچون فرزندلاریم یتیم قیلسام
 ریاضتده سونکاکلاریم حلیم قیلسام
 اهل - عیال، خانمانیم غنیم قیلسام
 دیکایموکین دوستلار خواجم مینی بندم
 الله دیکان بندهلارنی قولی بولسام
 عاشقلارنی کویوب اوچکان کلی بولسام
 پول اوستیده تفراق صفت یولی بولسام
 دیکایموکین دوستلار خواجم مینی بندم
 الله - الله جانیم الله، دلیم الله
 سیندین اوزکا پناهیم یوق والله بالله
 ییغلاب کیلدیم درکاهینکا شیء لله
 دیکایموکین دوستلار خواجم مینی بندم
 یخشیلارنی صحبتنده ذاکر بولسام
 هر نه جفا تیکسه مینکا شاکر بولسام
 ایوب صفت بلاسیغه صابر بولسام
 دیکایموکین دوستلار خواجم مینی بندم

آستانکغه باشیم قویوب توبه قیلسام
 غیبت قیلغان تیل لاریمنی یوز مینک تیلسام
 کنه قیلغان بندلاریمنی پاره قیلسام
 دوستلار خواجه مینی بندم دیکایموکین
 توبه قیلدیم، توبه قیلدیم قبول قیلغیل
 توبم قبول قیلماس بولسانک جانیم آغیل
 یولده قالدیم، یولده قالدیم قولیم آغیل
 دوستلار خواجه مینی بندم دیکایموکین
 الله اوچون مردانه وار جانیم بیرسام
 اهل عیال خانمانیمی تاشلاب کیتسام
 جان نه بولغای ایمانیمدین بلکه اوتسام
 دوستلار خواجه مینی بندم دیکایموکین
 سحرلارده ایرته قویوب حقه یانسم
 اولوغ کیچیک کناهلاردین توبه قیلسم
 زاری قیلیب حضرتیکا بویون سونسم
 دوستلار خواجه مینی بندم دیکایموکین
 قهار ایکام سندین قورقوب اویغانسام مین
 کناهیمغه اقرار قیلیب اینکراسام مین
 سحرلارده یقام اوشلاب یالبارسام مین
 دوستلار خواجه مینی بندم دیکایموکین
 تاشقین کیلکان دریالارده یوزلاسام مین
 آزیب قالغان بوتهلاردک بوزلاسام مین
 اولار وقتده مینک بیر آتینک سوزلاسام مین
 دوستلار خواجه مینی بندم دیکایموکین
 وا ویلنا ندامت دیب قورقوب قوپسام
 پیر مغان درکاهینی تینمای اوپسام
 یخشیلارنی خاکپای بولوب اولسام
 دوستلار خواجه مینی بندم دیکایموکین

تاناك آتقونچه ييغلاب تينماي قورقوب چقسام
 سبحان دردین آيتيب دوام اينكراب چقسام
 تفراق صفت عاجز بولوب خوارليق تارتسام
 دوستلار خواجه مینی بندم ديكایموکین
 قول خواجه احمد جانينك بيرکیل مردانه وار
 جاندين كيچيب يولغه کيرسنگ کورکونك دیدار
 مرادینکنی بیروړ سینکا پروردگار
 دوستلار خواجه مینی بندم ديكایموکین

(۱۱۱)

حکمت

محبت نی کوچه سینی کیزکان عارف
 یخشی بیلور خم کانلارنی علامتین
 ارادت دین قول لاریغه حربه آلیب
 دفعین ایلار مضرت نی سلامتین
 انداغ عاشق ایاقیغه باشین قویسه
 بنا قویمای نفس هوانی کوزین اویسه
 شوق شراین ایچیب تاکه روحی قانسه
 هیچ آغزندین سالماس توبه ندامتین
 یولین تابیب باطن کوزی آچیلکانلار
 خار - خسدیک ایاغ آستی یانجیلکانلار
 برک کلدیک سولوب توزوب ساجیلکانلار
 عار آلماس اول خلایق ننگ ملامتین
 صوفی کیراک قنیمزنی قیلسه صافی
 طاعت قیلسه ماننده بشر حافی
 آندین سونکرده وعده سیغه بولار وافی
 بیشک کورار هر کیم کشف کرامتین

"رجال لا تلهيهم" ديب ایدی خدا
 اوشل مردان ماسوی دین بولور جدا
 ذکرین ایتیپ هر نفسده اولسه روا
 تاپار هر دم "غوٹ الغیاث" جلالتین
 لاهوت آرا مرید اکر مقام توتسه
 درویش لیکده قوق تورث مقام آندین اوتسه
 شیخ مین تیو بنا قیوب اوتنی یوتسه
 بی مشقت تابماس ایمان حلاوتین
 دور ایاغی یتیب کیلدی ای بی خبر
 ایچرور قویمای نیچه اکر قیلسنک حذر
 واحسرتا ایمانینکده کوبتور خطر
 قوتولماس سین بیرمای آنی امانتین
 قول خواجه احمد ظاهر اعمی یول اداستی
 طالب لارنی صحبتی دین یراق قاچتی
 قریب جوکوب حق یولیغه عقلی شاستی
 تانکلا بارسه کورماس کورنی فراغتین

(۱۱۲)

حکمت

بو عالمده حق دین قورقوب زار اینکراسام
 آخرتده روحوم آرام آلارموکین
 ایرانلارنی باسقان ایزین کوزکا سورسام
 پیر مغان مین یولغه سالارموکین
 باشیم بیریب، بیلیم باغلاب، قیلسام اخلاص
 نفس شیطان چنکالیدین بولسام خلاص
 جان بیرارده مدد قیلسه خضر الیاس
 "غوٹ الغیاث" ختم "یس" قیلارموکین

تاغ جولار كناهيم دين قيلماس طاقت
 هركون يوز مينك جرم عصيان مينكا عادت
 بو ايش برلان آخرت ده بارمو راحت
 قالارموكين توبه قيلسام عاديلاريم
 آستانه كا باشيم قويوب زاري قيلسام
 غريب يتيم باشين سيلاب دعا آلسام
 حقدن قورقوب دنيا ايشين آرقه سالسام
 سورارموكين خواجه مني حال دليم
 آدم صفي سنتلارين تيل كا آلسام
 "يا ربانا ظلمنا" ديب ناله قيلسام
 بيابانده كوز ياشيني ژاله قيلسام
 سالارموكين بير و باريم ميني يولغه
 سحرلارده زاري قيليپ ييغلاسام مين
 جان بيرارده بيليم محكم بغلاسام مين
 شوقي برلان يورك بغريم داغلاسام مين
 يانارموكين حق چراغي قبريم ايچره
 باشيم تنيم تفراق قيليپ فنا بولسام
 ديدار تيلاب حسرتيده ادا بولسام
 اهل عيال خانمان دين جدا بولسام
 كيلارموكين دوستلار خواجه مينكا رحمى
 شيطان لعين يولدين اوردى حاليم تباہ
 ييغلاميمو نفسيم ميني قيلدى هوا
 عالم خلقي باسيب اوتسه ميني اوا
 تانارموكين كافر نفسيم عزازيل دين
 غريب جانيم حق يوليده نذر ايلاسام
 شاه حسين ديك كربلاده سوساب اولسام
 حق شرايين ايچر مين ديب تشنه كيتسام
 قاناموكين آنده بارسام سوسونلاريم

اصحاب لاردىك دين تلاشيب باشم بيرسام
 شهربانو امام لاردىك يىغلاب يورسام
 الله اوچن كافرلاركا اسير بولسام
 رحمن ايكام سينكا مقبول بولارموكىن
 شرمندە مین شرمندە مین قولوم آلکیل
 يولدين آزغان درمانده مین يولغه سالکیل
 الله ديبان فنا بولدوم رحم ايلاکیل
 عاصی لارغه فیض فتح بیرارموکین
 ای عاصی لار توبه قیلغیل حق ایشستون
 ناله نکیزدین ییر و کوک لار ناله قیلسون
 ملانک لار حق دین تیلاب اولوش بیرسون
 اولوش آغان قولنی غمی بولارموکین
 عقلم، حیران کوزوم کریان، خانه ویران
 حق یولینی بیلالماس مین اوزوم نادان
 ای طالب لار بی طاقت مین قایدان [قاندان] جانان
 جانانیم دین هیچ کیم خبر بیلارموکین
 جانانەنی تاپای دیسنک سحر تورغیل
 عاشق لارنینک مجلسی کا اوزونک اورغیل
 حقنی ایزلاب ییغلاب یوروب ماتم قورغیل
 ماتم قورمای طریقت کا کرارموکین
 حق وصلی غه یتای دیسنک زاری قیلکیل
 ذکرین ایتیپ ایرانلارغه یاری بیرکیل
 جفا تارتیب ایرانلاردین اولوش آلکیل
 اولوش آلمای دیدارینی کورارموکین
 قول خواجه احمد هر نه دیرسین بولهوس سین
 حق دین قورقوب آخرت قه غم یماس سین
 باشینک برله تونلار قاتیپ "هو" دیماس سن
 بولهوسنی خواجه م قبول قیلارموکین

(۱۱۳)

حکمت

سحر وقتده قوجوب ييغلاب ناله ايلا
نالشينك دين يير و كوكلار نوا قيلسون
حقه سيغنيب كوز ياشينكنى ژاله ايلا
آندين سونكره حق دردinek كا دوا قيلسون
چين دردليكنى الله سويوب بندم ديدى
اوج يوز آلتيمش باقيب آنى غمين يدى
ملايكلار ياشين آليب تحفه قيلدى
قان ييغلاغيل ياشينك آليب كواه قيلسون
يوز مينك كناه صادر بولدى بيلالمادينك
توبه قيليب دركاهى كا كيلاالمادينك
خدمت قيليب يخشى دعا آلالمادينك
يازوقلاردين سيني نه ديب جدا قيلسون
بو عالمده رسوا بولوب قان يوتمسنك
شريعتده طريقتده پير توتمسنك
حقيقتده جان تندين پاك اوتمسنك
غفلت لاردين سنى نه ديب جدا قيلسون
ايرانلارنى قيلغانلارنى قيلالمسنك
پيرسيز يوروب ورد اوراد بيلالماسنك
استعانت تيلاب دعا آلامسنك
خاص بزركلار سيني نه ديب دعا قيلسون
دام تزوير قويوب خلقنى يولدين اوردونك
شيخليغ قيليب ريا برله دوكان قوردونك
عشرت قيليب شيطان برله دوران سوردونك
ديداريغه سيني نه ديب روا قيلسون

لطف کرم حق یاراتی سیزلار اوچون
 جان و دلده خدمت قیلمای سیزلار زبون
 الله اوچون بحث ایتارمین "تبقون سخون"
 ناپاکلارکا نه دیب لطفین عطا قیلسون
 کیچه یاتمای خواب غفلت حرام قیلسه
 ذکر قلب و ذکر سرنی تمام قیلسه
 مینک بیر آتین تسبیح ایتیب کلام قیلسه
 بنده نه دیب درگاه کا خطا قیلسون
 امر معروف نهی منکر بیلیم قیلسه
 یاتسه قوبسه بیر خدای نی حاضر بیلسه
 تا اولکونچه خواجه سیغه خدمت قیلسه
 قوت بیرور آنی نه دیب دوتا قیلسون
 بی نماز و بی طاعت کا بیرماس قوت
 فعلی ضعیف اوزی معیوب بیرماس همت
 رزقی ناقص اوزی ناجنس کورماس دولت
 اول فاسقنی دلین نه دیب صفا قیلسون
 حیف آدم اوز قدرینی اوزی بیلماس
 من لیک قیلیب یخشی لارنی کوزکا ایلماس
 "هو" صحبتین قورکان بیرکا قاجیب کیلماس
 اول بی وفا عهده نه دیب وفا قیلسون
 آدم اول دور فقیر بولوب یولده یاتسه
 تفراق صفت عالم انی باسیب اوتسه
 یوسف صفت برادری قول دیب ساتسه
 قولنی قولی اول قول نه دیب هوا قیلسون
 شوقی ذوقی محبت دین عیان قیلغیل
 عاشق لارکا عشق اوتی دین بیان قیلغیل
 خوارلیق زارلیق مشقتنی نشان قیلغیل
 چین عاشق لار اوتدین نه دیب حذر قیلسون

الله ديبان اوتقه كيردى خليل الله
 اوشل اوتنى بستان قيلدى كورونك الله
 بوينين قسيب ييغلاب ايدى شيئا لله
 فقير مسكين اونده نه ديب هوا قيلسون
 حقه عاشق صادقلارى يورور خلوت
 تانكلا بارسه حق قاشيده كورار عزت
 جنت كيريب ديدار كورار عيش راحت
 پنهان يورار خلقه نه ديب ريا قيلسون
 قول خواجه احمد درد حالت پيدا قيلغيل
 جان و دلنى حق يوليده شيدا قيلغيل
 دردين تارتيب روز محشر غوغا قيلغيل
 درد بولمسه موليم كيمكا شفا قيلسون

(۱۱۴)

حکمت

بير كون كيلدى ابوبكر سلمان بيلان
 حق مصطفى رازين آجتى رحمن بيلان
 بارجه بارور بو دنيادين ارمان بيلان
 ايلكين بولوب حقه واصل بولماق اوجون
 عزرائل بير كون كيلدى فرمان بيلان
 فاطمه سلام بيردى اكرام بيلان
 حق مصطفى مشغول بولدى ايمان بيلان
 اسىغ تن دين عزيز جاننى بيرماق اوجون
 رسول ايدى صحابه لار بحيل بولونك
 آخرتقه اولاندوق سيزانوق بيلينك
 روزه توتونك، نماز اوقونك، زكوة بيرينك
 جهنمدين اوزنى آزاد قيلماق اوجون

دوشنبه کون حق مصطفی دنیا قویدی
 حق تعالی فرمانی غه بویون سوندی
 ابن عباس سونی قویدی علی یودی
 اوچماق ایجره حله تونین کیماق اوچون
 الله دیبان صحابه لار تبراندیلار
 پیغمبرنی جنازه سین کوتاردیلار
 اول سدره المنتهی غه اشوردیلار
 عرش اوستیغه تیکوروبان قویماق اوچون
 آسمانده کی فرشته لار ییرکا ایندی
 پیغمبرنی نوری برلان عالم تولدی
 بابام تیو فاطمه کریان قالدی
 باباسیدین یتیم بولوب قالماق اوچون
 قول خواجه احمد کوهرینکلیغ حکمت ایدی
 ایرانلارکا خدمت قیلیب نظر تابدی
 توقسان توقوز مینک حکمت ایتیپ داستان قیلدی
 داستان قیلیب بوستان ایچره یورماق اوچون

(۱۱۵)

حکمت

"قل هو الله"، "سبحان الله" ورد ایلاسام
 بیر و باریم دیدارینکنی کورار مین مو
 باشدین آیاغ حسرتینکده درد ایلاسام
 بیر و باریم دیدارینکنی کورار مین مو
 ایلک بیرده چوللار گیزیب کیاہ یدیم
 تاغلار چیقیب طاعت قیلیب کوزوم اویدیم
 دیدارینکنی کورالمادیم جان دین تویدیم
 بیر و باریم دیدارینکنی کورار مین مو

ايليك ايكي ياشده كيچتيم خانمان دين
 خانمانيم نه كورونكاي بلكه جان دين
 باش دين كيچتيم، جان دين كيچتيم، هم ايمان دين
 بير و باريم ديدارينكني كورار مين مو
 ايليك اوچده وحدت مي دين روزي قيلدي
 يولدين آركان گمراه ايديم يولغه سaldi
 الله ديديم لَبَّيْكَ ديبان قولوم آلدی
 بير و باريم ديدارينكني كورار مين مو
 ايليك تورته وجودلاريم نالان قيلدي
 معرفتني ميدانيده جولان قيلدي
 اساعيل ديك عزيز جانين قربان قيلدي
 بير و باريم ديدارينكني كورار مين مو
 ايليك بيشده ديدار اوجون كدا بولدوم
 كويدوم، ياندوم كل ديك تقی فنا بولدوم
 بحمدالله ديدار ايزلاب ادا بولدوم
 بير و باريم ديدارينكني كورار مين مو
 ايليك آلتی ياشقه ييتي مونكلوغ باشيم
 توبه قيلديم آقارموكين كوزده ياشيم
 ايرانلاردين بهره آلمای كونكلي تاشيم
 بير و باريم ديدارينكني كورار مين مو
 ايليك ييتي ياشده عمروم ييلديك اوتي
 ايا دوستلار عمل سيز مين باشيم قاتي
 بحمدالله پير مغان قولوم توتي
 بير و باريم ديدارينكني كورار مين مو
 ايليك سيكز ياشقه كيرديم مين بي خبر
 قهار ايكام نفسمني قيل زير و زير
 همت بيرسنگ شوم نفسمكا اورسام تير
 بير و باريم ديدارينكني كورار مين مو

ايليك توقوز ياشقه يتيم داد و فرياد
 جان بيرارده جانانيمى قيلماديم ياد
 نه يوز برله سينكا ايتاي قيلكيل آزاد
 بير و باريم ديدارينكنى كورار مين مو
 كوزوم يوموب تا آقونچه يتى آلميش
 بيليم باغلاب مين قيلماديم بير يخشى ايش
 كيچه كوندوز بى غم يوردوم مين ياز و قيش
 بير و باريم ديدارينكنى كورار مين مو
 آلميش برده شرمنده مين كناهيم دين
 ايا دوستلار كوب قورقه مين الهيم دين
 جاندن كيچيب پناه تيلاي خدايم دين
 بير و باريم ديدارينكنى كورار مين مو
 آلميش ايكي ياشده الله پرتو سالدی
 باشدين - آياغ غفلت لاريم رها قيلدی
 جانيم، دليم، عقليم، هوشيم، الله دیدى
 بير و باريم ديدارينكنى كورار مين مو
 آلميش اوچده ندا كیلدی قول بيركا كير
 هم جانينك مين، جانانينك مين جانينكنى بير
 "هو" شمشيرين قولغه آليب نفسينكنى قير
 بير و باريم ديدارينكنى كورار مين مو
 قول خواجه احمد نفسنى تيفتيم نفسنى تيفتيم
 آندين كين جانانيمنى ايزلاب تابتيم
 اولماس بورون جان بيرماكنى دردين تارتيم
 بير و باريم ديدارينكنى كورار مين مو

نور خدا، دوست خدا، اول مصطفی
 کیملار اوچون کیلدی رسول بیلکدینکز مو
 درود خدا، ورد خدا، حق مصطفی
 کیملار اوچون کیلدی رسول بیلدینکز مو
 کیملار اوچون کریان قیلدی کوزلارینی
 امت اوچون بریان قیلدی اوزلارینی
 امت بولسانک آنکلا اوشبو سوزلارینی
 کیملار اوچون کیلدی رسول بیلدینکز مو
 ییغلای - ییغلای یوز کوزلاری ششتی کورینک
 قیام توروب ایاغلاری ششتی کورینک
 امت اوچون قایغو محنت چیکتی کورینک
 کیملار اوچون کیلدی رسول بیلدینکز مو
 ایا دوستلار مونی بیلور امت قانی
 اکر بیلسنک آندین ارتوق نعمت قانی
 قیامت کون آندین اوزا شفقت قانی
 کیملار اوچون کیلدی رسول بیلدینکز مو
 امت بولوب رسول قدرین بیلدینکزمو
 تن جان برله سنتلارین قیلدینکزمو
 رسول اوچون زار اینکرابان اوتدینکزمو
 کیملار اوچون کیلدی رسول بیلدینکز مو
 هیهات هیهات سعادت دور اول مصطفی
 هیهات هیهات غنیمت دور اول مصطفی
 هیهات هیهات عنایت دور اول مصطفی
 کیملار اوچون کیلدی رسول بیلدینکز مو

قول خواجه احمد سوزلار سوزونك تليم قفا
 امتلاريم قيلغيل وفا. قيلمه جفا
 امتى كا مونداغ ديدى حق مصطفى
 كيملار اوچون كيلدى رسول بيلدينكز مو

(۱۱۷)

حکمت

بيدار بولغيل اى مؤمن سحر وقتى ايچنده
 قوتقار اوزونكنى اوتدين سحر وقتى ايچنده
 سحرلاردا اول كللار ثنا ايتور بلبللار
 كيم ايتور كيم بير و بار سحر وقتى ايچنده
 سحر وقتيدا كوكدين ملك كلور مؤمنغه
 يازوقلاردىن يانورغه سحر وقتى ايچنده
 سحر وقتيدا كوكدين جنت قپوغى اچارلار
 بيدار قلغه سنجارلار سحر وقتى ايچنده
 سحر وقتيدا قوپغا اولومنى ياد قيلغاي
 قورقونچه دين كوككه اوچقاي سحر وقتى ايچنده
 سحر لذتىنى عاشق قوللار بيلورلار
 حقنى حاضر كورارلار سحر وقتى ايچنده
 سحر وقتى خوش ساعت هم جنت ايرور راحت
 تنكرينكه قيل عبادت سحر وقتى ايچنده

(۱۱۸)

حکمت

كناهم باره باره حدين آستى
 قيامت كون ميني شرمند قيلمه

باشیم یاستوقده و جانیم کیترده
 تنیم باریب لحد ایچره یتارده
 صراط اتلیق کذارکاده دین اوتارده
 قیامت کون مینی شرمنده قیلمه
 یوزوم قراسنی آق ایلاکای سین
 محمدنی مینکا یار ایلاکای سین
 سورار وقتده اوزونک بندم دیکای سین
 قیامت کون مینی شرمنده قیلمه
 کنهیم نینک حسابین یوق بلیب مین
 سینی درکاهینکه یالغوز کیلیب مین
 اوزونک رحم ایلاکیل بیچار قول مین
 قیامت کون مینی شرمنده قیلمه
 سینینک امرینک بلان ایش قیلما دیم مین
 بو دنیا دین کیتاریم بیلما دیم مین
 لحد ایچره یتاریم بیلما دیم مین
 قیامت کون مینی شرمنده قیلمه
 بو یاتغانلاردین عبرت آلمادیم مین
 کوزوم یاشین توکوب یالبارما دیم مین
 کتاب سوزین قولاقه آلمادیم مین
 قیامت کون مینی شرمنده قیلمه
 یولومنی باشقاره آلمای یولدا قالدیم
 ایکام قوللوغینی مین آرقه سالدیم
 کنهیمنی ییغیب مین قولغه آلدیم
 قیامت کون مینی شرمنده قیلمه
 خداوندا عجب حیرانده بولدوم
 کنهیمنی کوروب شرمنده بولدوم
 حسابین تا پمایین درمانده بولدوم
 قیامت کون مینی شرمنده قیلمه

غریب‌لیقدا یوروب مین زار حیران
 خواجه‌م سین مینکا بیر کیل نور ایمان
 مینک مشکل‌لاریم‌نی ایله آسان
 قیامت کون مینی شرمند قیلمه
 غریبنک‌نی وصالینک‌کا یتورکیل
 صراط آتلیق کذرکاده‌دین اوتورکیل
 خواجه! سین جرم - عصیانم کچورکیل
 قیامت کون مینی شرمند قیلمه

(۱۱۹)

حکمت

دم بو دم‌دور اوزکا دمنی دم دیمه
 دنیادین بی غم اوتارسین غم دیمه
 کویمسه جان دلینک هم استخوان
 کوز یاشینک آقان بیله‌سین نم دیمه
 خواد کولسه ییغلاسه عاشق ایلی
 چهره سرخین کوروب بی غم دیمه
 اصل نسلینک قطره آب مینی
 خسنی کورسنگ سین اوزونکدین کم دیمه
 آدمیده ذره معنی بولماسه
 سین آنی آدم کوروب آدم دیمه
 تویماسه سر معنی‌دین آدم ایماس
 سین آنی صورت کوروب محرم دیمه
 کر یورکده بولماسه یوز داغ درد
 زینهار قاجقیل آنی همدم دیمه
 تیکسه بیلکان آبدار خنجری
 جان بیرور جانانه‌غه مرهم دیمه

دوستلار دیوانه ایرماس هر کیشی
 عز و جاده دین کیچماسه آدم دیمه
 مثل دریا یوزیده یورکان خسی
 های - هوی دیکان بیلان محکم دیمه
 احمدا توتقیل غنیمت هر نفس
 یارسیز اوتکان بو دم نی دم دیمه

(۱۲۰)

حکمت

ایا شاهی دو عالم پادشاهی
 ایرورسن بنده نی پشت پناهی
 تیلاب دایم سینی اول ذات پاکینک
 شیطاین شریدین بیرکیل پناهی
 بو شیطان شریدین کیمکا قاجار مین
 سینی آلدینکده دور سری کماهی
 خداوندا سینکا مین یاندیم ایمدی
 اوزونک سین بارجه کا رازق آلهی
 "کراما کاتبین" آتلیغ فرشته
 بیابان قم لاریدین کوب کناهی
 محمد کیم ایروور هادی عالم
 اوشال کونده بولادور دادخواهی
 اوقوب ناممنی کورسام هیچ عمل یوق
 باشیم قویی سالیب یولغوم تباهی
 که مین دیرمین: بو ایشنی قیلغانیم یوق
 تمام اعضالاریم بولغای کواهی
 اولومنی دستیدین هیچکیم قوتولماس
 قلنکدر بول باشینکا کی کلاهی

جهنم اوستیده تارتیغ صراطی
 کوروب بنده اورار افسوس آهی
 خواجه احمد یسوی! سین ییغلا دایم
 اسیغ قیلماس سینکا تنکلاکی آهی

(۱۲۱)

حکمت

ناکھان توروریمده کونکلوم ایچره
 حق مولیمنی نظرکاهی توشتی بولغای
 قرق ییلیق زنکار باسقان کونکلوم ملکین
 حق یادینی نوری برله آجتی بولغای
 ذاکرلاری جمع بولوب توزولمیشده
 ذکر سماعدین توسونی قورولمیشده
 برین عقبی دنیا سیدین اورولمیشده
 کونکل قوشی حضرت تبا اوچتی بولغای
 هیچ بیلماس مین نیچوک بولغای مین ایشیم
 آنینک اوچون آقار دایم کوزده یاشیم
 سحرلارده قوپوب حق دین تیلامشیم
 فرشتهلار آمینی غه توشتی بولغای
 مونکلوغ جانغه یقین تورور حق درکاهی
 ندامتده یتارموکین برار آهی
 قایسی کونکل بولسه حقنی نظرکاهی
 حق نظری ایچکا تولوب تاشتی بولغای
 حق ایشین حقلیق اوچون بیوردیلار
 اوزلارینی خلقلار ارا یتوردیلار
 محنتلارین نعمت ینکللیغ کوتاردیلار
 بغری قانلیغ کوزی یاشلیغ تولدی بولغای

محب قوللار محبوبی غن قایردیلار
 دنیا قویوب دین ایشی غه اوکوردیلار
 عاشق قوللار الله تیو تبراندیلار
 شیطان نی زهری یاریلیب قاچتی بولغای
 الله دیکیل ای قول احمد! اوزونک بیلکیل
 اوزونک بیلیمیش علمینک برله عمل قیلکیل
 اولوغ کیچیک یارانلاردین عذر قیلکیل
 سین بیلماسده سیندین خطا کیچتی بولغای

(۱۲۲)

حکمت

ایا دوستلار یورک، بغریم بولدی کباب
 حقیقت لیغ عاشق جان دین اوتی بولغای
 عشق پرتوی کونکل ملکین قیلدی خراب
 اول سبب دین عقل هوشوم کیتی بولغای
 عشق سیز کیشی آدم ایرماس انکلاسنکیز
 بی محبت شیطان قومی تینکلاسنکیز
 عشق دین اوزکا سوزنی اکر سوزلاسنکیز
 ایلکینزدین ایمان اسلام کیتی بولغای
 میخانه غه کیرکان عاشق سَری عیان
 بغری بیشیب یاشی آقیب قیلور افغان
 بیخود یورار قایده بارسه خانه ویران
 بیشک بیلنک وحدت می دین تانی بولغای
 عشق توشتی بو باشیمغه حیران بولدوم
 خانماندین کیچیب تقی سرسان بولدوم
 ایکی عالم برباد اوروب غریان بولدوم
 جیقان آهیم نه فلک کا یتی بولغای

عاقل ايرسنگ حقدین اوزکا سوزلار حرام
 تا تريك سين پير خدمتين قيلغيل مدام
 الله ديسنگ شيطان لعين سينكا غلام
 الله ديماس دين لارينى سانى بولغاي
 عمرى ضايع اوتكانلار عشقنى بيلماس
 جاندين كيچكان ديوانهنى كوزكا ايلماس
 "هو" صحبتين قورغان ييركا قاجيب كيلماس
 جاني كونكلنى تاشدين بتر قاتى بولغاي
 الله سويكان بنده دايم ييغلاب يورار
 حقدین قورقوب رازين ايتيب سحر تورار
 يحيى صفت تينماي ييغلاب ماتم قورار
 بو دنيانى آرقه تاشلاب آنى بولغاي
 عاشقلارنى ايشى ايرور سوز و كداز
 عاشقلارنى حاجت لارى روزه نماز
 روز محشر كوز ياشى دور حقه نياز
 عارف عاشق درد و الم تارتى بولغاي
 عاشقلارنى آغزى خندان دلى لرزان
 الله اوجون كوزده ياشى، بغرى بريان
 جاني ذاكر، كونكلى شاكِر، فكري جانان
 انشاء الله قيل كوفروكى اوتى بولغاي
 عاشقلارى خلق ايچنده كويوب ييغلار
 ظاهر خنده باطن لارى يورك داغلار
 اجل استاب اولماك اوچون بيلين باغلار
 معشوقى غه عرض حالين ايتى بولغاي
 عاشقلارى ملامت دين قاچماس بولور
 نادانلاركا باطن سرين آچماس بولور
 هر نامردكا درّ و گوهر ساچماس بولور
 اوزى اوقوب خون زرداب يوتى بولغاي

پیر مغان سویکان عاشق هواسی یوق
 یوز مینک تورلوك طاعت قیلسه بناسی یوق
 ای دوستلاریم عشق دردینی دواسی یوق
 تونلار قوبوب پیر ایتاکی توتی بولغای
 پیر مغان نظر قیلسه بیرکای دوا
 های - هوس. ما و منلیک بولغای ادا
 آندین سونکره شیطان لعین سیندین جدا
 تار لحدده ایمان برلان یاتی بولغای
 قول خواجه احمد حق سوزینی سوزلار مدام
 حق دین اوزکا سوزلار باری ایرمیش حرام
 روزی قیلسه اورنونک بولغای دارالسلام
 مغفرتنی دریاسیغه باتی بولغای

(۱۲۳)

حکمت

شریعتده مرشد بولغان غالب قوللار
 شریعتدین آلاز منزل آلور بولغای
 نمازیغه شروع قیلکان مؤمن قوللار
 اوجماخ اویین امید توتوب تورور بولغای
 ملك الموت فرمان برله جانیم آلسه
 اغا اینی بارچه ییغلیب قویوب یانسه
 یتتی قدم باسقاندین سونک قالور بولسه
 منکر نکیر کیریپ سؤال سورار بولغای
 منکر نکیر کیریپ سؤال سورار بولسه
 اول عمود اوتلوغ برله اورار بولسه
 باشیم کویوب جانیم. تنیم اوتقه یانسه
 قیناب جانیم تار لحدده کویار بولغای

تورت یوز قرق تورت پیغمبر مرسل نبی
 قالمادی بو جهان دین اوتی باری
 "کل نفس ذائقة الموت" آیتی
 قرآن ایچره آن دین خبر بیرور بولغای
 شریعت دین طریقت دین بیان بولدی
 حقیقت دین قرآن سوزی کلام بولدی
 بو جهانغه محمدنی نوری تولدی
 اول نور برلان ایکی جهان یارور بولغای
 خوش دولت دور ولایت ده پادشاه بولسه
 عادل بولوب بیر مؤمننی قاضی قیلسه
 اوشال قاضی بارچه خلقنی راضی قیلسه
 راضی لیق دین اوجماخ اویین آلور بولغای
 مؤمن قوللار نماز اوقوب بولسه فارغ
 اوشال قولنی رنکی بولغای مونداغ سارغ
 اول خدمت حق قاشیده بولسه لایغ
 حور قیزلاری قرشو کیلیب قوچار بولغای
 بعضی کیشی نماز قدرین قاچان بیلور
 هر نمازده ایمان باشدین تازه بولور
 صلوٰۃ دیسه غافل باشین بورکاب اوپور
 غافل لیق دین عمرین ییل کا ساتار بولغای
 قول خواجه احمد قولمین دیسنگ طاعت قیلغیل
 قیامتنی کیلماکینی یاقین بیلکیل
 حقه یاووق بولای دیسنگ طاعت قیلغیل
 طاعت قیلغان حقه یاووق بولور بولغای

(۱۲۴)

حکمت

محبتنی شوقی برله یا راستاکیل
روزه نماز اوغانیمنی فرضی بولغای
محشرکاه ده عدلی برله سورار بولسه
عاشقلارنی بیر خدای غه عرضی بولغای
عرضی شولدور خدایی غه مینک داد ایتار
حالیم کوردیب یاشین ساچیب فریاد ایتار
نعره تارتیب محشرکاهنی آباد ایتار
عاشقلارنی بیر خدای غه عرضی بولغای
چین عاشقلار دایم تبریک اولکان ایماس
ارواح لاری بیر استیغه کیرکان ایماس
زاهد عابد بو معنینی بیلکان ایماس
چین عاشقلار خلایقنی خضری بولغای
یازوق لاردین قورقوب اوزی ییغلاب تورار
روز محشر نتار مین دیب قانلار یوتار
صراط آتلیغ کذرکاهده یاشی قاتار
خواجه سیغه شکستلیغ عرضی بولغای
ذره عشقی کیمکا توشه نالان قیلور
کوز یاشین آقوزوبان عمان قیلور
هر نه تابسه حق یولیده احسان قیلور
بخیل لارنی عداوتی بغضی بولغای
عاشقلارنی یاش اورنی غه قانی آققای
ملایک لار هر طرفدین نورلار یاققای
غافل بولسه حاضر بولدی بولغای
چین عاشقلار بو دنیانی جغدی بولغای

اهل دنیا آخرت دین پرواسی یوق
 روحی تنها ایمان اسلام همراسی یوق
 طریقت یول اداشقان هیچ پرواسی یوق
 بندهمین دیر تیلی برله آغزی بولغای
 کیچه الله، کوندوز الله، تینمای یورار
 الله شمعی پروانه دیک اوزین اورار
 لیلی مجنون فرهاد شیرین دورین سورار
 حق تعالی عاشقلارنی سوزی بولغای
 عاشق کویسه خاص معشوقی برکا کویکای
 مجازیلار کویمای تورور جان دین تویکای
 چین عاشقلار کویکان سری پرنور بولکای
 اول سبیدین معشوقیغه نازی بولغای
 اوتقه یانماس سالسه اوتدین عاشق کیشی
 بیر و کوکنی بوستان قیلغای آققان یاشی
 الله دیسه بیشک یارور ایچی تاشی
 کویماق یانماق عاشقلارکا بازی بولغای
 جمله عاشق ییغلیب بارکای درکاهیغه
 یاشین ساجیب افغان قیلیب بارکاهیغه
 یتتی دوزخ طاقت قیلماس بیر آهیغه
 رحمن ایکان عاشقلارکا قاضی بولغای
 عاشق لارنی یتتی کؤک کا یتتار آهی
 الله دیسه یکسان بولور هر کناهی
 عاشقلارنی رحمن ایکام تکیه کاهی
 عزیز باشی خلایقنی ایدی بولغای
 عاشقلارنی کوب کویدور کان حق دیداری
 آنینک اوچون تینمای ییغلاب قیلور زاری
 وعده قیلغان عاشقلاری کورار آنی
 حق جمالی کوز یاشینی مزدی بولغای

عاشق‌لاری حقّه باقیب نعره تارتار
 ملایک‌لار تحفه قیلیب حقّه ایتار
 شوق شرابین ایچکان عاشق شوقی آرتار
 شور افغان خلایق‌نی توزی بولغای
 می‌جان بخش ایچکان عاشق آنده سلطان
 آنینک اوجون حق یولیده جانی قربان
 تانکلا بارسه دیداریغه قیلور مهمان
 زمستانده می ایچورسه یازی بولغای
 پنهان یورور کیمنی کورسه عاشق قیلور
 لطف ایلاسه کذاب‌لارنی صادق قیلور
 حقدین قورقان درکاهی‌غه لایق قیلور
 ظاهر اعمی باطن ایچره کوزی بولغای
 عاشق یانار خلقدین تانار الله راضی
 عاشق‌لیق‌نی آرزو قیلغان شهید غازی
 حاجت ایرماس عاشق‌لارکا کوب و آزی
 قطره یاشی حق مولیم‌نی نذری بولغای
 جنون ایچره باشین یارغان قانی جاری
 ذکرین ایتسه الله اوزی بیر و باری
 سحرلارده قان ییغلاماق کار و باری
 عاشق‌لاری هر کون یوز مینک غازی بولغای
 قول خواجه احمد مالی یوقتور نذری باشی
 تانکلا بارسه خواجه‌سیغه تحفه یاشی
 عجز و نیاز شکسته‌لیغ قیلغان ایشی
 اشک سرخی روی زردی عذری بولغای

(۱۲۵)

حکمت

سبحان ایزدیم فرمان قیلسه قدرت بيله
عاشقلاری غوغا قیلیب یورور بولغای
محشرکا هده افغان قیلیب یاشین توکوب
ایلکا اوزین کمره قیلیب یورور بولغای
عاشقلارنی حق قاشیده یوز نازی بار
نعره تارته زرد هرکز قالماس ینار
روزه نماز تسبیح لاری پروردکار
باطن لاری کویا قیلیب یورور بولغای
حقنی ایزلاب همراه لاری زاغ و زغن
حاجت ایرماس عاشقلارکا باغ چمن
رحلت قیلسه جوروک ایکنی آنکا کفن
خضر والیاس همراه قیلیب یورور بولغای
عاشقلارنی کوز یاشیدور باغ و بوستان
آنده سیرار علی الدوام هزار داستان
ظاهرلارین بوزوب یورار خانه ویران
حق قدرتین انشا قیلیب یورور بولغای
بیخود بولوب کویوب یورار مست و حیران
الله تیو کوزده یاشی بغری بریان
نعره اوروب فریاد ایتیپ قیلور افغان
الله یادین ثنا قیلیب یورور بولغای
قادر ایکام قدرت بيله صلح ایلاسه
جنت ایچره کیرار عاشق امر ایلاسه
نعره تارتيب فریاد ایتیپ ورد ایلاسه
می نوش ایتیپ سماع قیلیب یورور بولغای

کیچه - کوندوز ییغلا دایم بردم تینمای
 تیلدین الله یادین ایتیپ هارب تالمای
 کوزده یاشی آقماس هرکز بغری کویمای
 یاشین آلیب کواذ قیلیب یورور بولغای
 محبتنی براقینی مینیپ یورکان
 آنداغ عاشق طریقتده جولان قیلکان
 سر شرابین ایچیپ ازل روحی قانغان
 عشق بابنده ندا قیلیب یورور بولغای
 دوزخ ایچره کیرسه عاشق پروا قیلماس
 کوروب بیلیب مال ملکنی قولغا آلماس
 حور و قصور غلمانلارنی کوزکا ایلماس
 فریاد ایتیپ غوغا قیلیب یورور بولغای
 قهار ایکام قدرت بیله ندا قیلسه
 دیدار اوچون کویکانلاریم کیل کیل دیسه
 کوز یاشینی آقوزوبان فریاد قیلسه
 عقل هوشین دانا قیلیب یورور بولغای
 رحمن ایکام رحمی برله ندا قیلکای
 حزین ندا ایشتیپ عاشق جانی کیرکای
 صفّا صفّا بولوب عاشق باش کوتارکای
 عشق اوزین یکتا قیلسه یورور بولغای
 عاشق بولوب حکمت ایدی قول خواجه احمد
 صدقی برلان ایشیتکانکا یوز مینک رحمت
 ایمان عطا قیلغای تنکریم تاج دولت
 عاشق دلین صفا قیلیب یورور بولغای

(۱۲۶)

حکمت

اول هو، آخر هو دیب بیخود بولکیل
حق جمالین کورساتمسه ضامن بولای
ظاهر هو، باطن هو دیب یولغه کیرکیل
حق جمالین کورساتمسه ضامن بولای
لا اله الا الله دیب زاری قیلکیل
حق ذکرینی هر کیم ایتسه یاری بیرکیل
پیر مغان خدمتینه یوکوروب یورکیل
حق جمالین کورساتمسه ضامن بولای
تیلده آلکیل لا اله الا الله
ایچکا سالغیل هر نفسده بولکیل آگاه
پیر مغان نظر قیلکای سنکا ناکاه
حق جمالین کورساتمسه ضامن بولای
ادهم صفت سوا بولوب دنیا تیبکیل
کیمنی کورسنگ خضر بیلیم قولین اوپکیل
جمالنی کورای دیسنگ سحر قوپغیل
حق جمالین کورساتمسه ضامن بولای
الله دیکان بندهلارنی قولی بولکیل
تفریق صفت یول اوستیده یولی بولکیل
عاشق لارنی کویوب اوچکان کلی بولکیل
حق جمالین کورساتمسه ضامن بولای
ذاکر بولوب شاکر بولوب حقنی سویکیل
سحر وقتده قوپوب نفسنگ کوزین اویکیل
بایزیددیک عاشق بولوب دنیا قویکیل
حق جمالین کورساتمسه ضامن بولای

سورسنىڭ، تورسنىڭ، ياتسنىڭ، قوبسنىڭ، حقنى ايتسنىڭ
 ذاكر بولوب شاكر بولوب جاندين اوتسنىڭ
 والله بالله دنيا حرام تاشلاب آتسنىڭ
 حق جمالين كورساتمسه ضامن بولاي
 حق وصلى غه يتاي ديسنىڭ سحر يىغلا
 الله تيو يورك بغرينك اوتقه داغلا
 همت قورين جان بىلى كا محكم باغلا
 حق جمالين كورساتمسه ضامن بولاي
 ادهم صفت بو دنيادين كونكل اوزكىل
 حرص هوا تكبرنى اوين بوزكىل
 محبتنى درياسىغە جوموب يوزكىل
 حق جمالين كورساتمسه ضامن بولاي
 كيچه - كوندوز آخرتى غمين يىكىل
 توت اويقونى حرام قىليب طاعت قىلكىل
 محبتنى شوقى برلان كوكسونك ياركىل
 حق جمالين كورساتمسه ضامن بولاي
 اهل هوا من - من ليكدين قاجيب يوركىل
 اهلين تابسنىڭ كوزده ياشنىڭ ساچب يوركىل
 محبتنى شرابى دين ايچيب يوركىل
 حق جمالين كورساتمسه ضامن بولاي
 ايا دوستلار بو دنيادين يىغلاب اوتىنىڭ
 فانى تورور بو دنيادين كيچيب كيتىنىڭ
 محبتنىڭ جامين آلىب مى نوش ايتىنىڭ
 حق جمالين كورساتمسه ضامن بولاي
 كيچه الله. كوندوز الله تينماي ايتكىل
 كيچەلارى بيدار بولوب قانلار يوتكىل
 بو دنيانى عزت لارين تاشلاب اوتكىل
 حق جمالين كورساتمسه ضامن بولاي

پیر مغان ایتاکی نی محکم توتقیل
 معرفت نی بازاریده اوزونک ساتقیل
 می نوش ایتیپ سماع قیلیب ذکرین ایتقیل
 حق جمالین کورساتمسه ضامن بولای
 "یا ربنا ظلمنا" دیب ناله قیلغیل
 کوز یاشینکنی هر طرفقه ژاله قیلغیل
 حق یادینی ایتیپ اوزونک واله قیلغیل
 حق جمالین کورساتمسه ضامن بولای
 درد حالت پیدا قیلیب یولغه کیرکیل
 پروانه دیک شمع نی کوروب اوزونک اورکیل
 قایدا بارسنک ذکرین ایتیپ دوکان قورکیل
 حق جمالین کورساتمسه ضامن بولای
 محبت نی میدانیده باش اویناسنک
 "هو هو" تیو ذکرین ایتیپ جان قیناسنک
 دیدار تیلاب قان یاش توکوب زار اینکراسنک
 حق جمالین کورساتمسه ضامن بولای
 ایرانلارنی آستانه سین سقلاب یاتقیل
 سحرلارده چار ضرب اوروب ایرته قوپقیل
 زاری قیلیب فنا بولوب جان دین اوتقیل
 حق جمالین کورساتمسه ضامن بولای
 تفراق صفت خوارلیق تارتقیل نفسنک اولسون
 خلق ایچنده رسوا بولکیل عالم کولسون
 چین کونکلده ییغلار کورکیل خدا بیلسون
 حق جمالین کورساتمسه ضامن بولای
 کوز یاشینکنی دریا قیلغیل رحمی کیلسون
 غریب بولوب یولدا یاتقیل قولونک آلسون
 پنهان یوروب طاعت قیلغیل تنکری بیلسون
 حق جمالین کورساتمسه ضامن بولای

هجران تونی آهینک برلان اوتلار یاققیل
 کوز یاشینکنی برقی بیرلان چیقماق چاققیل
 ایرانلارنی صحبتیده ایریب آققیل
 حق جمالین کورساتمسه ضامن بولای
 ای نا انصاف دنیا فانی، حقه یانغیل
 بنده بولسنگ حق ذکرینی تینمای آیتغیل
 پیر مغان خدمتیدا جفا تارتقیل
 حق جمالین کورساتمسه ضامن بولای
 الله تیو فنا بولکیل بغرینک کویسون
 تونلار قویپ طاعت قیلکیل تنکری سویسون
 آندین سونکره خاص بزرکلار نظر قیلسون
 حق جمالین کورساتمسه ضامن بولای
 تون سحرلار بیدار بولوب سحر تورکیل
 عاشق بولسنگ اسماعیل دیک جاندین اوتکیل
 قول آیاغینک محکم بوغوب امرین توتکیل
 حق جمالین کورساتمسه ضامن بولای
 ریاضتنی قنیغ تارتیب جانلار قینا
 میدان ایچره باشنک بریب باشینک اوینا
 عیشدین کیچیپ مال اورنیغه زقوم چینا
 حق جمالین کورساتمسه ضامن بولای
 فرهاد صفت محنت تارتیب تاغلار کسکیل
 بایزید دیک تونلار قوپوب اوزونک آسکیل
 جنید دیک جول کزیب خارلار باسکیل
 حق جمالین کورساتمسه ضامن بولای
 حق رحمتی اولوغ دریا بیر قطره بس
 قطره سیدین بهره آغان قیلماس هوس
 ما و منلیک سیندین کیتار مثل مکس
 حق جمالین کورساتمسه ضامن بولای

حق رحمتی اولوغ دریا قابل بولغیل
 طالب ایسنک حق ساریغه مایل بولغیل
 زهد تقوی دایم قلیب نایل بولغیل
 حق جمالین کورساتمسه ضامن بولای
 لالا اییب الا اللهغه شیدا بولغیل
 منصور صفت انا الحق دیب غوغا قیلغیل
 کریان بولوب کوز یاشینکنی دریا قیلغیل
 حق جمالین کورساتمسه ضامن بولای
 ای بی خبر غفلت بیلان اویقوده سین
 دنیا تیلاب کیچه - کوندوز قایغوده سین
 طاعت قیلمای سوزلار سوز لب بیهوده سین
 حق جمالین کورساتمسه ضامن بولای
 تاشدین توشک - یستوق قلیب طاعت قیلسنک
 حق امریغه راضی بولوب بویون سونسنک
 اولار وقتده ایمان آریغ قولغه آلسون
 حق جمالین کورساتمسه ضامن بولای
 قول خواجه احمد نصیحتنی اوزونکا قیل
 ای بی خبر خلقنی قویوب اوزونکنی بیل
 تاغ دین آغیر کنهینک بار اوزونکا کیل
 حق جمالین کورساتمسه ضامن بولای

(۱۲۷)

حکمت

تطوع روزه توتار خلقلارغه شیخ لیق ساتار
 علمی یوق عامیدین بتر آخر زمان شیخ لاری
 بیلی کا فوطه چالوب اوزنی کیشی سانور
 عرصاتده اوفتانور آخر زمان شیخ لاری

باشیغه دستار اورار علمی یوق نیکا یرار
 اوقی یوق یاسین قورار آخر زمان شیخلاری
 الاین دین آل قیلور معمله نی مال قیلور
 ایسسز عمرین ییل قیلور آخر زمان شیخلاری
 شیخلیق اولوغ تورور حضرتکا ایلتنکان اش تورور
 آش بیرماس بغری تاش تورور آخر زمان شیخلاری
 مسکین "احمد" قندهسین حق یولنده نیدهسین
 علمینک یوق نه ساندہسین آخر زمان شیخلاری

(۱۲۸)

حکمت

عاصی، جافی، قلونک کیلدی درکاهنک کا
 قولوم توتوب یولغه سالکیل "انت الهادی"
 ایرکلیک قادر ییغلاب کیلدیم بارکاهنک کا
 قولوم توتوب یولغه سالکیل انت الهادی
 تون کیچهلار تانک آتقونچه یاتماق ایشیم
 سحر توروب راز ایتما دی مونکلو باشیم
 ندامت ده آقارموکین کوزده یاشیم
 قولوم توتوب یولغه سالکیل انت الهادی
 یولسز یولغه کیردیم دوستلار حالیم خراب
 خلقدین سورسام هیچ کیم بیرماس منکا جواب
 خالقیم سین یول کورساتکیل عالیجناب
 قولوم توتوب یولغه سالکیل انت الهادی
 خجالت ده قورقوب کیلدیم کنایمدین
 ذاتی اولوغ پروردکار الهیم دین
 ندا کیلدی نومید قویمای درکاهیم دین
 قولوم توتوب یولغه سالکیل انت الهادی

يىغلاب كىلدىم حضرتينك كا ايا شاهيم
 قىساب كىلدىم قرانغولوق چىقىل ماهيم
 پادشاهيم، سين بير و بارىه. تكيه كاهيم
 قولوم توتوب يولغە سالكىل انت الهادى
 باشدين اياغ بولدى كنه قايدە باراى
 يول داشكان ايتديك بولوب كىمدين سوراي
 بو حال برلان ديدارينكنى قايدىن كوراي
 قولوم توتوب يولغە سالكىل انت الهادى
 مين بر كيتسام ايلييك اياق جملە كواه
 رحمت ايتيب سين كيچماسنك حاليم تباە
 شرمندەمين، دزماندەمين كوبتور كناه
 قولوم توتوب يولغە سالكىل انت الهادى
 كنه دردى بيمار قىلدى طبىيم سين
 محبوبم سين، درمانيم سين، حبىيم سين
 يولده قالديم حاليم سورار رفيقم سين
 قولوم توتوب يولغە سالكىل انت الهادى
 فاسق، فاجر رحمتينكدين نوميد ايماس
 سيندين اوزكا هيچكىم مينى يولغە سالماس
 لطف ايتمسنك مشكل لاريم آسان بولماس
 قولوم توتوب يولغە سالكىل انت الهادى
 هيچ كيشى يوق ييرده، كوكدە سين سين قادر
 شكم يوقتور بو سوزومده اوزوينك ناظر
 هم يكه سين، يكانه سين بيشك حاضر
 قولوم توتوب يولغە سالكىل انت الهادى
 مين يولونكده باش بيرمادىم قادر خدا
 باش نه بولغاي غريب جانيم يوز مينك فدا
 درد هم اوزونك، درمان اوزونك لطفونك دوا
 قولوم توتوب يولغە سالكىل انت الهادى

جان وایمان غذاسیدور سنینک ذوقینک
 جانیم بیریب ساتقون آلائی سینی عشقینک
 روز محشر شفیع بولغای سینی شوقینک
 قولوم توتوب یولغه سالکیل انت الهادی
 "قل هو الله". "سبحان الله" دین قمچی سی
 روزه، نماز، تسبیح، تهلیل حق ایلچی سی
 پیر مغان طالبلاری یول باشچی سی
 قولوم توتوب یولغه سالکیل انت الهادی
 انت الهادی، انت الحقنی ذکرین ایتسام
 هادی بولسنک ایدی یولدین راستقه قیتسام
 هر ذکرینی تیل کا آلیب نعره تارتسام
 قولوم توتوب یولغه سالکیل انت الهادی
 انت الهادی انت الحقنی ذکر قوی
 پیر مغان سوزلاریدین آلسه فتوی
 باطنلاری روشن بولوب بولور یخشی
 قولوم توتوب یولغه سالکیل انت الهادی
 قول خواجه احمد رحمتینکدین امید توتای
 خواجه منی بندم دیسه شکرین ایتای
 بندم دیمای یوز اوکورسه نیچوک ایتای
 قولوم توتوب یولغه سالکیل انت الهادی

(۱۲۹)

حکمت

خوش قدرتلغ پروردکار بیر و باریم
 قولوم توتوب یولغه سالکیل انت الهادی
 ذاتی اولوغ رحمن ایکام هم جباریم
 قولوم توتوب یولغه سالکیل انت الهادی

سحر وقتده ییغلاب توکسام قانلار کوزدین
 کونکلم آچیب آکاه بولای یخشی سوزدین
 قدرتیغه محو بولیب کیتای اوزدین
 قولوم توتوب یولغه سالکیل انت الهادی
 اجابتنی اندین تیلاب قیل مناجات
 حاجتینکنی روا قیلغای قاضی حاجات
 رحمت دریا تولوب تاشار ییتسه فرات
 قولوم توتوب یولغه سالکیل انت الهادی
 ای داد ایکام هیچ یتمادی سینکا دادیم
 بیر و کوکنی نالان قیلدی بول فریادیم
 روز محشر قیچقیرغایمو کیل آزادیم
 قولوم توتوب یولغه سالکیل انت الهادی
 بنده بولسنگ ذکرین ایغیل قولونک آلسون
 یولدین آرسنگ رهبر بولوب یولغه سالسون
 سحرلارده زاری قیلغیل رحمی کلسون
 قولوم توتوب یولغه سالکیل انت الهادی
 انت الهادی. انت الحقنی ذکرى الله
 حق ذکرینی ایغیل تینمای بولغونک آکاه
 رحیم مولیم نظر قیلسه اولور ناکاه
 قولوم توتوب یولغه سالکیل انت الهادی
 انت الهادی. انت الحقنی ذکرى دلده
 بیلماس نادان ذکرین ایتیپ ظاهر تیلده
 مین - مین دیکان شیخ زمان آب و گیلده
 قولوم توتوب یولغه سالکیل انت الهادی
 انت الهادی. انت الحقنی ذکرى اولوغ
 حق ذکرینی ورد ایلاکان کونکلی سنوغ
 ورد ایلامای شیخمین دیسه جایى تموغ
 قولوم توتوب یولغه سالکیل انت الهادی

ای یرانلار نفس ایلکیدین آرمانده مین
 عصیان یوکی دوتا قیلدی درمانده مین
 عاجز قولونک هر نه قیلسه فرمانده مین
 قولوم توتوب یولغه سالکیل انت الهادی
 قول خواجه احمد نفس دین اولوغ بلا بولماس
 یول اوستیندا تفریق بولسام کافر اولماس
 بیر و کوک دین طعمه بیرسام هرکز تویماس
 قولوم توتوب یولغه سالکیل انت الهادی

(۱۳۰)

حکمت

مرکب لاغر، یوکوم آغیر، اوزوم غمکین
 حسرت بیلان عقل هوشیم کیتی تمکین
 اوتوب کاروان کوزدین غایب بولدی ساکن
 بارور جایم بیلاماس مین قیان ایمدی
 عبث اوتی ایسز عمروم رسوالیقده
 هیچ بولمادیم زمان ترس خدالیقده
 دایم یورروم نفسیم اوجون کدالیقده
 هر نه قیلغان سودالاریم زیان ایمدی
 بو حالتده اول عزرائیل کیلسه ناکاه
 اسیغ تندین جاننی آله بیرکیل پناه
 شیطان آلیب ایمانیمنی قیلسه رسوا
 برادرلار آرا یولده من قالغان ایمدی
 بو حالتده سوز ایتورغه یوقتور فرمان
 اوجوب قالغای وجود ایچره شمع ایمان
 قزیل کل دیک اوشبو یوزونک بولور سامان
 یقین بولغونک بیر آستیغه نهان ایمدی

زن - فرزند اغا اینینک ییغلاب تورکای
 میراث دییان مال - ملکونک بولوب آلکای
 ایلتیب سنی قرا بیرکا تیغیب کومکای
 طعمه قیلکای قریش آتلیغ ییلان ایمدی
 کیل ای خائف بو ایشلاردین خبر آلکیل
 توبه قیلیب دنیا قویوب حقنی سویکیل
 قول خواجه احمد بو دنیادین اوتوب یانکیل
 شاید قیلغای نظر پیر مغان ایمدی

(۱۳۱)

حکمت

خوشلامایدور عالم‌لار سزنی ایغان تورکینی
 عارف‌لاردین ایشتنسک آجار کونکل ملکی‌نی
 آیت حدیث معنی‌سی تورکی بولسه موافق
 معنی‌سی‌کا یتکانلار بیرکا قویار بورکی‌نی
 قاضی، مفتی، ملالار شریعت درکاهنی
 عارف، عاشق آلیب‌دور طریقت‌نی ارکی‌نی
 عمل قیلغان عالم‌لار دینمیزنی چراغی
 براق مینار محشرده ایگری قویار بورکی‌نی
 عمل قیلسه عالم‌لار دین و آیین یاروقی
 کورسه بولور الارنی رنک رویی کورکی‌نی
 عمل قیلمای قال علمین اوقوی بیلمای قالغانلار
 آرقه‌سیغه کوتارور قرق ایشک یوکی‌نی
 خواجه من دیب لاف اورمه اوشبو دنیا بی پایان
 بیلا من دیب ایتماسین کونکدلاکی چرکی‌نی

رهنمادور خواجه احمد گلستان معرفت
 سوزلار سوزی حقیقت آجار کونکل ملکی نی
 مسکین ضعیف خواجه احمد یتی پشتینک کا رحمت
 فارسی تیل نی بیلیمان خوب ایتادور ترکی نی

(۱۳۲)

حکمت

کونکلوم قوشی اوجار دایم قنات توقوب
 ایکی کوزوم ندامتده قانلار توکوب
 تن اولتروب ریاضتده تیزین چوکوب
 یا الهی عفو قیلغیل کناهیم نی
 نادان لیقده قیلغان ایشیم بارچه خطا
 توبه تقصیر ایلامادیم یقام توتا
 کردنیمکا طوق ینکلغ سالب فوطا
 یا الهی عفو قیلغیل کناهیم نی
 دنیا سویوب دین سوداسین اوتکاریب مین
 یازوق یوکی ن ایا دوستلار بتکاریب مین
 درکاهنا معصیت لار کیلتوروب مین
 یا الهی عفو قیلغیل کناهیم نی
 شوم دنیاغه کونکل باغلاب کاهل بولدوم
 عشرت بیلان وا دریغا جاهل بولدوم
 بو دنیانی اوتارینی ایمدی بیلدیم
 یا الهی عفو قیلغیل کناهیم نی
 کونکل ملکین توتمش اوخشار ظلمت تونی
 من لیک ایچره پیدا بولور ما و منی
 پیر خدمتی یراق قیلور بیزدین آنی
 یا الهی عفو قیلغیل کناهیم نی

قول خواجه احمد کناهی کا قایل ایرو
 هر کیم الله دیسه آنکا یاری بیرو
 ایرانلارنی صحبتی کا مایل ایرو
 یا الهی عفو قیلغیل کناهیمنی

(۱۳۳)

حکمت

قدرت برلان فرمان قیلدی مولیم بیزغه
 بیرده، کوکده یانلیق مخلوق قالماس ایرمیش
 قبض قیلدی عزرائیلنی عالم اوزرا
 عزیز جانین آلماقونچه قویماس ایرمیش
 یاشیم مینی یاش بولور دیب آیتور ایردیم
 هر نه خالص بولسا آز دیب آیتور ایردیم
 تورلوک - تورلوک دعا ایشلر قیلور ایردیم
 ایمدی بیلدیم مین آیتکاندیک بولماس ایرمیش
 دنیا مینی ملکوم دیکان سلطانلارغه
 عالم مالین سانسیز ییغیب آغانلارغه
 عیش و عشرت برله مشغول بولغانلارغه
 اولم کیلسه بیرى وفا قیلماس ایرمیش
 مغرور بولمان، ای دوستلاریم! عشرت ایتیپ
 کیچه - کوندوز یالغان آیتیپ بیخود یاتیپ
 جان آغونچی کیلور ایرمیش بیر کون ایتیپ
 مونداغ یرده غافل یورسه بولماس ایرمیش
 قول "خواجه احمد" اولارینی بیلا کور قیل
 آخرتنی یراقنی قیلا کور قیل
 بارورمن دیب یول باشیده تورا کور قیل
 ملک الموت کیلسه فرصت قویماس ایرمیش

(۱۳۴)

حکمت

سبحان ایدیم اوزی دور اول مصطفی بیوردی
بابام آرسلان تیکوردی شیخم احمد یسوی
مصطفی نینک خرقه سین کیدی، ییدی لقمه سین
توتدی کعبه حلقه سین شیخم احمد یسوی
باقسه کعبه کورونکان باسسه ییرلار تورولکان
لدن علمی بیرلکان شیخم احمد یسوی
اصلی ایرور خاندان ییلماس آنی کوب نادان
بیلور آنی حق یزدان شیخم احمد یسوی
اسحاق بابا یریقی شیخ ابراهیم قولنی
مشایخ لار اولوغی شیخم احمد یسوی
یاسی سونینک اراسی یاتور کوهر پاره سی
مشایخ لار سراسی شیخم احمد یسوی
قرچیغنی قوشلاغان شونقار لاجین اوشلاغان
سانسز مرید باشلاغان شیخم احمد یسوی
شریعتی آراسته طریقتی پیوسته
حقیقته شایسته شیخم احمد یسوی
شریعتنی سوزلاکان طریقتنی ایزلاکان
حقیقتنی بیلدورکان شیخم احمد یسوی
کون توغاندین باتارغه ترسه، جهود، تاتارغه
قوللوق قلیب سانارغه شیخم احمد یسوی
اون سیکز مینک عالمده آتی مشهور کلامده
اورنی دار السلامده شیخم احمد یسوی
بابلار بابی خراسان سانسز تومان هندوستان
بابالار باشی [بابا] آرسلان شیخم احمد یسوی

آتام آتی ازغوسی یپار بولوب توزغوسی
ایکی جهان کوزکوسی شیخم احمد یسوی
خضر برله صحبتلیک الیاس برله الفتلیک
حق قاشنده حرمتلیک شیخم احمد یسوی
ترکستانغه بارالنک خدمتنده بولالنک
اولوش بیرسه الالنک شیخم احمد یسوی
بابا ماچین اول سلطان مرید بولدی بیگمان
حکیم خواجه سلیمان شیخم احمد یسوی

مناجات بدرگاه قاضی الحاجات جل جلاله

مناجات ایلدی مسکین خواجه احمد
الهی قیل همه بنده نکی رحمت
غریب احمد سوزی هرکز قوریماس
اگر ییر آستیغه کیرسه چوروماس
ینه منسوخ بولوب اول خوار بولماس
اوقوغان بنده لار بیمار بولماس
اوقوغانغه قیلور مین آنده شفقت
قیامت کونیده قیلغوم شفاعت
خدایم قیلسه انعام مینکا جنت
اوقوغاننی قیلور مین مین شفاعت
تیلانکی هر نه بولسه تنکری بیرکای
محبت شوقی نی کوکسیکا سالکای
جمالین کورساتیب پروردکاریم
اوزین یولیغه سالسون بیر و باریم
خدایم ایلاسون محشرده خرّم
قیامت کون اریغ ذاتیغه مخرّم
دعاغه یاری بیرسه هر مسلمان
اولار وقتیده ایلتنکای نور ایمان
مینى حکمت لاریم عالمغه تولغان
ایشیتمای هر کیم اولسه قیلغای ارمان

مینی حکمت لاریم دردلیککا درمان
 کیشی بوی ایلتمسه اول یولده قالغان
 مینی حکمت لاریم عالمده داستان
 روحوم کیلسه قیلور صحبت نی بوستان
 مینی حکمت لاریم کان حدیث دور
 کیشی بوی ایلتمسه بیلکیل خیث دور
 مینی حکمت لاریم طالب نی رزقی
 اگر چندیکه بولسه جرم و فسقی
 مینی حکمت لاریم فرمان سبحان
 اوقوب بیلسنک همه معنی قرآن
 مینی حکمت لاریم عالمده سلطان
 قیلور بیر لحظه ده چول نی کلستان
 مینی حکمت لاریم شوق محبت
 کوزینی یاشیغه قیلغای طهارت
 نمازیغه رسول الله امامی
 آنی قومی ملائک لار تمامی
 شکسته لیک بیله قیلغان نمازی
 قبول بولغای آنی حقه نیازی
 مینی حکمت لاریم عاشق غه ایتینک
 دلی آینه دیک صادق غه ایتینک
 همه کور و کر و باطنی کذاب
 تمام اقلیم نی گیزدیم تابمادیم صاف
 مینی حکمت لاریم صراف کا ایتینک
 خدای باکرم وهاب کا ایتینک

عدالت پادشاه بر آتی صادق
 قیلور بیر لحظه ده وصلی غه لایق
 مینی حکمت لاریم نادان ایشتماس
 دلی، کونکلی قارا پندیم نی آلماس
 خطی دین بیخبر الله غه منکر
 ادب سیز بی ادب دنیا ده بی پیر
 خطی نی بتسه هر کیم نثر بتسون
 ولی نثری بتیب مقصود غه يتسون
 دینی ایمانی یوق اسلامی ویران
 قیامت تانکی آتسه یولده قالغان
 پیر کامل نی کورمای شیخ صنعان
 خدا قیلماس قبول اوقوسه قرآن
 اوزینی شیخ آلور کولباری حالی
 یکرمه بیش کا یتمای آنی سالی
 نصیحت لار قیلور پیر و جوان نی
 اوزی فهم ایماین یخشی یمان نی
 آلارنی سوزلاری ضال مضل دور
 شریعت اهلی بو ایل دین خجل دور
 اینانسون دیب مونی بیر نیچه بی عقل
 قیلورلار اولیالاردین مونی نقل
 قویوب دامین کذرکاه لار غه بی پیر
 تیلی مکر و حيله قیلغانی تزویر
 آنی مکر ی ایرور شیطان دین اعلا
 قوپار یوزی قرا محشرده تانکلا

الارنى كورمنكىز يوزىنى هر كىز
 اينكىدىك لعنتى دىن ايلانك پرهيز
 زبانى حال ايله اعمىنى ايتىم
 حقيقت سوز بيله جاهلنى سوكتىم
 اكر عالم بولسه جانىم تصدق
 دُر و كوهر سوزومنى ايشيتىب اوق
 دُر و كوهر سوزىن عالمغه ساچسه
 اوقوب اوقوسه كلام حقنى آچسه
 اوشال عالمغه جان قربان قىلورمىن
 تمامى خانمان احسان قىلور مىن
 قانى عالم قانى عامل يارانلار
 خدادىن سوزلاسه سىز جان برىنكلار
 چىن عالم يستوقىن تاشدىن ياراتى
 نيمه اوقدى آن عالمغه ايتى
 اوزىنى بىلدى ايرسه حقنى بىلدى
 خدادىن قورقتى و انصافغه كىلدى
 مىنى حكمتلارىم دانا يشيتسون
 سوزوم داستان قىلىب مقصدغه ييتسون
 مىنى حكمتلارىم فعلى وقولى
 دلى كونكلىده بولسه ذكر مولى
 مىنى حكمتلارىم بير پير كامل
 قايو بنده خداغه بولسه مايلى
 مىنى حكمتلارىم خوبلارغه ايتىنك
 دعا تكبير قىلىب رحمتكا باتىنك

مینی حکمت لاریم پیر زبردست
 ایشیتکانلار بولور بیهوش سرمست
 تیریک بولسه جهانده خوار بولماس
 اوقوغان بندهلار بیمار بولماس
 قیامده آنکا هادی بولور مین
 اکر دردلیک بولسه دارو بولورمین
 اکر یوز ییل عمر کورسه قوریماس
 اکر ییر آستیغه کیرسه چوروماس
 خدا قیلغای آنی دوزخدین آزاد
 بهشت جاودانده ایلاکای شاد
 اکر حکمت اوقوسه ایها الناس
 ایرور فرزند مینکا اول طالب خاص
 ایشیتیب حکمتیمنی گوشه آغان
 عطا قیلغای اولار وقتیده ایمان
 یسوی حکمتین دانا ایشیتسون
 ایشیتکانلار همه مقصودغه یتسون
 جواهر کانیدین بیر نکته آلسون
 ایشیتماکان باری حسرتده قالسون
 کیشی حکمت ایشیتسه جانی برلان
 چیقار جانی آنی ایمانی برلان
 قلاقه آلماغای بو سوزنی نادان
 آنی آدم دیمه اول جنس حیوان
 خدانی سوزیدین چیقان بو حکمت
 ایشیتکان کا یاغار باران رحمت

مینی حکمت لاریم کیم توتسه محکم
 خدا قیلغای آنی البته بی غم
 کرار جنت ایچیکا شاد و خندان
 خدایم ایلاکای مسرور و شادان
 مینی حکمت لاریم حقنی ثناسی
 محبت اهلینی دردین دواسی
 مینی حکمت لاریم قند و عسل دور
 همه سوزلار ایچنده بی بدل دور
 مینی حکمت لاریم انعام الله
 سحر وقتده دیسه استغفر الله
 آنی شیطان لعین توتماس یولی نی
 محمد مصطفی آلغای قولی نی
 پیغمبر امتیم دیب مهری تاو لار
 عزایل نی خدایم اوزی قاو لار
 مینی حکمت لاریم درد سیزکا ایتمنک
 بهاسیز گوهریم نادانغه ساتمنک
 یسوی حکمتین قدریغه یاتقیل
 خم عشقدین می بر قطره تاتقیل
 خم عشقدین کیشی بیر قطره تاتقای
 خدانی وصلی کا بر یولی یاتقای

تمت الكتاب بعون الله الملك الوهاب

(پیرترکستان)

خواجہ احمد یسوی

دیوان حکمت



ISBN: 964-472-286-8